

: Chaudhari: Bible for Matthew

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

- Share — copy and redistribute the material in any medium or format.
- Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

- Attribution — You must attribute the work as follows: "Original work available at <https://BibleInEveryLanguage.org>." Attribution statements in derivative works should not in any way suggest that we endorse you or your use of this work.
- ShareAlike — If you remix, transform, or build upon the material, you must distribute your contributions under the same license as the original.
- No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Matthew

Chapter 1

¹ઈસુ ખ્રિસ્ત જે ઈબ્રાહીમના ડિકરા, જે દાઉદના ડિકરા, તીયાણે વંશાવલી

²ઇબ્રાહિમ ઈસાહાકણો આથહો , ઈસહાક યાકુબણો આથહો , યાકુબ યહૂદા ને તિયાણે ફાવાહાઈ આથહો,

³યહૂદા તામારથી હોવનો પેરેસ ને ઝરાહા, પેરેસ હેસોનણો આથહો, હેસોન આરામણો બાયો,⁴આરામ અમ્મીનાદાબણો આથહો, અમ્મીનાદાબ નાહશોન સલ્મોનણો આથહો,

⁵સલ્મોન બોઆઝણો આથહો ને રાહાબ તીયાણે માં, બોઆઝ ઓબેદણો આથહો ને રૂથ તીયાણે માં ઓબેદ યીશાઈણો આથહો

⁶યીશાઈ દાઉદ રાજાણો આથહો હોતનો, દાઉદ સુલેમાનણો બાયોને તીયાણે માં પેલી ઉરીયાણી પત્ની હોતની.⁷સુલેમાન રહાબણો આથહો, રહાબામ અબિયાણો આથહો, અબિયા આશાણો આથહો,

⁸આસા યહોશાફાટણો આથહો, યહોશાફાટ યોરામણો બાયો, યોરામ ઉઝીયાણો આથહો હોતનો.⁹ઉઝિયા યોથામણો આથહો, યોથામ આહાઝણો આથહો , આહાઝ હિઝકિયાણો આથહો,

¹⁰.હિઝકિયા મનાસ્સાણો આથહો,મનાસ્સા આમોનણો આથહો, આમોન યોશિયાણો આથહો,

¹¹બાબીલના બંદીવાસણે સમયે યોશિયા યખોન્યા ને તીયાણે ફાવાહાય આથહો હોતનો.¹²ને બાબીલની બંદીવાસ ફૂટી, યખોન્યા શાલતીએલ આથહો, શાલતીએલ ઝરુબ્બાબેલણો આથહો,

¹³ઝરુબ્બાબેલ અબીઉદણો આથો, અબીઉદ એલિયાકીમણો આથહો, એલિયાકીમ આઝોરણો આથહો,

¹⁴આઝોર સાદોકણો આથહો, સાદોક આખીમણો આથહો, આખીમ અલિયુદણો આથહો,¹⁵અલિયુદ એલાઝારણો આથહો, એલાઝાર મથ્યાનણો આથહો, મથ્યાન યાકુબણો આથહો,

¹⁶યાકુબ યુસફણો આથહો, યુસફ તો મરિયમણો પતિ હોતનો ;ને મરિયમ થી ઈસુ ખ્રિસ્તણો જન્મો હોવો.

¹⁷ઇબ્રાહીમથી દાઉદ હુદી બદે મીલીને ચૌદ પેઢી હોવી, દાઉદથી બાબીલણા બંદીવાસ હુદી ચૌદ પેઢી, બાબીલણી બંદીવાસ ફૂટી ખ્રિસ્તણો સમય સુધી ચૌદ પેઢી હોવી,¹⁸ ઈસુ ખ્રિસ્તણો જન્મો એવી રીતે હોવો, તીયાણે માં મરિયમણી સગાઈ યુસુફ હારી હોવની, તીયાણે શારીરિક સબંધ હોવા પેલા પવિત્ર આત્માથી ગર્ભવતી હોવની જાણવામાં આવી.

¹⁹તીયાણે પતિ યુસુફ એક પ્રામાણીક પુરુષ હોતનો, ફણ તો બદાહા આગાલ તીયાણે અપમાન કરને કાયની માગતોનો, એટલે તીયાણે છાનોમાનો તીયાે હારી સગાઈ તોડી નાખવાણો વિચાર કદો.²⁰જીયા તીયાે હિયા વિશે વિચાર કદો, તીયા પ્રભુણે દુતે તીયાણે સ્વપ્નમાં દેખસો ને તીયાણે કણે લાગો કા, "યુસુફ દાઉદણા દિખરાહ, તું તોરે પત્ની મરિયમણે હાદી નાવણે ખાબરાતો નખે ; કેહે કા તીયાણે ગર્ભમાં જી બાળક હા તી પવિત્ર આત્માથી હા,

²¹તીયાણે દિખરોહ હોવી ને તું તીયાણે નામ ઈસુ પાડજે, કેહ કા તો પોતાણે માણાહાય તીયાણે પાપોમાંથી ઉદ્ધાર કરી. "²²હવે હી બદ એટલા હારુ હોવ કા, પ્રભુએ પ્રબોધકમાં રચને કવડાવીન તી પૂર હોય, એટલે,

²³"કેહ કા, કુંવારી ગર્ભવતી હોવી, તીયાણે દિખરોહ હોવીને તીયાણે નામ તે ઈમાનુએલ પાડી. જીયાણે અર્થ હા કા, ઈશ્વર આપળે હારી હા. "²⁴પુઠી યુસુફ ઊંઘમાંથી ઉઠી ગો ને જેહે પ્રભુણા સ્વર્ગદુતે તીયાણે આજ્ઞા આપી તેહે કદ ; તો પોતાણી પત્નીણે હાદી નાવો.

²⁵મરિયમણે દિખરોહ હોવો તીયા હુદી યુસુફ મરિયમ હારી શારીરિક સબંધ રાખ્યો કાયની ; ને તીયાે તીયાણે નામ ઈસુ રાખ્ય.

Chapter 2

¹હેરોદ રાજાણા સમયમાં યહૂદિયાના બેથલેહેમમાં ઈસુણો જન્મો હોવો તીયા, ભાગીનોકાહા પૂર્વથી

યરુશાલેમમા આવીને પૂછણો લાગા, કા

²યાહૂદીણા જે રાજાણો જનીમીયો હા તો કા હા ? કેહ કા પૂર્વમાં તીયણો તારો દેખીને આમે તીયાણો ભજન કરને આવા હામ. "

³તી ઉનાય ને હેરોદ રાજા ખાબરાયો ને તીયા હારી આખ યરુશાલેમ ફણ ખાબરાય,⁴તીયા ફૂટી હેરોદ રાજાએ સર્વ મુખ્ય યાજકોને શાસ્ત્રીઓ હે ફેગા કરીને પૂછય કા, " ખ્રિસ્તણો જન્મો કા હોવા જોજે? "

⁵તીણાહાય તીયાણો કય કા, " યહૂદીયાણા બેથલેહેમમાં, કેહ કા પ્રબોધકે એહ નખીન હા,કા પાળક

⁶ઓ યહૂદીયા દેશણા બેથલેહેમ, તું યહૂદીયાના સૂબાઓમાં કોઈપણ રીતે બદાહાથી નાન કાયની હા, કેહ કા તોરેમાંથી એક અધિપતિ નિકલી, તો મારે ઇઝરાયલ માણાહાય ગોવાલ બની. "⁷તીયા હેરોદ રાજાએ જ્ઞાનીઓ હે છાનમાન હાદીને, તારો કાણે સમયે દેખાયો, તીયા વિશે તિણાહાય પાહેથી માહિતી મેલવી.

⁸તીયે તીણાહાય બેથલેહેમમાં મોકની ને કય કા, "તુમે જાયા ને બાળક સબંધી હારી રીતે હોદ કરા ને તી પુડી માને ખબાર આપા, કેહ કા હાય ફણ આવીને તીયા બાયાણો ફકતી કર. "⁹તીણાહાય રાજાણો કયન ઉનાયને ગયા ને જો તારો તીણાહાય પૂર્વમાં દેખીનો તો તીયાણો આગાલ યાનણો લાગો ને જીયા બાળક હોતન તીયા જાગા પાર આવીને અટકી ગો.

¹⁰તીણાહાય તારાણો દેખીને ખણા આનંદથી હરખાયા.¹¹ખરમાં જાચને તીણાહાય બાળકણો તીયાણો માં મરિયમ પાહે દેખ્ય; પગે પડીને તીયાણો ફકતી કદી, પુડી તીણાહાય પોતાણો થેલી ખોલીને સોનુ, લોબાન ને બોળ તીયાણો નજરાણ કદ.

¹²હેરોદ પાહે પાછ જાવણ કાયની, હેવી ચેતાવણી સ્વપ્નમાં મીલી એટલે બીજે વાટે પોતાણા દેશમાં પાછા ગયા.¹³બધાં પાછા ગયા ફૂટી, પ્રભુણા સ્વર્ગદુતે સ્વપ્નમાં યુસુફણો કય કા, "ઉઠ, બાળકણો ને તીયાણો માંણે નેય ને મિસરમાં જાતો ર, હાય તુને કમ તીયા હુદી તીયેજ રજે, કેહ કા બાળકણો મારી નાખણો હારુ હેરોદ તીયાણો હોદ કરાવાણો હા. "

¹⁴તીયે રાતે યુસુફ ઉઠીને બાળકણો ને તીયાણો માંણે નેયને મિસરમાં ગો.

¹⁵ને હેરોદણા મરણ હુદી તીયેજ રયો, એટલે હારુ કા પ્રભુએ પ્રબોધકાહાય જી કયન તી પુર હોય કા, "મિસરમાંથી મયે મારે દિખરાણો હાદી નેદો "¹⁶તીયા હેરોદણે ખબર પડી કા જ્ઞાનીઓએ માને છેતીરયો હા, તીયા તો ઘણો તપી ગો ને માણહે મોકનીને જીયા સમય હારુ તીયે જ્ઞાનીઓ પાહેથી બરાબર ખબર મેલવી નેદી, તીયા સમયથી નેયને બે વરાહા હુદીણા ને તીયાથી નાને બાળકાહાય જી નર હોતને બેથલેહેમમાં ને આજુબાજુણા વિસ્તારમાં હોતને તીણાહાય મારી નાખાવ્યો .¹⁷તીયા ચર્મિયા પ્રબોધકે જી કયન તી પૂર હોવ, કા

¹⁸"રડવાનો, ને મોટા વિલાપણો પોકાર રમામાં ઉનાયો, એટલે તે રાહેલ પોતાણા બાળકણો હારુ રળીને દિલાસો પામણો માંગતીની કાયની, કેહે કા તીયણો બાળક રયના કાયની. "¹⁹હેરોદણા મરણ પુઠી , પ્રભુણા સ્વર્ગદુતે મિસરમાં યૂસુફણો સ્વપ્નમાં આવીને કય કા,

²⁰"ઉઠ, બાળકણો ને તીયાણો માણે નેયને ઇઝરાયેલ દેશમાં જા કેહ કા જે બાળકણો મારી નાખવાણો વિચાર કરતાના તે મરી ગયા હા."

²¹તીયા યુસુફ બાળકણો ને તીયાણો માંણે નેયને ઇઝરાયેલ દેશમાં આવો.²²ફણ આર્ખીલાઉસ પોતાણા બાપ હેરોદણા જગ્યાએ યહૂદીયામાં રાજ કરતોનો, એવી વાત ઉનાય ને તીયે જાતા ખાબરાયો. પોતાણો સ્વપ્નમાં ચેતવણી પામીને ગાલીલ પ્રાંત ફણી વલી ગો.

²³તો નાઝારી ક્વાય હેવ પ્રેબોધકોહાય કયન પૂરું હોય તીયા હારુ નાસરેથ,નામણા નગરમાં આવીને રયો .

Chapter 3

¹તિયા દિહામાં યોહાન બાપ્તિસ્મા કરનાર ચહૂદિયાણા અરણ્યમાં ઉપદેશ આપતા એહે કતનો કા,

²"" પસ્તાવો, કરા કેહે કા સ્વર્ગણ રાજ્ય પાંહિ આવ હા.""

³કેહે કા તો હોજ હા, જીયા વિશે યશાયા પ્રબોધકે કઇન કા, " અરણ્યમાં પોકારનારની એવી વાણી હા, પ્રભુણો માર્ગ તિયાર કરા, ને તિયાણો રસ્તો હિદો કરા."⁴યોહાનણે નુગળે ઊટણા નીબાલાહાય હોતને, તિયાણે કળીમા ચામળાણે પટ્ટો હોતનો ને તીળ ને રાની મધ તીયાણો ખાપાણ હોતનો.

⁵તિયા પાહે યરૂશાલેમણા, ચહૂદીયાણા ને યદેનણા આસપાસ સર્વ પ્રદેશણ માણેહે તીયાણે પાહે આવે.

⁶તિ માણેહાય પોતાણા પાપો કબૂલ કરીને યદેન નદીમાં તિયાથી બાપ્તિસ્મા નેદ.⁷પુઠી ફરોશીમાણા ને સદુકીમાણા ઘણાં પોતાથી બાપ્તિસ્મા પામણે હારં આવતા દેખીને યોહાને તિણાહાય કય કા, "" ઓ સંપોના વંશ, આવનાર કોપથી નાસવાણે તુમાહાય કીડે ચેતવ્યા?.

⁸પસ્તાવો કરનારને હોબે તેવા ફળ આપા.

⁹તુમારે મનમાં એહે કવાણની ધારવાણ કા, ઈબ્રાહિમ આમારે બાપ હા; કેહે કા હાય તુમ હાય કતોહામ કા ઈયાં પથરાહ માથી ઈશ્વર ઈબ્રાહિમણે હારં બાળકો પેદા કરી કહતો હા.¹⁰ઝાળવાહાઈ મુલાહાઈ પાર કુવાળો પેલેથી મુકી દેવામાં આવો હા, તિયા હારં જી ઝાળવ હારઅ ફળ કાઈની આપત તિયાણે વાળી નાખવામાં આવી ને. આગળામાં નાંખી દેવામાં આવી.

¹¹તિયા હારં પસ્તાવાણ હાય પાણીથી તુમારે બાપ્તિસ્મા કરતો હામ, ફણ જો મારે પાછાલ આવવાણો હા તો મારે કરતાં સામર્થ્યવાન હા, હાઈ તિયાણે ચંપાલે ઊચિકવાણે લાયક કાયની હામ; તો તુમારે બાપ્તિસ્મા પવિત્ર આત્માથી ને અગ્નિથી કરી .

¹²તિયાણે હુપડં તિયાણે હાથમા હા, ને પોતાણી ખલાણે બરાબર સાફ કરીને પોતાણા ઘઉં વખારમાં ફરી, ફણ ભૂસું ઉનવાયજી તેવો આગળામાં બાલી નાખી."¹³તિયા પૂઠી ઈસુ યોહાનથી બાપ્તિસ્મા નેણે હારં ગાલીલ થી યદેન નદીએ તિયા પાહે આવો.

¹⁴ફણ યોહાને તિયાણે અટકાવતા કય કા, " તોરેથી મારે બાપ્તિસ્મા પામવાં જોજે ને તું મારે પાહે આવો હા?"

¹⁵પૂઠી ઈસુ એ જવાબ આપતા કય કા, " અમે તાણુ એહે જ હોવા દે, કેહે કા સર્વ ન્યાયપણું હેવી જ રીતે પુર કરવ તિ આપણાં હાય હાર હા."" તિયા યોહાને ઈસુણ બાપ્તિસ્મા આપ્ય.¹⁶તિયા ઈસુ બાપ્તિસ્મા પામીને તરાત જ પાણીમાંથી બાર આવો, ને હેદા તિયા હારં સ્વર્ગ ખુલીગ ને ઈશ્વરનો આત્મા કબૂતર ને રૂપ ઉતરતા ને પોતા પાર આવતા તિયાણે દેખાય.

¹⁷હેદા, સ્વર્ગમાંથી એવી વાણી હોવી કા, " ઓ મારો વ્હાલો દીકરો હા, તિયા પાર હાય પ્રસન્ન હામ."

Chapter 4

¹પૂઠી ઈસુણે પરીક્ષણ શેતાનથી હોવ તિયાં હારું આત્મા તિયાણે જંગાલ માં હાદી ગો.

²ચાલહિ દિહી રાત ઉપવાસ કદો પૂઠી તિયાણે કુક નાગી.

³પરીક્ષણ કરનારે તિયાં પાહે આવીને કય કા, " જો તું ઇશ્વરનો દિકરો હા, તો ઈયાં પથરાણે કચ કા, તો રોટનો બની જાય ."

⁴ફણ ઈસુએ જવાબ આપતા કય કા, " એવ નખીન હા, કા માણહ એખની રોટનો થી ની પણ દરેક શબ્દ જે ઇશ્વરના મોળામાથી નિકલત હા તિયાથી જીવંત હા." ⁵તિયાં પૂઠી શેતાન તિયાણે પવિત્ર નગરમા નેય ગો ને ભક્તિણા જગ્યાણા બુરુજ પાર તિયાણે ઊભો કદો.

⁶ને તિયાણે કય કા, " જો તું ઇશ્વરનો દિકરો હા, તે પોતાણે હેઠે પાળી નાખ; કેહેકા એવ નખીન હા, ' ઇશ્વર પોતાણા સ્વર્ગ દૂતો હાય તોરે હારું આજ્ઞા કરી; ને દૂતો તુને પોતાણા હાથમાં ઘરી નેઈ , ને તોરે પાગ પથર હારી ઠોકાઈ ની." ⁷ઈસુએ તિયાણે કય, " એહે પણ નખીન હા, ' પ્રભુ તોરે ઇશ્વરને તું પરીક્ષણ ની કર.'

⁸પાસો શેતાન તિયાણે ઘણાં ઊંચા ડોગરા ઉપાર નેઇ ગનો ને દુનિયાણા સઘળાં રાજ્યો ને તિયાણા વૈભવ તિયાણે દેખાવ્યો.

⁹ને તિયાણે કય કા, " જો તું પાગે પળીને મારે ફકતી કરે, તે ઇ બદચ હાય તુને આપી દેમ." ¹⁰તિયા ઈસુએ તિયાણે કય કા, " અરે શેતાન, આઘો જા ! કેહે કા નખીન હા, ' પ્રભુ તોરે ઇશ્વરને ફકતી કર ને એખના તિયાણે જ સેવા કર."

¹¹તિયા શેતાન તિયાણે મૂકીને નાહી ગો ; ને સ્વર્ગ દૂતોએ તિયા પાહિ આવીને તિયાણે સેવા કદી. ¹²યોહાન બંદીવાન કરાયો હા, હવે ઉનાઇને ઈસુ ગાલીલમાં પાછો આવો.

¹³પૂઠી નાસરેથ સોળીને ઝબુલોનણા ને નફતાલીણા પ્રદેશમાંણા સમુદ્ર પાહિ કપરનુહમમાં તો આવીને રયો. ¹⁴ઇયા હારું કા પ્રબોધક યશયાએ જી કઇન તિ બચદ પુર હોય ,

¹⁵"ઝબુલોનણા પ્રાંત, નફતાલીણો પ્રાંત, યદેન નદીણે હલે પાર, એટલે બિન યહૂદીઓણા ગાલિલ માણે

¹⁶જી માણેહે આદારામાં જીવતને, તિણાહાય મોટું હુજાલ દેખ્ય ને તિયાં વિસ્તારમાં જી મરણીની છાંયડામાં જી બેઠને હોતને, તિણે ઉપાર હુજાલ હોવ. ¹⁷ત્યાં પૂઠી ઈસુ ઉપદેશ કરતાં કણે લાગો કા, " પસ્તાવો, કરા કે હે કા સ્વર્ગણ રાજ્ય પાહિ આવ હા." ¹⁸ઈસુ ગાલિલણા સમુદ્રણે કિનારે ચાનતનો ત્યાં તિયે બે ફાવા હાઈ , એટલે સિમોન જો પિતર કવાતનો તિયાણે ને તિયાણા ફાહા આન્દ્રિયાણે દરિયામાં જાલ નાખતા દેખ્યા, કેહે કા તે માછને થરનારા હોતના.

¹⁹તિયા ઈસુએ તિણાહાય કય કા, મારે પાછાલ આવા ને હાઈ તુમાહાય માણેહાય થરનારા બનાવીહી;

²⁰તિણાહાય તરાત જાલ મુકી ને તિયાં પાછાલ ગયા. ²¹તિયાં પૂઠી આગાલ જાતા તિયે બીજા બે ફાવાહાય, એટલે ઝબદીણો દિકરો યાફૂબણે તિયાણે ફાહા યોહાનણે

તિણાહાય બાપા હારી વાહ ણમા પોતાણી જાલ હાદતા દેખ્યા. ને તિણાહાય ફણે હાજજા,

²²તીયા બધા તરાત વહાણ ને પોતાણા બાપણે સોળીને તિયાં પાછાલ જાતા રયા. ²³ઈસુ સભાસ્થાનમાં ઉપદેશ આપતો ને , રાજ્યણી સુવાર્તા ઉપદેશ આપીને માણાહામા જાત જાતણા રોગ ને દુઃખ હારે કરતનો , આખા ગાલિલમાં ફિરીયો.

²⁴તિયાં આખા સિરિયામાં તિયાણે કીરતી ફેલાઈ ગોઈ, ઘણા માહાહાય, ને, ઘણાં જાતણા રોગીથી પીડાતાહાય , દુષ્ટત્મા ને વીલગીનાહાઇ વાઈને રોગીહાય ને લકવા વાળ હાય બધા તીયા યાદી નાવે .

²⁵ગાલિલથી, દસ નગરથી, યરૂશાલેમથી, યહૂદીયા થી ને યદેનણે હલે પારથી માણાહાય ટોલેટોલા તિયાણે પાછાલ ગયા.

Chapter 5

¹તિયાં ઘણાં માણાહાય દેખીને ઇસુ ડોગરા પાર ચળી ગો; તિયાણે બેઠા પૂઠી તિયાણે ચેલા તિયાં પાહે આવા.

²તિયે પોતાણે મુ ઉઘાળીને તિણાહાય ઉપદેશ આપતાં ક્ય કા,

³" આત્મામાં જી રાંક હા તિ ધન્ય હા; કે હે કા સ્વર્ગણે રાજ્ય તિયણે હા.

⁴જે શોક કરતાહા તેવે ધન્યા હા; કેહે કા તી દીલાશો પામી.⁵જી નમ્ર હા તી ધન્ય હા; કેહે કા પૃથ્વીણ વતન પામી.

⁶જીણાહાય ન્યાયીપણાની ભૂખ ને તરસ હા તી ધન્ય હા; કેહે કા તી ધરાઈ

⁷દયાળુ હા તી ધન્ય હા; કેહે કા તિ દયા પામી.

⁸મનમાં જી શુદ્ધ હા તી ધન્ય હા; કેહે કા તી ઇશ્વરને હેદી હકી.⁹સલાહ કરાવનારને ધન્ય હા; કેહે કા તે ઇશ્વરના દીકરા કવાય.

¹⁰ન્યાયપણાને નેદે જીયાણે સતાવણી કરવામાં આવી હા તી ધન્ય હા; કેહે કા સ્વર્ગણ રાજ્ય તીણે જ હા.¹¹જીયા માણેહે તુમારે નિંદા કરે ને તુમાહાય સતાવે ને મારે નેદે તુમારે વિરૂદ્ધ જાત જાતણી ખોટી વાત અસત્યતા થી કચાણે નાગે, તિયાં તુમે ધન્ય હા.

¹²તુમે આનંદ કરા ને ખુબ હરખાયા, કેહે કા સ્વર્ગમાં તુમારો બદલો મોટો હા, તુમારે આગાલણા પ્રબોધક હારી માણેહે હેવી જ રીતે જ જુલુમ કરતે ને.¹³તુમે માણાહે જગતણે મીઠા હા; ફણ જો મીઠું બેસ્વાદ હોય તો તી કેવાથી ખાર કરાઈ? બાયરી ઉડાળી નાખણે ને માણાહાય પાગા નીચે છુંદાયા વગાર તિ કાય કામણ નાથ.

¹⁴તુમે માનવ જગતણે હુજાલ હા, ડોગરા પાર વહાવીન નગર દપીને રઈ હકત નાથ¹⁵દીવો કરીને ટીપાંણે વાહાણા નીચે કાઈની, ફણ દીવી પાર મૂકવામાં આવત હા, તિયાં ઘરમાંણા બદાહાય તી હુજાલ આપત હા.

¹⁶તેહે જ તુમે તુમારે હુજાલ માણાહાય આગાલ હેવ પ્રકાશવા દેયા કા તી તુમારે હારાકામ હેદીને સ્વર્ગમાણા તુમારે બાપણે મહિમા કરાત.¹⁷એહે ની માના કા હાય નિયમશાસ્ત્ર અથવા પ્રબોદકો હેય વાતો હોય નાશ કરાવણે આવો હામ; હાય નાશ કરને કાઈની ફણ પુર કરને આવો હામ

¹⁸કેહે કા હાય તુમાહાય નક્કી જ કતો હામ કા, આકાશ ને પૃથ્વી જાતે રય તીયે હુદી બદ પુર હોયા વગાર નિયમશાસ્ત્રમાંથી એકે કાનો અથવા માત્રો જતો રઈ ની¹⁹ઇયા માટે અ બધાથી નાની આજ્ઞાઓમાણી એકણે જો કોઈ તોડી અથવા માણાહાય હેવ. કરાવણે હિખવી તો તી સ્વર્ગણ રાજ્યમાં બધાથી નાનો કવાઈ ફણ જો કોઈ તી પાલી ને હિખવી તી સ્વર્ગણ રાજ્યમાં મોટો કવાઈ

²⁰કેહે કા હાય તુમાહાય કતો હામ કા શાસ્ત્રોઓના ને ફેરોશીઓણે ન્યાયપણા કરતાં જો તુમારે ન્યાયપણા વધારે ની હોય તીયા સ્વર્ગમાં તુમે પ્રવેશ ની જ કરી હખાહા.²¹હત્યા ની કર, ને જી કોઈ હત્યા કરે તિયાણે અપરાધી કરાવાણા જોખમમાં આવી; એહે પેલાણા સમયમા લોકાહાય કઈન હોત ન, તી તુમાહાય ઊનાય હા.

²²ફણ હાય તુમાહાય કતો હામ કા જી કોઈ પોતાણે ભાઈ પાર વગાર કામણો ગુસ્સો કરતો હા. તો અપરાધી કરાવાણા જોખમમાં આવી; જો પોતાણે ભાઈણે ઊજડ કઈ તો ન્યાયસભામાં અપરાધી ઠરાવાણા જોખમમાં આવી; જો કોઈ તિયાણે કતો હા, કા તુ મૂખો હા તી નરકણે અગ્નિણે જોખમમાં આવી.²³હીયા માટે જો તુ તોરે અર્પણ વેદી પાહાય નાવે ને જો તીયા તુને યાદ આવે કા મારે ભાયણે વિરૂદ્ધ કાઈક હા.

²⁴તો તિયે યજ્ઞવેદી આગાલ તોરે અપર્ણ મૂકીને જો પેલા તોરે ભાહાવ હારી સમાધાન કર ને તિયા પૂઠી આવીને તોરે અપર્ણ ચઢાવ²⁵જીયા હુદી તુ તોરે દુશ્મનણે હારી રસ્તામાં હા, તીયે હુદી તીણે હારી તરાત સમાધાન કર હેદજે ને તોરે દુશ્મન તુને ન્યાયધીશણે હોયે ન્યાયધીશ ને સિપાઈણે હોયી ને તુને જેલમાં નાખી દેવામાં આવે.

²⁶હામું જ હાય તુમાહાય કતો હામ કા, તુ મે બરાબર સજા મૂકવાહા ની, તીયે હુદી તુ²⁷ફણ હાય તુમાહાય ક તો હામ કા કોઈની પાહાય જી કોઈ ખોટી નજર કરત હા, તીયે અતરામાજ પોતાણે મનમા તીયી હારી કિયાનીણો વ્યેભિચાર કયરો હા.

²⁸જો તોરે જમણો ડોલો તુને પાપ કરાવણે દોરે, તે તિયાણે કાઢી નાખીને તોરે પાહાય થી ઉડાળી નાખ, કેહે કા તોરે અંગોમાણા એકણો નાશ હોય, ને તોરે આખ શરીર નર્કમા ની નાખાય,હી તુને ગુણકારક હા.²⁹જો તોરે જમણો હાથ તુને પાપ કરાવણે દોરે તિયાં તિયાણે વાડીને તોરે પાહાયથી ઉડાળી નાખ, કેહે કા તોરે અંગોમાણા એકણો નાશ હોય, ને તોરે આખ શરીર નર્કમા ની નાખાય,હી તુને ગુણકારક હા.

³⁰જો કોઈ પોતાણે ઘરાવાલીણે છોડી દેય, તે તુને ફારગતી નખી આપે, એહે ફણ કઈન હોતન.³¹ ફણ હાય તુમાહાય કતો હામ કા, વ્યભિચારને કારણ વગર જો કોઈ પોતાણે ઘરાવાલીણે છોડી દેય તે તિયણે પાહાય વ્યભિચાર કરાવતો હા; ને જે કોઈ તે છોડી દેદ ની ઘરવાલી હારી વેવા કરતો હા તો બી વ્યભિચાર કરતો હા.

³²વળી તું જુઠા હમ ની ખા ફણ પ્રભું પ્રત્યે તોરે હમ પૂરા કર; એહે પેલાણા સમયમાં માણાહાય કઈન હોતન તી તુમાહાય ઉનાય હા.³³ ફણ હાય તુમાહાય કતો હામ કા, કોઈ બી જાતણા હમ ની ખાયા; સ્વર્ગના કાઈની કેહે કા તી ઇશ્વરને રાજ્યસન હા.

³⁴પૃથ્વીણે કાઈની, કેહે કા તી તિયાણે પાયાસન હા; ને યરુંશાલેમણે કાઈની કેહે કા તી મોટા રાજાણે નગર હા

³⁵તુમે તુમારે માથાણે બી હમ ની ખાયા, કેહે કા તુમે એક બી નિબાલાણે ફણ ઉજલ અથવા કાલ કરી હક તે કાઈની.³⁶ ફણ તુમારે બોનવાણ તી હા. " તે હા ' ના ' તે ' ના ' હોય કેહે કા હિયા કરતા વધારે જે કાંઈ હા તી દુષ્ટ પાહાય થી હા.

³⁷ડોલાણે બદલે ડોલો ને દાતણે બદલે દાત તેહ કઈન હોતન તી તુમાહાય ઉનાય હા.³⁸ ફણ હાય તુમાહાય કતો હામ કા જો દુર્જન હોય તિયાણે હાબે ની હોવા; ફણ જો કોઈ તોરે જમણાં ગડાળ પાહાય થાપડ ઠોકે, તીયા ફણી બીજો, ફણ ફેરવ.

³⁹જો તોરે કોટ નેણે ફાગણો દાવો કરીને તુને ન્યાયભામાં નેઈ જાણે ધારે તિયાણે તોરે પેરવાણ બી નેવા દે.⁴⁰ જો કોઈ તુને જોરજોરથી એક માઈલ નેઈ જાય, તો તિયા હારી બે માઈલ જા.

⁴¹જી કાંઈ તોરે પાહાય માગે તિયાણે તું આપ ને તોરે પાહાય જી ઓછીન નેણ આવે તીયાથી મું ની ફેરવ.

⁴²તું તોરે મેરેણાહાય પાહાય પ્રેમ કર ને તોરે દુશ્મન પાહાય ટ્રેષ ની કર, તેહે કઈન હોતન, તી તુમાહાય ઉનાય હા.⁴³ ફણ હાય તુમાહાય કતો હામ કા, તુમે તુમારે દુશ્મન પાહાય પ્રેમ કરા ને જો તુમાહાય સતાવતે હા, તિયાણે ફાગી પ્રાથેના કરા.

⁴⁴હિયા માટે કા તુમે સ્વર્ગમાણા તુમારે બાપણે ડીખરેહે હોવા, કેહે કા તો સુર્પ દુષ્ટ ને ભલા પાહાય ઉગાડતો હા ને ન્યાયી ને અન્યાયી પાહાય વરહાત મોકલીનતો હા.

⁴⁵કેહે કા જી તુમારે પાહાય પ્રેમ કરત હા, તિયાણે પાહાય જો તુમે પ્રેમ કરતે હા, તીયા તુમાહાય કેવો બદલ મિલી? દાણીઓ બી. એહે કાઈની કરતાં?⁴⁶ જો તુમે કેવલ તુમારે ફાવાહાય સલામ કરતે હા, તો તુમે વિશેષ કામ કરતે હા? દેવ વગારને માણહે ફણ એહે નાથ કરતે?

⁴⁷હિયા માટે જેવો તુમારે સ્વર્ગમાણો બાપ સંપૂર્ણ હા, તેવે તુમે બી સંપૂર્ણ હોવા.

⁴⁸હિયા માટે જેવો તુમારે સ્વર્ગમાણો બાપ સંપૂર્ણ હા, તેવે તુમે બી સંપૂર્ણ હોવા.

Chapter 6

¹માણહે તુમાહાય હેદે તિયાં, હેતુ થી તિયાણે આગાલ તુમારે ન્યાયી કૃત્યો કરવાથી સાવધાન રયા; ની તે સ્વર્ગમાંણા તુમારે પિતા થી તુમાહાય બદલો મીલી ની.

²માટે જીયા તુમે દાનધર્મ કરાહા, તિયાં જેહે ઢોંગીઓ સભાસ્થાનોમાં ને વાટીમા માણાહાથી વખાણ પામણે કરે હા, તેહે પોતાણે આગાલ રણશિગડું ની વાગાડા. હાય તુમાહાય હાયુજ કતો હામ કા તી પોતાણે બદલો પામી ચુકયે હા. ³ફણ તુંમે જીયા દાનધર્મ કરા, તિયાં જો તુમારો જમણો હાય કરે તી તુમારે ડાબો હાથની જાણે.

⁴હીયા માટે કા તુમારે દાનધર્મ ગુપ્તમાં હોય; ગુપ્તમાં હેદનારો તુમારે બાપ તુમાહાય બદલો આપી. ⁵જીયા તુમે પ્રાર્થના કરાત. તિયાં ઢોંગીઓણે જેવા ની બના. કેહે કા માણહે તીણાહાય હેદે, માટે તી સભાસ્થાનોમાં ને વાટીણે મેરે છીડાપાર ઉભ રય ને પ્રાર્થના કરને માગતે હા. હાય તુમાહાય હાયુજ ક તો હામ કા તી પોતાણે બદલો પામી ચુકયે હા.

⁶ફણ જીયા તુમે પ્રાર્થના કરાત, તિયાં તુમારે ઓરડીમાં જાયા, બાર બંધ કરીને તુમારે બાપણે પ્રાર્થના કરા; ને ગુપ્તમાં હેદનાર તુમારે બાપ તુમાહાય બદલો આપી.

⁷તુમે પ્રાર્થના કરતાં બિનયહૂદીઓણે કાણે બકવાસ ની કરા: કેહે કા તી ધારતે હાકા અમારા ઘણો બોનવાથી આમારે ઉનાવામાં આવત. ⁸હીયા માટે તુમે તિયાણે જેવે ની હોવા. કેહે કા જીયાણે તુમાહાય જરૂર હા તી તિયાણે પાહાય માગ્યા આગાલ તુમારે બાપ જાણતો હા.

⁹માટે તુમે ઇયા રીતે પ્રાર્થના કરા: " ઓ આકાશમાણે આમારે બાપ, તોરે નામ પવિત્ર મનાય.

¹⁰તોરે રાજ્ય આવો, જેહે સ્વર્ગમાં તેહે પૃથ્વી પાર તુમારે ઈચ્છા પૂરી હોવે. ¹¹દિવસણે આમારે રોટની આજે આમાહાય આપ,

¹²જેહે આમાહાય આમારે અપરાધીણે માફ કયરે હા , તેહે તુમે આમારે અપરાધ આમાહાય માફ કર.

¹³આમાહાય પરીક્ષણમાં પડવા ની દે, ફણ દુષ્ટથી અમારે બચાવ કર. ¹⁴કેહે કા જો તુમે માણાહાય અપરાધો તિણાહાય માફ કરા.તીયા તુમારે સ્વર્ગમાંણો બાપ ફણ તુમાહાય માફ કરી.

¹⁵ફણ જો તુમે માણાહાય તિયાણે અપરાધો માફ ની કરા, તે તુમારે બાપ તુમારે અપરાધો ફણ માફ ની કરે. ¹⁶વલી જીયા તુમે ઉપવાસ કરાહા, તીયા ઢોંગીયાણે માફક ઉતરી ગને મોં વાલાહાય ની હોવા, કેહે કા લોકાહાય ઉપવાસી દેખાણે હારું તી પોતાણે મોં પડી ગન દેખાડને હા, હાય તુમાહાય હામુજ કતો હામ કા તી પોતાણે બદલો પામી ચુકયો હા.

¹⁷ફણ જીયા તુમે ઉપવાસ કરા, તીયા તુમારે માથા પાર તેલ લગાવા ને તુમારે મોં ધોયા.

¹⁸ઇયા હારું કા ફક્ત માણહે ની જાણત કા તુમે ઉપવાસ કરી રયે હા, ફણ તુમારે બાપ જે ગુપ્તમાં હા તિયાણે તુમે ઉપવાસી દેખાય. ને ગુપ્તમાં હેદનાર તુમારે બાપ તુમાહાય બદલો આપી. ¹⁹ધરતી પાહાય પોતાણે હારું દ્રવ્ય એકઠ ની કરા. તીયે કીડા ને કાટ નાશ કરી ને ચોરો દિવાલ તોડીને ચોરી જાય

²⁰ફણ તુમે પોતાણે હારું સ્વર્ગમાં એકઠ કરા. જીયે કીડા ને કાટ નાશ કાયની કરતા ને જીયે ચોરો દિવાલ તોડીને ચોરી જાતા કાયની.

²¹કેહે કા જીએ તુમારે દ્રવ્ય હા, તીયા જ તુમારે ચિત ફણ હા. ²²શરીરનો દીવો તે આંખ હા, ઇયા માટે જો તુમારે નજાર હારી હોય તે તુમારે આખ શરીર હુજાલાથી ભરીન હોઈ.

²³ફણ જો તુમારે નજાર ખરાબ હોય, તે તુમારે આખં શરીર અંધકારથી ભરીન હોઈ, માટે તુમારેમા જી હુજાલ હા, તી જ અંધકારરૂપ હોય. તો તી અંધકાર કતરો મોટો!

²⁴એક ચાકર બે માલિકણે ચાકરી કરી હકતો નાથ, કેહે કા તે એકણો દ્રેષ કરી, ને બીજાણે પાર પ્રેમ કરી, અથવા તે એકણો પક્ષણો બની, ને બીજાણે તિરસ્કાર કરી, એક હારી તુમે ઇશ્વરને ને દ્રવ્યણે ચાકરી કરી શકાત ની. ²⁵ઇયા માટે હાય તુમાહાય કતો હામ કા તુમારે જીવણે હારું ચિંતા ની કરા કા, આમે કાજા ખાહાવ અથવા કાજા પિહું; તેહે જ તમારે શરીરણે માટે ચિંતા ની કરા કા, કાજા પેરુંહું ? શું જીવ ખાવાણા કરતાં ને શરીર કપડાં કરતાં અધિક નાથ ?

²⁶આકાશણા પક્ષીઓણે હેદ; તેઓ તો વાવતે નાથ, કાપતે નાથ ને

બખારામાં ભરતે નાથ , તોયે ફણ તુમારે સ્વર્ગીય બાપ તિયાણે પોષણ કરતો હા , તે તીયા કરતાં તુમે અધિક મૂલ્યવાન નાથ હા ?

²⁷ચિંતા કરવાથી તુમારેમાણો કોઈ પોતાણે કદ ભર વધારી અખતો હા કા ?

²⁸વડી કપડા સંબંધિ તુમે ચિંતા કેહે કરતે હા, ખેતરના ફલઝાડા હાય વિચાર કરા. કાતી કેવે વધતે હા. તી મહેનાત કરતે નાથ ને કાપતે ફણ નાથ.

²⁹તો ફણ હાય તુમાહાય કતો હામ કા સુલેમાન ફણ પોતાણે સઘળ વૈભવમા તીયામાણા એકણો જેવો પેહરીનો ની હોતનો.³⁰ઈયા માટે ખેતણ ઘાસ જી આજે હા. ને કાને ભઠ્ઠીમા નાખાત છે. તિયાણે જો ઇશ્વર એવ પહેરાવતો હા, તો ઓ અવિશ્વાસઓ તુમાહાય શું તિયાથી વિશેષ ની પેરાવ?

³¹માટે આમે કાજા ખાહાવ? કાજા પિહુ ? અથવા કાજા પેરહું? એહે કરીન ચિંતા ની કરા.³²કારણ કા ઈ બદે વાના અવિશ્વાસીઓ હેદ તે હા. કેહે કા સ્વર્ગમાંણા તુમારે બાપ જાણતો હા કા એ બધાણે તુમાહાય જરૂર હા.

³³ફણ તુમે પેલે તુમારે રાજ્યણે તથા તુમારે ન્યાયીપણાને હોદા ને ઈ બધે વાના ફણ તુમાહાય આપી.

³⁴તિયા માટે આવતી કાનેણે હારું ચિંતા ની કરા. કેહે કા આવતી કાન પોતાણે વાતોહોય ચિંતા કરી. દિવસણે હારું તે દિવસણે દુઃખ બસ હા.

Chapter 7

¹કોઈણે દોષ ની કરા ને તુમારે દોષ કરાય.

²કેહે કા જી પ્રમાણે તુમે ન્યાય કરાહા,તીયા પ્રમાણે તુમારે ન્યાય હોવી જીયામાપ થી તુમે માપી આપ હા. તીયા જ પ્રમાણે તુમાહાય માપી આપાય.³તું તોરે ભાહાવણે ડોલામાણ ફોતરાં ધ્યાનમાં નેતો હા, ને તોરે પોતાણે ડોલામાણો ભારોટીયો કેહે હેતો નાથ?

⁴અથવા તું તોરે ભાહાવણે કેવી રીતે કઈ અખેકા માને તોરે ડોલામાથી ફોતર હે; ફણ જો, તોરે પોતાણેજ ડોલામા ભારોટીયો હા ?

⁵ઓ ઢોંગી ! પેલો તું પોતાણે જ ડોલામાંથી ભારોટીયો કાઢ, તીયા પૂઠી તુને તોરે ભાહાવણે ડોલામાંથી ફોતર કાઢવાણ હારી રીતે દેખાઈ.⁶જી પવિત્ર હા તી કૂતરાણે આગાલ ની નાખા , તુમા રે મોતી ભૂડોણે આગાલ ની નાખા ; એહે ની હોઈ કા તે તી પોતાણે પાગા તલે છુંદે ને તુમાહાય ચિરી નાખે.⁷માગાહા તે તુમાહાય અપાય ; હેદહા તીયા તુમાહાય જડી; ઠોકહા તીયા તુમારે ફાગ ઉઘાડાય

⁸કેહે કા જી બદે માગતે હા તિણાહાય મિલત હા ; જી હેદતે હા તિણાહય જડત હા ; ને જી કોઈ ઠોકત હા , તિણાહાય હારુ બાર ઉઘાડવામાં આવી.

⁹તુમારે મા હેવ કાણ માણહુ હા કા, જો તિયાણે દિખરોહો તીયા પાહાય રોટની માગે, તીયા તો તિયાણે પથરો આપી ?

¹⁰અથવા જો માછન માગે, તીયા તો તિયાણે સાપ આપી ?¹¹માટે જો તુમે ખરાબ હોવે છતાં, જો પોતાણે બાળકણે હારે વાના આપણે માગતે હા, તે તુમારે સ્વર્ગમાં,ણો બાપ પાહાય જી માગતે હા , તિયાણે કતર વિશેષ કરીને હારે વાના આપતો હા.

¹²માટે જી કાંઈ તુમે ઈચ્છા હા કા બીજા લોકો તુમારે પ્રત્યે કરી , તેવ તુમારે ફણ તીયા પ્રત્યે કરા : કેહે કા નિયમશાસ્ત્ર તથા પ્રબોધકોણે વાતોણો સાર તે હા.¹³તુમે સાંકડા બારણાથી માય જાયા ; કેહે કા જો માર્ગ નાશમાં પોહોંચાડતો હા , તિયાણે બારણં પલચ હા, ને ખણ તીયામા, રચઈ ને પ્રવેશી.

¹⁴જો માર્ગ જીવનમાં પહોંચાડતો હા, તો સાંકડો હા ને જીયાણે તો જડતો હા તી થોડે જ હા.¹⁵જે જુઠા પ્રબોધકો ઘેટાંણે જેવે તુમારે પાહિ આવે હા, ફણ અંદારથી ચીરી ખાનાર વરુણે જેવે હા . તીયા સંબંધી તુમે સાવધાન રયા.

¹⁶તિયાણે ફળથી તુમે તિણાહાય ઓલખાહા. શું લોકો કાંટાણે ઝાડવા પારથી દરાખ અથવા ઝેખરાપારથી અંજીર તોડી હા.

¹⁷તેહે જ દરેક સાર ઝાડ હાર ફળ આપત હા અને ખરાબ ઝાડ ખરાબ ફળ આપત હા.¹⁸હાર ઝાડ ખરાબ ફળ આપી શકત નાથ અને ખરાબ ઝાડ હાર ફળ આપી શકત નાથ.

¹⁹દરેક ઝાડ જી હાર ફળ નાથ આપત તી કપાત હા અને અગ્નિમાં નાખાત હા.

²⁰તેથી તેયા ણે ફળથી તુમે તિણાહાય ઓલખાહા.²¹જેવો માને પ્રભું કતે હા, તી બધે સ્વર્ગણે રાજ્યમાં જાય એહે તે ની, ફણ જી મારે આકાશમાણા બાપણે ઈચ્છા પ્રમાણે કરી તીજ જાય.

²²તીયા દિવસે ઘણે માને કય કા, પ્રભું પ્રભું ' શું આમાંહાય તોરે નામે પ્રબોધ કર્યો નાથ? તોરે નામે દુષ્ટઆત્માંણે કાયળ નાથ? ને તોરે નામે ઘણાં પરાક્રમી કામો કધે નાથ ?

²³તીયા હાય તિણાહાય સ્પષ્ટ કહય કા, માયે તુમાહાય કદિ ફણ ઓલખીતો નાથ. એ દુસ્તકર્મીઓ , તુમે મારે પાહિથી દૂર જાયા ""²⁴ઈયા માટે , જી કોઈ મારે વાત ઉનાત હા , ને પાલત હા, તી એક ડાયા માણાહાણે જેવ હા. જીએ પોતાણે ઘર ખડક પાર બાધજ.

²⁵વરાહાત વરીહયો , પુર આવ, વાવાઝોડા હોવ ને તીયા ઘર પાર સપાટા નાગા ; ફણ તિયાણે પાયો ખડક પાર બાધીનો હોવાથી તી પયળ ની.²⁶જી કોઈ મારે વાત ઉનાતે હા ફણ પાલતે નાથ, તી એક મૂર્ખ માણાહાણે જેવે હા, જિએ પોતાણે ઘર રેતી પાર બાધજ.

²⁷વરાહાત વરીહયો , પુર આવ, વાવાઝોડા હોવ , તી ઘર પાર સપાટા નાગા ને તી પડી. ગ ; ને તિયાણે નાશ મોટો હોવો.²⁸ઇસુ હે વાત કય રયો પૂઠી , એહે હોવ કા, લોકો તિયાણે ઉપદેશથી નવાઈ પામયે,

²⁹કેહે કા શાસ્ત્રીઓણે જેહે ની , ફણ જીયાણે અધિકાર હોય ને હેવી રીતે તો તિણાહાય ઉપદેશ કરતો હોતનો.

Chapter 8

¹જીયા ઈસુ ડોગરા પારથી ઉતીયરો, તીયા હમટે ખણે માણહે તીયાણે પાછાલ ગયે.

²ને હેદા, એક દુઃખી રોગીએ આવીને તીયાણે પગે પડીને કય કા ઓ પ્રભુ જો તોરે ઇચ્છા હોય તે તું માને શુદ્ધ કરી શકતો હા."

³તીયા ઇસુએ પોતાણો હાથ લાંબો કદો, ને તીયાણે અટકીને કય," હાય ચાહતો હામ, તું શુદ્ધ હો, " ને તરાત તો પોતાણા દુઃખી રોગથી શુદ્ધ હોવો.⁴પુઠી ઇસુ તીયાણે કય કા, જોજે, તુ કોઈણે કચતો નખે, ફણ જા, ચાજકણે જાઈને પોતાણે દેખાડને તીયાણે માટે સાક્ષી રીતે જે અર્પણ મુસાણા કહયા પ્રમાણે હા તી ચઢાવ."⁵ઇસુ કફરનાહુમમાં આવો. પુઠી જમાદારે તીયાણે પાહી આવીને વિનંતી કરી કા.

⁶ઓ પ્રભુ, મારે ચાકર ઘરમાં પક્ષઘાતી હોયને પડીનો હા. ને તીયાણે હમટી પીડા હોવતી હા.

⁷તીયા ઇસુએ તીયાણે કય કા."હાય આવીને તીયાણે હારો કરીહી."⁸જમાદારે જવાબ આપતાં કય કા, ઓ પ્રભુ તું મારે છાપરા નીચે આવે હેવો હાય યોગ્ય નાથ, ફણ તું માત્ર શબ્દ કચ, એટલે મારે ચાકર હારો હોવી.

⁹કેહેકા હાય ફણ કોઈણે અધિકાર હેઠળ હામ ને સિપાઈઓ મારે સ્વાધીન હા. એકણે હાય કતો હામ કા',જા, ને ત જાતો હા, બીજાણે કતો હામ કા, ઈયા પ્રમાણે કર; ને તો કરતો હો,"

¹⁰તીયા ઇસુણે તે ઉનાયને આશ્ચર્ય હોવ, પાછાલ આવનારાહાય તીયાણે કય,હાય તુમાંહાય હાયુંજ કતો હામ કા, એવો વિશ્વાસ મયે ઇઝરાયેલમાં ફણ હેજો નાથ. ¹¹હાય, તુમાંહાય કતો હામ, કા પુર્વથી તથા પશ્ચિમથી ઘણે માણહે આવીને ઈબ્રાહિમણે,ઈસહાકણે, તથા યાકુબણે હારી સ્વર્ગણા રાજ્યમાં ખાણે બેહી.

¹²ફણ રાજ્યણા દીકરાઓણે બારને અંધારામાં નાખાય. કા જીયા રડવું અને દાંત પીસવ હોવી.

¹³ઇસુએ તીયા જમાદારને કય કા,જા જેવો તુયે વિશ્વાસ કદો તેવજ તુને થાઓ;તીયે જ ઘડી તીયાણે ચાકર હારો હોવો.¹⁴ઇસુ પિતરને ખરમાં આવો, તીયે તેયાણે સાસુણે તાવથી માંદી પડીની દેખી.

¹⁵ઇસુ તીયાણે હાથણે અટકીયો, એટલે તીયાણે તાવ જાતો રયો ને તીયે ઉઠીને તીયાણે સેવા કરી.¹⁶હાંત પયળ તીયા માણહે ઘણે દુષ્ટઆત્માં વીલગીને તીયાણે પાહે નાવે ને તીયે શબ્દથી દુષ્ટ આત્માંણો બાર કાઢ્યે ને બધે માંદાહાય હારે કદે.

¹⁷તીયા માટે કા ચશાયા પ્રબોધકે જી કય હોતન તી પુર હોય કા', તીયે પોતે આપડે માંદગીણે નેદે ને આપડે રોગો ભોગવ્યા".¹⁸ઇસુએ માણાહાય મોટી ભીડ પોતાણે આજુબાજુ એકઠી હોવીની દેખી, તીયણાહાય ને હવી પાર જાવાણી આજ્ઞા કદી.

¹⁹એક શાસ્ત્રીએ પાહી આવીને તીયાણે કચચ કા, ઓઉપદેશક, જીયે કાઈ તુમે જાહા તીયે હાય તુમારે પાછાલ આવીહી.

²⁰તીયા ઇસુએ તીયાણે કચચ કા, "કોનાહાય દર હોતા હા.ને આકાશણા પક્ષીહીય માળા હોતના હા. ફણ માણસણે દીકરાણે માથું મુકવાણી જગ્યા નાથ.

²¹તીયાણે શિષ્યોમાંથી બીજાએ' તીણાહાય કચચ કા, પ્રભુ માને રજા આપ કા હાય જાઈને પહેલાં મારે બાપણે દફનાવીને આવ."

²²ફણ ઇસુએ તીયાણે કચચ કા, તું મારે પાછાલ આવ, મરણ પામીનાહાય પોતાણે મરણ પામીનાહાય દફનાવવા દે.²³જીયા ઇસુ હોડી પાર ચડ્યો. તીયા તીયાણે શિષ્યો તેયાણે પાછાલ ગયા.

²⁴હેદા, સમુદ્રમાં એવ મોટ તોફાન હોવ. જેથી હોડી મોજાંઓથી ઢાકાઇ ગયો; ફણ ઇસુ પોતે ઉઘંતો નો.

²⁵તીયા શિષ્યોએ તીયાણે પાહી આવીને તીયાણે ઉઠાડીને કય કા, " ઓ પ્રભુ આમાહાય બચાવ, આમે નાશ પામીયે હામ".²⁶પુઠી ઇસુએ તીયણાહાય કય કા, "ઓ અલ્પવિશ્વાસીઓ, તુમે કાજા કરને ઘાબરાય ગયા હા ? પુઠી તીયે ઉઠીને વાપરાણે ને સમુદ્રણે ધમકાવ્યો, ને ઘણી શાંતિ હોવી.

²⁷તીયા તે માણાહાય આશ્ચર્ય પામીને કચચ કા, હે કાણા પ્રકારનો માણહું હા. કા વાયરાને સમુદ્ર ફણ તીયાણે માનતા હા ?"²⁸જીયા ઇસુ હેલે પાર ગદરાનીના દેશમાં પહોંચો તીયે દુષ્ટાત્મા વીલગીને બે માણહે કબારમાંથી નીકલતે તીયાણે મીલે;તેઓ એવા બીધા હોતના કા તીયા વાટે કોઈથી જાવાત કાયની ;

²⁹હેદા તીણાહાય બૂમ પાડતા કચચ કા, ઓ ઈશ્વરને દીખરા,આમારે ને તોરે કાજા હા ? હા સમય આગાલ તુ આમાહાય પીડા આપણે ઇયે આવો હા. શુ ?³⁰હેવે તીયાથી થોડેક દૂર ઘણા ભૂંડાહાય એક ટોલો ચરતને .

³¹દુષ્ટાત્માઓએ તીયાણે વિનંતી કરતો કચચ કા," જો તુમે આમાહાય કાડે તીયા ભૂંડાહાય ટોલામાં અમાહાય મોકના.'

³²ઇસુએ તીણાહાય કચચ કા,જાયા,'પુઠી નીકલીને ભૂંડોમાં પેઠા; ને પાણીમાં ડૂબી મચરે.³³તીયા ચરાવનાર નાઠા,તીણાહાય નગરમાં જાયને બધ કચચ ઉનાવય ; ઘણા દુષ્ટાત્મા વીલાગીનાહાય કાજા હોવ તી ફણ કચચ .

³⁴તીયા હેદા આખ નગર ઈસુણે મિલણે બહાર આવ ; તી હેદીને તીણાહાય તીયાણે વિનંતી કદી કા,આમારે સીમમાંથી આન્યો જા.

Chapter 9

¹તીયા હોડીમાં બેઠીને ઈસુ હલે પાર ગો.તીયા પૂઠી પોતાણે નગરમાં આવો.

²તીયા હેદા,ખાટને પડીનો એક લખવા વાલાણે માણહે તીયાણે પાંડાય નાવે.ઈસુએ તીણાહાય વિશ્વાસ હેદીને પક્ષઘાતીણે કયઅ કા,દીકરા હિંમત રાખ,તોરે પાપ તુને માફ હોવા હા."³તીયા શાસ્ત્રીમાણા કતરાક પોતાણે મનમાં કયઅ કા,હો દૂરભાષણ કરતો હા."

⁴ઈસુએ તીણાહાય વિચાર જાણીને કયઅ કા,તુમે તુમારે મનમાં કાજા કરને દુષ્ટ વિચાર કરતે હા ?

⁵કેહે કા ઇયા બેમાણ વધારે હેલઅ કાણ હા,એહે કવાણ કા 'તોરે પાપ તુને માફ હોવા હા,અથવા એહે કવાણ કા ઊઠીને નાહી જા ?

⁶ફણ માણસણે દિખરાણે પૃથવી પાર પાપણે માફી આપવાણો અધિકાર હા,હી તુમે જાણા " ,એટલે ઈસુ લકવાવાલા માણાહાણે કયઅ કા,"ઊઠ,તોરે ખાટનો ઉચકીને તોરે ઘર નાહી જા."અને તો ઊઠીને પોતાણે ઘર ગો.

⁸તી હેદીને માણહે આશ્ચર્ય ચકિત હોવ,ને ઈશ્વરે માણાહાય હેવો અધિકાર આપયો હા,ઇયા માટે તીણાહાય તીયાણે મહિમા કદો.

⁹ઈસુએ તીયાથી જતા માથી નામણે એક માણાહાણે દાણ નેવાણી ચોકી પાર બેઠનો દેખયો,તીયે તીયાણે કયઅ કા,તુ મારે પાછાલ આવ,તીયા તો ઊઠીને તીયાણે પાછાલ ગો.¹⁰તીયા પૂઠી એહે હોવ કા,ઈસુ માથીણે ઘર ખાણે બેઠો તીયા હેદા,ઘણાં દાણ નેનારાઓ તથા પાપીઓ આવા ને ઈસુણી તથા તીયાણી શિષ્યોણી હારી બેઠા.

¹¹ફરોશીઓએ ઈ હેદીને તીયાણે શિષ્યોને કયઅ કા,તુમારો ઉપદેશક દાણીઓને તથા પાપીઓણે હારી કેહે ખાતો હા ?¹²ઈસુએ હી ઉનાયને તીણાહાય કયઅ કા,જી તંદુરસ્ત હા તીયાણે વૈધણે જરૂર નાથ,ફણ જી બીમાર હા તીયાણે હા.

¹³ફણ બલિદાન કરતાં હાય દયા ચાહતો હામ,ઇયાણે શો અર્થ હા,તે જાયને હીખા,કેહે કા ન્યાયીઓણે ની ફણ પાપીઓણે બાચાવણે હાય આવો હામ."¹⁴તીયા યોહાનના શિષ્યો તીયાણે પાહે આવીને કયઅ કા,"આમે તથા ફરોશીઓ ઘણીવાર ઉપવાસ કરતે હામ,ફણ તોરે શિષ્યો ઉપવાસ કરતાં નાથ,ઇયાણે કારણ કાજા ?

¹⁵તીયા ઈસુએ તીણાહાય કયઅ કા,"જીયા હુદી વરરાજા જાનૈયાઓણી હારી હા તીયા હુદી શુ તે શોક કરી શકે ? ફણ એવા દિવસો આવી કા,વરરાજા તીયા પાહીથી નેચ નેવાઈ તીયા તે ઉપવાસ કરી.¹⁶વલી નવા નુગળાણે થીગડ જુના નુગડામાં કોઈ મારત નાથ,કેહે કા તી થીગડાથી તે નુગડ ખેંચાત હા અને તી વધારે ફાટી જાત હા.¹⁷વલી નવો દ્રાક્ષારસ જૂની મશકો મા કોઈ ભરત નાથ,જો ભરે તો મશકો ફાટી જાતી હા,દ્રાક્ષારસ ઢોળાય જાત હા,ને મશકોણે નાશ હોતો હા,ફણ દ્રાક્ષારસ નવી મશકોમા ભરવામાં આવત હા,જેથી બનેણે રક્ષણ હોત હા."¹⁸ઈસુ તીણાહાય હે વાત કતો નો,તીયા હેદા એક અધિકારી આવીને તીયાણે પગે પડીને કયઅ કા,મારે દીખરીહ અમેજ મૃત્યુ પામી હા,ફણ તુ આવીને તોરે હાય તીયે પાર મૂક એટલે તી જીવતી હોવે."

¹⁹તીયા ઈસુ ઊઠીને પોતાણે શિષ્યો સહીત તીયાણે પાછાલ ગો.²⁰તીયા હેદા,એક સ્ત્રી જીયેણે બાર વરહાથી સખત લોહીવા હોતનો,તે ઈસુણે પાછાલ આવીને તીયાણે નુગડાણે કોરને અટકી ;

²¹કેહે કા તીયે પોતાણે મનમાં વિચાર્ય કા,જો હાય માત્ર તીયાણે નુગડાણે અટકીહી તે હાય હારી હોઈ જાહાય "

²²તીયા ઈસુએ પાછાલ ફીરીને તથા તીયીણે હેદીને કયઅ કા,"દીકરી,હિંમત રાખ,તોરે વિશ્વાસે તુને હારી કરી હા,ને તે સ્ત્રી તેજ ઘડીયે હારી હોવી.²³પૂઠી જીયા ઈસુએ તે અધિકારીણે ખરમાં વાંસળી વાગાડનારાહાય તથા લોકોણે કકળાટ કરતાં હેજે

²⁴તીયા તીણાહાય કયઅ કા,"ઈનથી જાતારયા ; કેહે કા છોકરી મરી ગોઈ નાથ ફણ હુવતી હા,"ને તીણાહાય ઈસુણે વાતણે મજાકમાં કાઢી.²⁵લોકોણે બાર કાઢયાં પૂઠી,તીયે માય જાયને તીયણે હાય થયરો ;ને તે છોકરી ઊઠી.

²⁶તે વાતણે ચર્ચા આખા દેશમાં ફેલાય ગોઈ.²⁷ઈસુ તીયાથી જાતો હોતનો,તેવામાં બે આંધળાહાય તીયાણે પાછાલ જાઈને બૂમ પાડતા કયઅ કા,"ઓ દાઉદના દીકરા,આમારે પાર દયા કર !"

²⁸ઈસુ ઘરમાં આવો,તીયા તે આંધળા તીયાણે પાહે આવા ઈસુએ તીણાહાય કયઅ કા,હાય ઈ કરી હકતો હામ હેવો તુમાહાય વિશ્વાસ હા.તીણાહાય તીયાણે કયઅ કા,હા પ્રભુ."²⁹તીયા ઈસુ તીણાહાય આંખોણે અટકીને કયઅ કા,"તુમારે વિશ્વાસ પ્રમાણે તુમાહાય હોવે "

³⁰તેજ સમયે તીણાહાય આંખો ઉગડી ગોઈ.પૂઠી ઈસુયે તીણાહાય કડક આજ્ઞા આપીને કયઅ કા,જોજે,કોઈ ઈયા વિષે જાણો ની."

³¹ફણ તીણાહાય બાર જાઈને આખા દેશમાં તીયાણે કીર્તિ ફેલાવી.³²તેઓ બાર ગયા તીયા હેદા,દુષ્ટાત્મા વીલગીના એક ગુગા માણસને લોકો તીયાણે પાહી નાવે.

³³દુષ્ટાત્મા કાઢવામાં આવો તીયા તો મૂગો માણસ બોન્ને અને લોકોહેય આશ્ચર્ય પામીને કય કા,ઇઝરયેલમાં હેવ કદી હેદવામાં આવ નાથ !"

³⁴ફણ ફરોશીઓએ કયઅ કા,તો દુષ્ટાત્માઓણા સરદારથી જ દુષ્ટાત્માઓણે કાડતો હા. "³⁵ઈસુ તીણાહાય સભાસ્થાનોમા બોધ કરતાં,રાજ્યણે સુવાર્તા પ્રગટ કરતાં,દરેક પ્રકારના રોગ તથા દરેક પ્રકારની બીમારી મટાડતા ;બધા જ નગરોમાં તથા ગામોમાં ફીરતો ગો.

³⁶લોકાહાય હેદીને તીયાણે પાર દયા આવી,કેહે કા તી પાળક વગરને ઘેટાંહાય જેવે હેરાન તથા નિરાધાર હોતને. ³⁷તીયા ઈસુ પોતાણે શિષ્યોહોય કય કા,ફસલ પુષ્કળ હા ખરી,ફણ મજૂરો થોડા હા.

³⁸ઈયા માટે તુમે ફસલણે માલિકણે પ્રાર્થના કરા કા,તે પોતાણે ફસલને માટે મજૂરો મોકને .

Chapter 10

¹પૂઠી ઈસુયે પોતાણા બાર શિષ્યોહોય પાહી હાદીને અશુદ્ધ આત્માઓણે કાઢવાણો,ને ઘણાં પ્રકારના મંદવાડ ને ઘણા જાતણો રોગ મટાડવાણો અધિકાર તીણાહાય આપ્યો.²અને બાર પ્રેરિતોહાય નામ એ હા પેલો જે પિતર કવાતો હા,ને તીયાણે ભાહાવ આન્દ્રિયા; ઝબદીણે દીકરો યાકુબ,તથા તીયાણે ભાહાવ યોહાન ;

³ફિલીપ ને બર્થોલ્મી ;થોમા ને માથ્થી દાણી ;અલ્ફીનો દીકરો યાકુબ ને થદી;

⁴સિમોન જો ઘણો ઝનુની માણહુ હોતનો ને યહૂદા ઇશ્કરિયોત,જે ઈસુણે પરસ્વાધીન કરવાણો હોતનો.⁵ઈસુએ તે બાર શિષ્યોહોય મોકનીને એવી આજ્ઞા આપી કા,"તુમે વિદેશીઓને માર્ગ નખે જાતા ને સમરૂનીઓણે કોઈ નગરમાં જાવણ ની.

⁶ફણ તીયા કરતાં ઈઝરાયેલણા ઘરના ખોવાયને ઘેટાંહાય પાહી જાયા ;

⁷તુમે જાતા જાતા એહે પ્રગટ કરા કા,"સ્વર્ગણે રાજ્ય પાહી આવ હા."⁸માંદાહાય હારો કરા, મરીનાહાય જીવતે કરા,કોઢીયા માણહાય હારે કરા,ને દુષ્ટાત્માહાય કાઢા.તુમે મફત પામ્યે હા,મફત આપા.

⁹હન,ચાંદી કા પિત્તળ તુમારે કમરબંધમાં નખે રાખતા ;

¹⁰મુસાફરી હારૂ થેલો,બે આગીથે,ચંપાલે,નાકડી ફણ નખે નેતા ;કેહે કા મજુર પોતાણા પોષણને યોગ્ય હા.¹¹જીયા જીયા નગરમાં કા ગામમાં તુમે જાહાં,તીયામાં યોગ્ય કાંણા હા તીયાણે તાયહા કરા,તીયેથી નીકલતા હુદી તીયાણે તીયે રયા.

¹²ઘરમાં જાઈને તીણાહાય સલામ કયા.

¹³જો તી ઘર યોગ્ય હોય તે તુમારે શાંતિ તીયા પાર રય ;ફણ જો તી ઘર યોગ્યની હોય તો તુમારે શાંતિ તુમારે ઉપાર પાછી આવી.¹⁴જી કોઈ તુમારે આવકાર ની કરે ને તુમારે વાતો ની ઉનાય તો તીયા ઘરમાંથી અથવા તીયા નગરમાંથી નીકલતા તુમે તીણી ધૂળ તમારે પગ પારથી ખેખરી નાખા.

¹⁵હાય તુમાહાય હાયુંજ કતો હામ કા,ન્યાય સમયે દિહી સાદોમ ને ગમોરા દેશણા હાલ તીયા નગર કરતાં હેલ હોવી.¹⁶હેદા,વરુઓમાં ઘેટાણે જેવા હાય તુમાહાય મોકીનતો હામ ;તીયા તુમે સાપણે કાણી હોશિયાર ને કબૂતરણે કાણી સાલસ બનાહા.

¹⁷તુમે માણાહાથી સાવધાન રયા ;કેહે કા તી તુમાહાય ન્યાયસભાને હપી,ને તીણાહાય સભાસ્થાનોમાં તુમાહાય કોરડા મારી.

¹⁸તીણાહાય ને બિનયહૂદીઓણે માટે સાક્ષીણે અર્થે મારે નેદે તુમાહાય અધિકારીઓણે ને રાજાઓણે આગાલ નેઈ જવાય.¹⁹ફણ જીયા તે તુમાહાય હોપી તીયા તુમે ચિંતા ની કરા કા કાણી રીતે અથવા કાજા બોનીહી ; કેહે કા કાજા બોનવ તી તેજ ઘડીએ તુમાહાય આપીહી.

²⁰કેહે કા જી બોનત હા,તી તુમે નાથ ફણ બાપણો આત્મા તુમારેમાં રયને બોનતો હા.²¹ભાહાવ ભાહાવણે ને બાપ બાળકને મારી નાખવાણે હોપી દેય ને બાળકો મા-બાપણે હામે ઊઠીને તીણાહાય મારી નાખાવી.

²²મારે નામણે નેદે બધે તુમારે વિરુદ્ધ કરી,ફણ જી કોઈ છેન્ને હુદી ટકી તીજ તારણ પામી.

²³જીયા તી તુમાહાય એક નગરમાં સતાવણી કરી તીયા તુમે બીજામાં નાહી જાયા,કેહે કા તુમાહાય હાયુંજ કતો હામ કા માણાહાણે દીકરોહો આવી તીયે હુદી ઈઝરાયેલનાં બધાં નગરોમાં તુમે ફીરી ની વલાહા.²⁴શિષ્ય ગુરુ કરતાં મોટો નાથ ને નોકાર પોતાણે શેઠ કરતાં મોટો નાથ.

²⁵શિષ્ય પોતાણે ગુરુ જેવો ને નોકાર પોતાણે શેઠ જેવો હોય તો તે જ ખણ હા.ખરણા માલીકણે તીણાહાય બાલઝબૂલ કયો હા,તો તીયણે ઘરના માણાહાય કતર વિશેષ કરીને તીણાહાય એહેજ કય ;²⁶તીયા માટે તીણાહાય તુમે ઘાબરાતે નખા, કેહે કા ઉગાડ ની કરાય હેવ કાંઈ ઢાંકીન નાથ,ને પ્રગટ ની હોવે એવ કાય ગુપ્ત નાથ.

²⁷હાય તુમાહાય આંધારામા જી કતો કામ તી ઉજાલામાં કહય, તુમે કાનેહે જી ઉનાહા તી ઘાબા ઉપારથી પ્રગટ કરાહા.²⁸શરીરને જી મારી નાખત હા,ફણ આત્માણે મારી નાખી હકતે નાથ,તીયાથી બીતે નખા.ફણ તીયાણે કરતાં આત્મા ને શરીર હીયા બેણો નાશ કરી હકત હા.તીયાથી ઘાબરાયા.

²⁹કેહે ચકલીઓ બે પયહે વેચાતી કાયની ? ;તોયે ફણ તુમારે બાપણે ઈચ્છા વગાર તીયામાંથી એક ફણ જમીન પાર પડવાણી નાથ.

³⁰તુમારે માથાણે બધે નિબાલે ફણ ગણીને હા.

³¹૩૧.તીયા હારુ ઘાબરાતે નખા ;ઘણી ચકલીઓ કરતાં તુમે મૂલ્યવાન હા.³²માટે માણાહાય આગાલ જી કોઈ માને કબૂલ કરી,તીયાણે હાય ફણ મારે સ્વર્ગમાંણા બાપણે આગાલ કબૂલ કરીહી ;

³³ફણ માણાહાય આગાલ જી કોઈ મારે ઇનકાર કરી,તીયાણે હાય ફણ મારે સ્વર્ગમાણે બાપણે આગાલ ઇનકાર કરીહી.³⁴એહે ની ધારા કા હાય પૃથ્વી પાર શાંતિ નાવણે આવો હામ ;શાંતિ તો ની ફણ તલવાર નેઈને આવો હામ.

³⁵કેહે કા પુત્રણે તીયાણે બાપણે વિરુદ્ધ,દીકરી તીયાણે માણે વિરુદ્ધ ને પુત્રવધુણે તીયાણે સાસુણે વિરુદ્ધ કરાવણે હાય આવો હામ.

³⁶માણાહાણે દુશ્મન તીયાણે ઘરમાણોજ હોવી.³⁷મારે કરતાં જી પોતાણી માં અથવા પોતાણે બાપ પાર વધારે પ્રેમ કરત હા તી મારે યોગ્ય નાથ ;ને દીકરા કે દીકરી પાર જે મારે કરતાં વધારે પ્રેમ કરત હા તી ફણ મારે યોગ્ય નાથ.

³⁸જી પોતાણે વધસ્તંભ ઊંચકીને મારે પાછાલ આવત નાથ તી મારે યોગ્ય નાથ.

³⁹જી પોતાણે જીવન બચાવત હા તી તીયાણે ખોઈ,મારે નેદે જી પોતાણે જીવન ગુમાવત હા તી તીયાણે બચાવી.⁴⁰જી તુમારે આવકાર કરત હા તી મારે આવકાર કરત હા,તે મારે મોકીનનારણો ફણ આવકાર કરત હા.

⁴¹જી કોઈ માણુડુ પ્રબોધકણો આવકાર કરત હા,કેહે કા તો પ્રબોધક હા,તો પ્રબોધકણે બદલો પામી ;ને જે કોઈ વ્યક્તિ ન્યાયીણે આવકાર કરતો હા,કેહે કા તો ન્યાયી હા,તો ન્યાયીણે બદલો પામી.⁴²હાય તુમાહાય હાયુંજ કતો હામ કા શિષ્યણે નામમાં જી કોઈ ઈયા નાનામાંનાં એકણે માત્ર ઠંડા પાણીનો પ્યાલો પીણે આપી તો તીયાણે બદલો પામ્યા વગાર રચજ ની."

Chapter 11

¹ઈસુ પોતાણા બાર શિષ્યોણે આજ્ઞા આપી રહ્યો,તીયા એહે હોવ કા હીખીવણે ને ઉપદેશ આપણે તો તીયાથી તીણાહાય નગરોમાં ગો.

²હવે યોહાને જેલમાં ખ્રિસ્તણે કામો સબંધી ઉનાયને પોતાણે શિષ્યોણે મોકનીને, તીણાહાય પુછાવ્ય કા,

³"જે આવવાણો હા તો તુજ હા કા,આમે બીજાણે વાટ હેહજે ?"⁴તીયા ઈસુએ જવાબ આપતા તીણાહાય કય કા,"તુમે જી જી ઉનાતે હા ને હેતતે હા,તી જાયને યોહાનને કયી દેખાડા.

⁵આંધળે દેખતે હોવ હા,લગંડા યાનતે હોવે હા,સ્કતપિતણા રોગીઓ શુદ્ધ કરાઈ હા,બહેરે ઉનાતે હોવે હા,મરણ પામીને જીવતે હોવે હા,ને ગરીબોહોય સુવાર્તા પ્રગટ કરાય હા.

⁶જી કોઈ મારે સંબંધી ઠોકર જી ખાય તિયાણે ધન્ય હા .⁷જીયા તે જાતાના તીયા ઈસુ યોહાન સબંધી માણાહાય કણે નાગો કા,"તુમે રાનમાં, કાજા હેદણે નીકલીના ?"કાજા વાયરાથી હાનતા બરને ?

⁸ફણ તુમે કાજા હેદણે નીકલા હા ?કાજા મુલાયમ વસ્ત્ર પેરીના માણસણે કેદા, જિણા હાય જીણા વસ્ત્રો પેરીને હા તી તે રાજમહેલોમાં હા.⁹તો તુમે કાજા હેદણે નીકીલ્લે ? કાજા પ્રબોધકણે ? હાય તુમાહાય કતો હામ કા પ્રબોધ કરતા જો ઘણાં અધિક હા તીયાણે,

¹⁰જીયા સબંધી એહે નખીન હા કા,જો,હાય મારે સંદેશવાહકણે તોરે આગાલ મોકીનતો હામ,તો તોરે આગાલ તોરે માર્ગ તીયાર કરી."¹¹હાય તુમાહાય હાયજ કતો હામ કા,જતરે સ્ત્રીઓથી જન્મયે હા,તીયામાં યોહાન બાપ્તિસ્મા કઅનાર કરતાં કોઈ મોટો ઉત્પન્ન હોવો નાથ,તોયે ફણ સ્વર્ગણા રાજ્યમા જો બદાહાથી નાનો હા તો ફણ તીયા કરતાં મોટો હા.

¹²યોહાન બાપ્તિસ્મા કરનારનાં સમયથી તે અમુ હુદી સ્વર્ગણા રાજ્ય પાર બળજબરી હોતી હા,ને બળજબરી કરનારો તીયાણે છીનવી નેતો હા.¹³કેહે કા બધાં પ્રબોધકોઓ ને નિયમશાસ્ત્ર યોહાન હુદી પ્રબોધ કદો હા.

¹⁴જો તુમારે માનવ હોયને એલિયા જો આવવાણો હોતનો તો ઓજ હા.

¹⁵જીયાણે ઉનાવાણે કાન હોય તી ઉનાય.¹⁶ફણ ઈયા પેઢીણે હાય કેવા હારી હરખાવ ? તે બાળકો જેવી હા કા,તે બજારમાં બેહીને પોતાણા દોસતારોણે બૂમ પાડીને કતાં હા કા,

¹⁷આમાહાય તુમારે આગાલ વાહાલી વગાડી,ફણ તુમે નાચ્યા કાઈની;આમે શોક કરતાના,ફણ તુમે રડ્યા કાઈની."¹⁸કેહે કા યોહાન ખાતો પીતો નાથ આવો,ને તે કતાં હા કા ;તીયાણે દુષ્ટાત્મા વીલગીયો હા ;

¹⁹માણાહાય દીકરો ખાતો પીતો આવો,તે તુમે કતાં હા કા,ખાઉધરો ને દારૂબાજ માણહું,દાણીઓ ને પાપીઓણે દોસ્તાર ;ફણ જ્ઞાન પોતાણા કર્યોથી યથાર્થ ઠરતો હા."²⁰તીયા જીયા નગરોમાં તીયાણે પરાક્રમી કામો ઘણે હોવે હોવને તીણાહાય પસ્તાવો કાયની કદો માટે તે તિયા પાર વાક કાઢણે લાગે કા .

²¹ઓ ખોરાજીન,તુને હાય! ઓ બેથસાઇદા તુને હાય ! કેહેકા જે તોરેમાં પરાક્રમી કામો હોવા ને હેદ તુર તથા સીદોનમાં હોવા હોત તો તીણાહાય ટાટ તથા રાખમાં બેહીને કીયારનો પસ્તાવો કયો હોય.

²²વળી હાય તુમાહાય કતો હામ કા ન્યાયકાળે તુર તથા સીદોનને તુમારે કરતાં સહેલ હોવી.²³ઓ કપરનાહુમ,તું સ્વર્ગ હુદી ઉંચ કરાય શું ? તુને પાતાળ હુદી નીચે કરી નાખાય; કેહે કા જે પરાક્રમી કામો તોરેમાં હોવા તે જો સાદોમમાં હોવા હોત,તો તી આજે હુદી રઅત.

²⁴વળી હાય તુમાહાય કતો હામ કા ન્યાયકાળે સદોમ દેશણે તોરે કરતાં હેલ હોવી."²⁵તીયે વેળા ઈસુએ કય કા,"ઓ બાપ,આકાશ ને પૃથ્વીણા પ્રભુ,હાય તોરે સ્તુતિ કરતો હામ,કેહેકા જ્ઞાનીઓણો તથા તર્કશાત્રીઓથી તુમાહાય હે વાતો ગુપ્ત રાખી તથા બાળકોહોય આગાલ પ્રગટ કરી હા.

²⁶હા,બાપ,કેહેકા તુમાહાય તી હાર નાગ.

²⁷મારે બાપએ મને બધ હોપ્ય હા,બાપ વગાર દીકરાણે કોઈ જાણત કાંઈ નાથ,ને દીકરા વગાર બાપણે કોઈ જાણત નાથ ને જીયાણે દીકરો પ્રગટ કરને માગે તીયાણેજ બાપ જાણતે હા.²⁸ઓ વૈતરું કરનારે તથા ભારથી લદાયને તુમે બધ મારે પાહે આવા,ને હાય તુમાહાય વિસામો આપીહી.

²⁹મારે ઝુંસરી તુમે પોતા પાર નેયા,ને મારે પાંહેથી હીખા,કેહેકા હાય મનમાં નમ્ર તથા દીન હામ,તુમે તુમારે જીવમાં વિસામો પામાં.

³⁰કેહેકા મારે ઝુંસરી હેલી ને મારે બોજો હલકો હા."

Chapter 12

¹તીયે વેળાયે ઈસુ વિશ્રામવારણે દીહે અનાજણે ખેતાહામા રચને જાતનો,તીયા તીયાણે શિષ્યોહોય ભૂખ નાગી,ને કણેહે છૂટણે તથા ખાણે લાગા.

²ફરોશીઓએ તી હેદીને ઈસુણે કય કા,"આરામણે જી કરવ ઉચિત નાથ તી તોરે શિષ્યો કરતાં હા."³ફણ ઈસુએ તીણાહાય કય કા,"જીયા દાઉદ તથા તીયાણે હારીણા ભૂખ્યા હોવના,તીયા તીણાહાય જી કયર તી કેહે તુમાહાય વાંચ્યં નાથ ?

⁴તીયે દેવણા ઘરમાં પેહીન અર્પણ કદની રોટની,જે તીયાણે તથા તીયાણે હારીણાહાય ખાવાણી ઉચિત નાથ હોતની,ફણ એખના યાજકોણે ઉચિત હોતની તે તીયે ખાધી.⁵અથવા કેહે નિયમશાસ્ત્રમાં તુમાહાય હી વાચ્ય કા,વિશ્રામવારણે દિહી ભક્તિસ્થાનમાં યાજકોહોય વિશ્રામવારણે દિહી અપવિત્ર કર્યા છતાં ફણ નિર્દોષ હા ?

⁶ફણ હાય તુમાહાય કતો હામ કા ભક્તિસ્થાન કરતાં ઈયે એક મોટો હા.⁷વલી બલિદાન કરતાં હાય દયા ચાહતો હામ ;ઈયાણે અર્થ તુમે જાણતે હોય,તીયા નિર્દોષણે તુમે દોષિત ની ઠરાવાત.

⁸કેહે કા માણાહાણે દીકરો વિશ્રામવારનો પ્રભુ હા."⁹ઈસુ તીયેથી નીકલીને તીયાણે સભાસ્થાનમાં આવો.

¹⁰૧૦.તીયા હેદા,તીયે એક માણું હોતનો,જીયાણે હાથ હુકાઈ ગનો હોતનો ઈસુ પાર દોષ મુકણે હાર ફરોશીઓએ તીયાણે પૂછય કા,"કેહે વિશ્રામવારે હાર કરવાણે ઉચિત હા ?"¹¹તીયા તીયે તીયાણા હાય કય કા,"તુમારેમાં કાણો માણસ એવો હા કા,જીયાણે એક ઘેટ હોય,ને વિશ્રામવારે જ તી ખાડામાં પડે તે તીયાણે થરીને બાર ની કાઢે ?

¹²તો માણું ઘેટા કરતાં કતરો મૂલ્યવાન હા ? હીયા હારુ વિશ્રામવારે હાર કરવ ઉચિત હા."¹³તીયા હલા માણાહાણે ઈસુએ કય કા,તોરે હાથ લાંબો કર."તીયે તો લાંબો કદો તરાત તીયાણે હાથ બીજા હાથણે જેવો હારો હોવો.

¹⁴તીયા ફરોશીઓએ નીકલીને તીયાણે મારી નાખવાણે હારુ તીયાણે વિરુદ્ધ મસલત કરી.¹⁵ફણ ઈસુએ હી જાણીને તીયેથી નીકલી ગો.ઘણે માણેહે તીયાણે પાછાલ ગયે.ને તીયે બધાહાય હારે કયરે.

¹⁶તીણાહાય કઠાણ આજ્ઞા આપી કા,'તુમારે માને જાહેર કરવાણો ની ;

¹⁷ઈયા માટે કા પ્રબોધક યશાયાએ જી કય હોતને તી પૂર હોવે કા,¹⁸હેદ,મારે સેવક,જીયાણે મયે પસંદ કદો ;મારે પ્રિય,જીયા પાહાય મારે જીવ પ્રસન્ન હા,તીયા પાહાય હાય મારે આત્મા મુકીહી,ને તો બધીજ જાતિહીય ન્યાયચુકાદો પ્રગટ કરી.¹⁹તો ઝગડો ની કરે,બૂમ ની પાડે ;તીયાણે વાણી રસ્તાઓમાં કોઈની ઉનાઈ

²⁰જીયે હુદી ન્યાયચુકાદાણે જયમાં ની પુગાડે,તીયા હુદી છુદીન બરુ ભાગી ની નાખાય,ધૂંઆતુ શણ ફણ તી ની ઉનવાય.

²¹બધેજ દેશણે માણેહે તીયાણે નામ પાહાય આજ્ઞા રાખી."²²તીયા દુષ્ટાત્મા વીલગીનાણે કોઈ આડલો ને મૂગો માણાહાને તે તીયાણે પાહે નાવા ;તીયે તીયાણે હારો કદો,એટલે જો આડલો ને મૂગો હોતનો તો બોનણે ને હેદણે નાગો.

²³બદે માણહે આશ્ચર્ય પામીને કય કા,"કા ઓ દાઉદણે દીકરો હોઈ શકે ?"²⁴ફણ ફરોશીહીય તી ઉનાયને કય કા,"ભુતોહોય સરદાર બાલઝબુલણે મદદથી જ તો ભુતોહોય કાઢતો નાય ,"

²⁵તીયા ઈસુએ તીયાણે વિચાર જાણીને તીણાહાય કય કા,"બધાં જ રાજ્ય જે ભાગલા પડે,તે તૂટી પડતા હા ;બધાજ નગર અથવા ઘર જો પડે,તે સ્થિર ની રચ.

²⁶જો શેતાન શેતાનણે કાઢે તો તી પોતે પોતાણે હામે હોવો ;તો પૂઠી તીયાણે રાજ્ય કાણી રીતે સ્થિર રચ ?

²⁷જો હાય બાલઝબુલણે મદદથી ભુતાહાય કાઢતો હામ,તો તુમારે માણહે કીડાણે કાઢતો હા ? માટે તી તુમારે ન્યાયધીશો બની.²⁸ફણ જો હાય ઈશ્વરણે આત્માથી ભુતાહાય કાઢતો હામ,તીયા ઈશ્વરને રાજ્ય તુમારે પાહાય આવ હા એહે હમજા.

²⁹વલી બલવાનને ઘરમાં જાઈને તે બલવાનને પેલો બાંદજા વગાર તીયાણે સામાન કોઈથી કેહ લૂંટાય ? ફણ તીયાણે બાંદજા પૂઠી તો તીયાણે ઘર લૂંટી નેઈ.

³⁰જો મારે પક્ષણો નાથ તો મારે વિરુદ્ધ હા,જો મારે હારી એકઠ નાથ કરતો તો વિખેરી નાખતો હા.³¹ઈયા માટે હાય તુમાહાય કતો હામ કા,બદાજ પાપ ને દુર્ભાષણ માણાહાય માફ કરાય ;ફણ પવિત્ર આત્માણે વિરુદ્ધ જો દુર્ભાષણ કરી તીયા માણાહાણે માફ ની કરાય.

³²માણાહાણે દીકરાણે વિરુદ્ધ જી કોઈ કાંઈ કય,તી તીયાણે માફ કરાય ; ફણ પવિત્ર આત્માણે વિરુદ્ધ જી કોઈ કાંઈ કય,તી તીયાણે માફ ની કરાય ;ઈયા યુગમાં ફણ ની ,ને આવનાર યુગમાં ફણ ની³³ઝાડવ હાર ને તીયાણે ફળ હાર હોવી.અથવા ઝાડ ખરાબ ને તીયાણે ફળ ખરાબ હોવી ;કેહે કા ઝાડવ ફળથી ઓલખાત હા.

³⁴ઓ હાપણે વંશ,તુમે દુષ્ટ છતાં હારી વાત તુમારેથી કાણી રીતે કય હકાય ? કેહે કા મનનાં ભરપૂરીપણાંમાંથી મુ બોનત હા.

³⁵હાર માણહુ મનના હારા ભંડારમાંથી હાર કાઢત હા,ખરાબ માણહુ મનનો ખરાબ ભંડારમાંથી ખરાબ કાઢત હા.³⁶વલી હાય તુમાહાય કતો હામ કા,માણહે જી બદી નકામી વાત બોની તીયા સબંધી ન્યાયકાળે તીણાહાય જવાબ આપવા પડી.

³⁷કેહે કા તોરે વાતોથી તું ન્યાયી ઠરાવાય;ને તોરે વાતોથી અન્યાયી ઠરાવાય."³⁸તીયા કંતરાક શાસ્ત્રીઓહી ને ફરોશીઓહી તીયાણે જવાબ આપતા કય કા,"ઓ ઉપદેશક,આમે તોરે પાહાયથી ચમત્કારિક ચિન્હ હેદણે માગતે હામ."

³⁹ફણ ઈસુએ જવાબ આપતા તીણાહાય કય કા,"દુષ્ટ ને પેઢી વ્યાભીયારી ચમત્કારિક ચિન્હ માગતે હા,ફણ યુના પ્રબોધકણે ચમત્કારિક ચિન્હ સિવાય કોઈ ચમત્કારિક ચિન્હ તીયાણે આપાય ની.

⁴⁰કેહે કા જેહ યુના તીન રાતદિહી મોટી માછનીણે બોકામાં રહ્યો ,તેહે માણહાણે દીકરો ફણ તીન રાતદિહી પૃથ્વીણે પેટાળમાં રઈ.⁴¹ન્યાયકાળે નિનવેહણા માણસ ઈયા પેઢી હારી ઊઠીને ઉભા રઈ ને તીણાહાય અપરાધી ઠરાવાય;કેહે કા યુનાણે ઉપદેશ ઉનાયને તીણાહાય પસ્તાવો કયરો,ફણ હેદા યુના કરતાં ઈયે એક મોટો હા.⁴²દક્ષિણની રાણી ઈયા પેઢીહારી ન્યાયકાળે ઊઠીને તીણાહાય અપરાધી ઠરાવી ;કેહે કા પૃથ્વીણે છેડેથી સુલેમાનણે જ્ઞાન ઉનાણે તે આવી ;ને હેદા ઈયે જે હા તે સુલેમાન કરતાં મહાન હા.⁴³જીયા અશુદ્ધ આત્મા માણહામાંથી નીકલતો હા તીયા તે ઉજાડ જગામાં રવાણો હેદતો ફીરીતો હા,ફણ નાથ પામતો.

⁴⁴તીયા તો કતો હા કા,જીયા ઘરમાંથી હાય નીકીલો તીયામાં જ હાય પાછો જાહાય ;ને આવીને હેદાહા તીયા તી ઘર વાલીન ખાલી તથા શોભાયમાન કરીન હોત હા.

⁴⁵પૂઠી તો જાયને પોતા કરતાં ઘણાં દુષ્ટ હેવા સાત દુષ્ટાત્માહાય પોતાણે હારી નાવતો હા,ને તે તીયામાં ઓરાયને તીયે સ્તાં હા,તીયા તે માણહાણે છેત્રી અવસ્થા પેલાણે કરતાં વધારે ખરાબ હોતી હા,તેહે ઈયા દુષ્ટ પેઢીણે ફણ હોઈ."⁴⁶ઈસુ લોકોણે આજુ વાત કતો નો અતરામાં હેદા,તીયાણે મા તથા તીયાણે ભાહાવ બાયરે આવીને ઊભા હોતના,ને તીયણે હારી વાત કરને માંગતાના ;

⁴⁷તીયા કોયએ તીયાણે કય કા,"હેદા,તોરે મા તથા તોરે ભાહાવ બાયરે ઊભા હા,તે તોરે હારી વાત કરને માગતે હા,"⁴⁸ફણ હલા કચનારાણે તીયે જવાબ આપતા કય કા,"મારે મા કીડ હા ?ને મારે ભાહાવ કીડ હા ?

⁴⁹તીયે પોતાણે શિષ્યોણી તરફ પોતાણે હાથ લાંબો કરીને કય કા,"હેદા મારે મા તથા મારે ભાહાવ !

⁵⁰કેહે કા મારે સ્વર્ગમાંણે બાપણે ઈચ્છા પ્રમાણે જી કોઈ કરે,તી જ મારો ભાહાવ,બેન તથા મા હા."

Chapter 13

¹તીયે જ દિહી ઈસુ ઘરમાંથી નીકલીને સમુદ્રાણે કિનારે બેઠો.

²વદારેમાં વદારે માણાહે તીયાણે પાહાય એકઠે હોવે ,એટલે તો હોડી પાર ચઢીને બેઠો ;ને બદે માણાહે કિનારે ઉભે રયે.³ઈસુએ ઉદાહરણમાં તીણાહાય ઘણી વાત કતાં કય કા,"હેદા,વાવનારો વાવણે બાયરે ગો.

⁴તો વાવતો હોતનો તીયા કતરેક બીવડ વાટણે કિનારે પાયળે ;એટલે ચીડે આવીને તી ખાય ગયે.

⁵કતરેક પથરાવાલી ભૂય પાર પયળે,જીય ઘણ માટડ કાયની હોતન ;તીયે માટડાણે ઉડાણ કાઈની હોતન માટે તી વેલે ઉગી નીકીલયે.

⁶ફણ જીયા સૂર્ય ઉગો તીયા તી ચીમલાય ગયે,તીયાણે મૂલની હોવાથી તી હુખાય ગયે.⁷કતરેક કાટાહાય ઝાડવામાં પયળે ; કાંટાણે ઝાડવાહાય વધીને તીયાણે દાબી નાખય.

⁸બીજે હારી ભૂય પાર પયળે ,તીણાહાય ફળ આપયે ;કતરેક સોગણાં, કતરેક સાંઠગણાં ને કતરેક ત્રીસગણાં.

⁹જીયાણે ઉનાવાણે કાન હા તી ઉનાય."¹⁰પૂઠી શિષ્યોહોય પાહાય આવીને તીયાણે કય કા. "તુ તીણે હારી ઉદાહરણમાં કાજા ખનને બોનતો હા?"

¹¹તીયા ઈસુયે તીણાહાય જવાબ આપતા કય કા," સ્વર્ગાણે રાજ્યણા મમો જાણવાણે તુમાહાય આપીન હા,ફણ તીણાહાય આપીન નાથ.

¹²કેહે કા જીયાણે પાહાય હમાજ હા તેયાણે આપાય,ને તીયા પાહાય પુષ્કળ હોવી ;ફણ જીયા પાહાય હમાજ નાથ તીયા પાહાય જી હા,તી ફણ તીયા પાહાયથી નેઈ નેવાય.¹³ઈયા માટે હાય તીણાહાય ઉદાહરણમાં બોનતો હામ,કેહે કા હેદતા છતાં હેદતા નાથ,ઉનાતા છતાં ઉનાતા નાથ,ને હમજીતા ફણ નાથ.

¹⁴યશાયાણે ભવિષ્યવાણી તીણે સબંધમાં પુરી હોવી હા,જી કતો હા કા,'તુમે ઉનાતા ઉનાહા,ફણ હમજાહા ની ;ને હેદતા હેદહા,ફણ તુમા હાય હુજી ની.¹⁵કેહે કા હી માણાહાય મન જડ હોય ગયે હા,તીણાહાય કાન બેર મારી ગયા હા,તીણાહાય પોતાણે ડોલા બંધ રાખયા હા,એવ ની હોય કા,તીણાહાય ડોલહે દેખાય,તીણાહાય કાને ઉનાયા,મનથી હમજે,પસ્તાવો કરે ને હાય તીણાહાય હાર કર."¹⁶ફણ તુમારે આંખો ધન્ય હા,કેહ કા તી હેદતી હા ;ને તુમારે કાનો ધન્ય હા,કેહે કા તે ઉનાતા હા.

¹⁷હાય તુમા હાય હાયુજ કતો હામ કા,તુમે જી જી હેદતે હા તી ઘણા પ્રબોધકો હોય ને ન્યાયીઓહોય હેદણે માગ્ય,ફણ હેદજ કાઈની ;તુમે જી જી ઉનાતે હા તી ઉનાણે માગ્ય,ફણ ઉનાય ની.¹⁸હવે વાવનારાણે ઉદાહરણ ઉનાયા.

¹⁹.જીયા રાજ્યણે વચન કોઈ ઉનાત હા,ફણ હમીજત નાથ,તીયા શેતાન આવીને તીણે મનમાં જી વાવીન તી છીનવી નેઈ જાતો હા,સ્તાણે કોરે જી બીવડ વાવીન તી ઈજ હા.²⁰.પથરાવાલી ભૂય પાર જી બીવડ વાવીન તી ઈજ હા કા,તી વચન ઉનાયને તરાતું જ હર્ષથી તીયાણે માની નેત હા ;

²¹.તો ફણ તીયાણે પોતાણે મૂલ ની હોવાથી તી થોડીજ વાર ટકત હા,જ્યા વચનને નેદે વિપત્તી અથવા સતાવણી આવતી હા,તીયા તરત તી પાછ પડી જાત.²².કાંટાણે જાલામાં જી બીવડ વાવીન તી ઈજ હા કા,તી વચન ઉનાત હા,ફણ ઈયા ભૌતિક જગતણે ચિંતા ને દ્રવ્યણે માયા વચનણે દાબાવી નાખત હા,ને તી નિષ્કળ હોઈ જાત હા.

²³.હારી જમીન પાર જી બીવડ વાવીન તી ઈજ હા કા,તી વચન ઉનાત હા,હમજીત હા,ને તીયાણે નિશ્ચે ફળ નાગત હા,એટલે કોઈણે સોગણાં,કોઈણે સાઠગણાં,ને કોઈણે ત્રીસગણા નાગત હા."²⁴.ઈસુએ તીણે આગાલ બીજ ઉદાહરણ આપતા કય કા,"સ્વર્ગાણે રાજ્ય હેવા માણાહાય જેવ હા કા જીયે પોતાણે ખેતામાં હાર બીવડ વાવય.

²⁵.ફણ માણાહે હુવતે હોતને તેવામાં તીયાણે દુશ્મન આવીને ઘઉંમાં કડવા દાણા વાવીને નાહાય ગો.

²⁶.ફણ જીયાર છોડવા ઉગા,તીણે કણાહે આવે,તીયા કડવા દાણા ફણ દેખાયા.²⁷.તીયા તે માલિકણે ચાકરોહોય પાહાય આવીને તીયાણે કય કા,'સાહેબ',તુયે કેહ તોરે ખેતામાં હાર બી વાવય ની હોતન ? તો તીયામાં કડવા દાણા કાંથી આવા ?'

²⁸.તીયે તીણાહાય કય કા,'કોઈ દુશ્મને એહે કયર હા;તીયા ચાકરોહોય તીયાણે કય કા,'તોરે મરજી હોય તીયા આમે જાયને તીયાણે એકઠ કરજે ?"²⁹.ફણ તીયે કય.'ના,એહે ની હોવે કા તુમે કડવા દાણા એકઠા કરતાં ઘઉંણે ફણ તીયા હારી ઉખડાહા.

³⁰.કાપણી હુદી બેવાહાય હારી વધવા દેયા,કાપણીણે સમયમાં હાય કાપનારાહાય કહય કા,"તુમે પેલા કડવા દાણાહાય એકઠા કરા,હલગાવણે હારુ તીયાણે ભારો બાંદા,ફણ ઘઉં મારે વખરમાં ભરા."³¹.ઈસુએ તીણે આગાલ બીજ ઉદાહરણ આપતા કય કા,"સ્વર્ગાણે રાજ્ય રાઈણે બીવડા જેવ હા,જીયાણે એક વ્યક્તિએ નેઈને પોતાણે ખેતામાં વાવય.

³².તી બધાજ બીવડ કરતાં નાન હા,ફણ વદજા પૂઠી છોડવા કરતાં તી મોટ હોત હા,તી એવ ઝાડવ ફણ હોત હા કા આકાશણે પક્ષીહી આવીને તીયાણે ડાલખા પાર રતે હા."³³તીયે તીણાહાય બીજ ઉદાહરણ કય કા,"સ્વર્ગણે રાજ્ય ખમીર જેવ હા કા,જીયાણે એક સ્ત્રીએ નેઈને તીન માપ નોટમાં મેલવી દેદ,એટલે હુદી કા તી બદ ખમીરવાલો હોય ગો."³⁴એ બદી વાત ઈસુએ લોકોહોય ઉદાહરણમાં કય ;ઉદાહરણ વગાર તીયે તીણાહાય કાંઈ કય કાઈની.

³⁵.ઈયા માટે કા પ્રબોધકે જી કયન હોતન તી પૂર હોવે કા,"હાય મારે મુ ઉગાડીને ઉદાહરણમાં કહઈ,સૃષ્ટિણો પાયો નાખ્યાણે વખતથી જી ચૂપ રાખાત હા તી તી હાય પ્રગટ કરહી."³⁶તીયા માણાહાય મૂકીને ઈસુ ઘરમાં ગો ;પૂઠી તીયાણે શિષ્યોહીય તીયાણે પાહાય આવીને કય કા,"ખેતાણે કડવા દાણાણે ઉદાહરણને મતલાબ આમહાય ક."

³⁷તીયા ઈસુએ જવાબ આપતા તીણાહાય કય કા,"હાર બીવડ જી વાવત હા તી માણાહાયે દીખરો હા.

³⁸ખેત દુનિયા હા ;હાર બીવડ રાજ્યને સંતાન હા,ફણ કડવા દાણા શેતાનણે સંતાન હા ;

³⁹જીયે વાવય તો દુશ્મન શેતાન હા,કાપણી જગતણે અંત હા,ને કાપવાવાલો સ્વર્ગદૂત હા.⁴⁰હીયા માટે જેહે કડવા દાણા એકઠા કરાતા હા,ને આગડામાં બાલી નાખાત હા,તેહ ઈયા જગતણે અંત હોવી.

⁴¹માણાહાયે દીકરો પોતાણે સ્વર્ગદૂતોણે મોકની,પાપમાં પાડનારી બધી વસ્તુહીય ને દુષ્ટતા કરનારાહાય તીયાણે રાજ્યમાંથી તી એકઠ કરાય,

⁴²ને તીણાહાય બલતી ભઠ્ઠીમાં નાખી દેય,તીયે રડવાણે દાંત પીહવાણ હોય.

⁴³તીયા ન્યાયીહીય પોતાણે પિતાણે રાજ્યમાં સૂર્યણે જેહ હુજાલ આપી.જીયાણે ઉનાવાણે કાન હા તી ઉનાય.⁴⁴વલી સ્વર્ગણે રાજ્ય ખેતામાં દપાડીને દ્રવ્ય જેવ હા ;કા જે એક માણહાયે મીલય ;પૂઠી તીયે તી દપાડી રાખય,તીયાણે હર્ષણે નેદે જાયને પોતાણે બધજ વેચી નાખીને તી ખેત વેચાત નેદ.

⁴⁵વલી સ્વર્ગણે રાજ્ય હારા મોતી હેદનાર કોઈ એક વેપારીણે જેવ હા.

⁴⁶જીયાર તીયાણે વધારે મૂલ્યવાન મોતી મલીય,તીયા પૂઠી જાયને તીયે પોતાણે બધજ વેચી નાખીને તી નેય નેદ.⁴⁷વલી સ્વર્ગણે રાજ્ય જાલણે જેવ હા, જીયાણે દરિયામાં નાખવામાં આવ,ને બધીજ જાતણે ભતણ તીયામાં હામબરાયા.

⁴⁸જીયા તી ભારાય ગ તીયા તે તીયાણે કાઠે ખેચી નાવા બેહેયને જી હાર હોતન તી તીણાહાય વાહણામાં ભેગ કયર,ફણ કાયની હાર હોતન તી ઉડાડી નાખય.

⁴⁹એહે જ જગતણે અંત ફણ હોવી ;સ્વર્ગદૂત આવીને ન્યાયીહીયમાથી ભૂંડાહાય જુદ પાડી.

⁵⁰ને તે તીણાહાય બલતી ભઠ્ઠીમાં ઉડાડી નાખી ;તીયે રડવાણ ને દાંત પીહવાણ હોવી.⁵¹કેહ તુમે એ બદી વાત હમજીયે? "તીણાહાય ઈસુણે કય કા, "હા ".

⁵²તીયા તીયે તીણાહાય કય કા,"બધેજ શાસ્ત્રી જે સ્વર્ગણા રાજ્યણે શિષ્યો હોવો હા તે એક ઘરમાલિક કા જી પોતાણે ભંડારમાંથી નવી ને જૂની વસ્તુણે કાઢતો હા તીયા જેવો હા."

⁵³તીયા એહે હોવ કા ઈસુએ ઉદાહરણમાં કય ર્યો, તીયા તો તીનથી નાહાય ગો.⁵⁴પૂઠી પોતાણે પ્રદેશમાં આવીને તીયે તેયાણે સભાસ્થાનમાં તીણાહાય એવા બોધ કયરો કા તે આશ્ચર્યચકિત હોયને બોન્યા કા."ઓ માણહાયે પાહાય એવ બુદ્ધિને એવા પરાક્રમી કામ કાંથી?

⁵⁵કેહે ઓ હુથારણે દીકરો નાથ? કેહ ઈયાણે આહાયને નામ મરિયમ નાથ ? કેહ યાકુબ,યુસફ,સિમોનને યહૂદા હિયાણે ભાહાવ નાથ ?

⁵⁶કેહે હિયાણે બધી બેન આપણી હારી નાથ ? તીયા ઈયા માણહાયે પાહાય ઈ બદ કાંથી ?"⁵⁷તીણાહાય તીયાણે સંબંધી ઠોકર ખાધી ફણ ઈસુએ તીણા હાય કય કા,"પ્રબોધક પોતાણે વતનમાં ને પોતાણે ખર સિવાય બીજે ઠેકાણે માન વગારનો નાથ."

⁵⁸ને તિણાહાય અવિશ્વાસણે નેદે તીયા ઘણા પરાક્રમી કામ કયરે કાય ની.

Chapter 14

¹તીયા સમયે ગાલીલણા રાજકર્તા હેરોદે ઈસુણે કીર્તિ ઉનાય.

²પોતાણા ચાકરોહોય કય કા, "ઓ તે યોહાન બાપ્તિસ્મા કરનારો હા;તે મરણમાંથી જીવતો હોવા હા, ઈયા હારુ એવે પરાક્રમી કામો તીયાથી હોતે હા." ³કેહે કા હેરોદ તીયણે ભાઈ ફિલીપણે પત્ની હેરોદિયાણે નેદે યોહાનને થયરો હોતનો અને તીયાણે બાંધીને જેલમાં નાંખી નો હોતનો.

⁴કેહે કા યોહાને તીયાણે કય ન કા, "તીઈણે તોરે પત્ની તરીકે રાખવી યોગ્ય નાથ."

⁵હેરોદે તીયાણે મારી નાખવાણે ઈચ્છતોનો,ફણ માણાહાથી તો બીતો નો,કેહેકા તેઓ તીયાણે પ્રબોધક માનતા ના. ⁶ફણ હેરોદણે વર્ષગાંઠ આવી,તીયા હેરોદિયાણે દીકરીએ તીયાણે આગાલ નાચીને હેરોદણે ખુશ કદો.

⁷તીયા તીયે સમ ખાઈને વચન આપીન કા જી કાંઈ તે માગી તી તીયેણે આપીહી. ⁸તીયા તીયાણે માનીની સૂચના પ્રમાણે તે બોની કા, "યોહાન બાપ્તિસ્મા કરનારને માથ માને થાલામાં આપ."

⁹હવે રાજા દિલગીર હોવો,તોયેફણ પોતે સમ ખાદા ના તીયાણે નેદે તથા તીયાણે હારી ખાણે બેઠીનાહાય નેદે તીયે તો આપવાણો હુકમ કદો. ¹⁰તીયે માણાહાય મોકનીને યોહાનણે માથ જેલમાં કપાવ્ય.

¹¹ને થાલામાં તીયાણે માથ નાવીને છોકરીણે આપ્ય ;ને છોકરીએ પોતાણે માને તી આપ્ય.

¹²તીયા તીયાણે શિષ્યોહોય પાહી આવીને તીયાણો મૃતદેહ ઉચકી નેઈ જાઈને તીયાણે દફનાવ્યો ને જાઈને ઈસુણે ખબાર આપી. ¹³તીયા ઈસુએ ઉનાયને તીયેથી હોડીમાં એકાંત જગામાં ગો.માણેહે તી ઉનાયને નગરોમાંથી પગવાટે તીયાણે પાછાલ ગયે.

¹⁴ઈસુએ નીકલીને હમટે માણેહે હેજજે,તીયા તીયણે પાર તીયાણે કરુણા આવી ;ને તેએ તીણે માણાહાય માંદાહાય હારે કદે. ¹⁵સાંજ પડી તીયા તીયાણે શિષ્યો તીયાણે પાહાય આવીને કચ્ચતા કા, "ઓ જાગા ઉજાડ હા,હવે સમય હોય ગો હા,માટે માણાહાય વિદાય કર કા તી ગામોમાં જાઈને પોતાણે હારુ ખાવાણ વેચાત નેઈ." ¹⁶ફણ ઈસુએ તીણાહાય કય કા, "તીણાહાય જાવાણી જરૂર નાથ,તુમે તીણાહાય ખાવાણ આપા."

¹⁷તીણાહાય તીયાણે કય કા, "ઈયે આમારે પાહાય માત્ર પાંચ રોટની ને બે માછને હા."

¹⁸તીયા ઈસુએ કય કા, "તી ઈયે મારે પાહાય નાવા." ¹⁹પૂઠી તીયે માણાહાય ઘાહાયા પાર બહેવાણી આજ્ઞા આપી.ને તી પાંચ રોટની તથા બે માછની નેઈ સ્વર્ગ ફણી હેદીને આશીર્વાદ માંગજો ને રોટની ભાંગીને શિષ્યોણે આપીને શિષ્યોહોય માણાહાય આપી.

²⁰તેઓ બદે ખાઈને ધરાયે ; પૂઠી કુડકા વધીના કકડાઓણે બાર ટોપની કરાઈ.

²¹જિણાહાય પાદ તે સ્ત્રીઓ ને બાળકો ઉપરાંત આશરે પાંચ હજાર પુરુષ હોતના. ²²પૂઠી તરત તીયે શિષ્યોણે આગ્રહથી હોડીમાં બેહાડ્યા ને તીણાહાય પોતાણે આગાલ હલે પાર મોકનીના ને તેએ પોતે માણાહાય વિદાય કદે.

²³માણાહાય વિદાય કર્યા પૂઠી, "ઈસુ પ્રાર્થના કરને પહાડ પાર એકાંતમાં ગો ને સાંજ પડી તીયા ઈસુ તીયે એખનો હોતનો.

²⁴ફણ તે સમયે હોડી સમુદ્ર મધ્યે મોજાઓથી ડામાડોલ થાતી હોતની.કેહે કા વાયરઅ હામ હોતન. ²⁵રાતણે ચોથા પહોરે ઈસુ સમુદ્ર પાર ચાનતા તીયણે પાહાય આવો.

²⁶શિષ્યોએ તીયાણે સમુદ્ર પાર ચાનતા હેજજો,તીયા તીણાહાય ઘાબરાયને કય, "ઈ તે કોઈ ભૂત હા "ને બીકથી તીણાહાય બૂમ પાડી.

²⁷ફણ તરત ઈસુએ તીણાહાય કય કા, "હિંમત રાખા ! ઓ તે હાય હામ ! ઘાબરાતા નખા." ²⁸તીયા પિતરે જવાબ આપતા કય કા, "પ્રભુ એજો તુ હોય,તુ માને આજ્ઞા આપ કા હાય પાણી પાર ચાનીને તોરે પાહાય આવ."

²⁹ઈસુએ કય કા " આવ." તીયા પિતર હોડીમાંથી ઉતરીને ઈસુ પાહે જાણે પાણી પાર ચાન્ને લાગો.

³⁰ફણ વાયરાણે હેદીને તો ઘાબરાયો ને ડૂબણે લાગો તેથી તીયે બૂમ પાડતા કય કા, "ઓ પ્રભુ માને બચાવ." ³¹ને ઈસુએ તારાતુ જ હાથ લાંબો કદો તિયાણો ધરી નેદો ને તીયાણે કય કા, "અરે અલ્પવિશ્વાસી,તુયે શંકા કેહ

કદી ?"

³²પુઠી જહા યેસુ ને પિતર હોડીમા ચડ્યા એટલે તરાતુજ વાયરઅ બધ હોવ .

³³.હોડીમાં જે હોતના તીણાહાય તીયાણો આભાર માનતા કય કા,"ખેરેખર તુ ઈશ્વરણો દીકરોહ હા." ³⁴.તે પાર ઉતરીને ગનેસારેત દેશમાં આવા.

³⁵.જીયાર તીયા જગ્યાણા માણાહાય તીયાણો ઓલખીયો,તીયા તીયણાહાય તીયા આખા દેશણાં ચારેતરફ માણાહાય મોકનીને બદા માંદાહાય તીયાણો પાહાય નાવા.

³⁶.તીણાહાય ઈસુણો વિનંતી કરી કા,"કેવળ તોરે વસ્ત્રોણો કોરને જ તુ આમાહાય અટકીવા દે ; ને જતરે અટકીયે તતરે હારા હોવા.

Chapter 15

¹તે પ્રસંગે યજ્ઞશાલેમથી ફરોશીઓ તથા શાસ્ત્રીઓ હોય ઈસુણે પાહે આવીને કય કા,

²તોરે શિષ્યો વડીલોણા રિવાજોણે ઉલ્લંઘન કેહે કરતા હા?કેહેકા તે હાથ ધોયા વગાર ભોજન કરતા હા."

³.ફણ ઇસુએ તીણાહાય જવાબ આપ્યો કા,"તુમે તમારે રિવાજોથી ઈશ્વરને આજ્ઞાણે ઉલ્લંઘન કે હે કરતા હા?"⁴.કેહેકા ઈશ્વરે કય હા,કા 'તુમે તમારે માતા પિતાણે સન્માન કરા'ને જી કોઈ પોતાણા માતા પિતાણે નિંદા કરે તી નિશ્ચે માર્યો જાય.'

⁵.ફણ તુમે કતે હા કા,જી કોઈ પોતાણા માતા પિતાણે કયકા,જી વડે મારાથી તીયાણે લાભ હોવો હોત તી ઈશ્વરને અર્પિત હા,""

⁶.તો ભલે પોતાણા માતા પિતાણે સન્માન ની કરે ;એહે તુમે તુમારે રિવાજથી ઈશ્વરણે આજ્ઞાણે રદ કરી હા.⁷.ઓ ઢોગીઓ, યશાયા પ્રબોધક તુમારે સંબંધી હારજ કય કા,

⁸ઈ માણેહે પોતાણા હોઠોથી માને માન આપને હા,ફણ તીયાણે હૃદય મારેથી વેગળાં જ રતે હા.

⁹.તીયાણે ભક્તિ નિરર્થક હા, તે પોતાણે સિદ્ધાંત પ્રમાણે માણાહાયે આજ્ઞાઓ હીકવને હા."¹⁰.પૂઠી ઈસુએ માણાહાય પાહી હાદીને કય કા,"ઉનાયા ને હમજા.

¹¹.મોમાં જી જાત હા તી માણાહાયે વિટાલત કરત નાથ, ફણ મોમાંથી જી નીકીલીત હા તી જ માણાહાયે વિટાલત હા."¹².તીયા ઈસુણા શિષ્યોણે પાહી આવીને તિણાહાય કય કા,"એ વાત ઉનાયને ફરોશીઓ નારાજ હા,ઈશુ તુમે જાણતા હા?"

¹³.ફણ ઈસુએ જવાબ આપતાં કયું કા જે છોડવા મારે સ્વર્ગીય પિતાએ રોપયા નાથ, તે બધ ઉખડી નાખાઈ.

¹⁴.તીણાહાય રવા દીયા,તે અંધ માર્ગદર્શકો હા ; ને જો અંધળા વ્યક્તિ બીજા આંધળા વ્યક્તિણે દોરે તો તી બેજ ખાડામાં પડી.¹⁵.તીયા પિતરે ઈસુણે જવાબ આપતાં કય કા,"ઈયા દષ્ટાંતણે અર્થ આમાહાય કય."

¹⁶.ઈસુએ કય કા,"શુ આજુ હુદી તુમે ફણ અણહમજું હા ?

¹⁷.શુ તુમે આજુ નાથ હમીજતા કા મોમાં જી કાંઈ ભોજન નેતે હા તે પેટમાં જાત હા તીયાણે બિનઉપયોગી કયરો નીકલી જાતો હા ?¹⁸.ફણ મોમાંથી જે વાતો નીકીલીત હા,તે મનમાંથી આવતી હા,ને તે માણાહાયે વિટાલતી કરતી હા.

¹⁹.કેહે કા, દુષ્ટ કલ્પનાઓ,હત્યાઓ,વ્યભિચારો,જાતીયભ્રષ્ટતા,યોરીઓ,જૂઠી સાક્ષીઓ,તથા દુર્ભાષણો હૃદયમાંથી નીકીલીત હા.

²⁰.માણાહાયે જી વિટાલત કરત હા તી એજ હા,"ફણ હાથ ધોયા વગાર ભોજન ખાવાણે એ માણાહાયે વિટાલત નાથ."²¹.ઈસુ તીયેથી નીકલીને તુર તથા સીદોનમાં પ્રદેશમાં ગો.

²².હેદા,એક કનાની સ્ત્રીએ તીયા વિસ્તારમાંથી આવીને મોટે અવાજે કય કા,ઓ પ્રભુ ,દાઉદણા દીકરા,મારે પાર દયા કરા,મારે દીકરી ભુતથી બઉ પીડા પામતી હા."

²³.ફણ ઈસુએ તે સ્ત્રીણે કાંઈ જવાબ આપયો ની,તીયાણે શિષ્યોએ તીયાણે વિનંતી કરતા કય કા,"તી તીયેણે મોકની દે,કેહ કા તે આપળે પાછાલ બૂમ પાડયા કરતી હા."²⁴.ફણ તીયે જવાબ આપ્યો કા , "ઈઝરાયેલણા ઘરણા ખોવાયના ઘેટા સિવાય બીજા કોઈણે પાહાય માને મોકીનવામાં આવો નાથ."

²⁵.પૂઠી તે સ્ત્રીએ ઈસુણે પાહાય આવીને તીયાણે પગે પડીને કય કા,"ઓ પ્રભુ,માને મદત કર."

²⁶.તીયા જવાબ આપતાં કય કા,"છોકરાહાય રોટની નેઈને કુતરાણે નાખવી તી ઉચિત નાથ."²⁷તીયે સ્ત્રીએ કય કા,"હાયુ પ્રભુ પરંતુ કુતરા ફણ પોતાણા માલિકોણે મેજ પારથી જે ટુકડા પડતાહા તી ખાતો હા."

²⁸.ઈસુએ જવાબ આપતાં તીયેણે કય કા,"ઓ બાઈ, તોરે વિશ્વાસ મોટો હા.જે તુ ચાહતી હા તેવ તુને હોવે."તેજ સમયે તીયેણે દીકરીણે સાજાપણું મિલ્યા;

²⁹.પૂઠી ઈસુ તીયેથી નીકલીને ગાલીલણા સમુદ્ર પાહે આવો ને પહાડ પાર ચડીને બેઠો.

³⁰.તિયા કતરેક પેગલે, આદળે,મુંગે, ટુડાહોય ને બીજે ઘણાં માણેહે લોકે તીયાણે પાહે નાવે ને ઈસુણા પાગાહા પાહે તિણાહાય મૂક્યે ને તિયે તીયેણે બાદાહાય હારે કદે.

³¹.જ્યાં લોકાહાય જાઅણ કા મુંગે બોનણે લાગે હા , ટુડા હારે હોવે હા,લુલે ચાનતે હોવે હા ને આદળે દેખણે લાગેહા,તિયા તિણાંહાય નવાય નાગી ને ઈઝરાયેલના ઈશ્વરનો મહિમા કદો.³².ઈસુએ પોતાણે ચેલાહાય પાંહિ હાદીને કય કા,"એવા લોકાહા પાર માને દયા આવતી હા,કેહેકા તીન દિહીથી તી મારે હારી રયે હા, તીણાહાય પાહે કાંઈ ખાવણે કાઅની હા તિણાંહાય ફોકે વિદાય કરવાંણ હાય ઇચ્છતો કાયની,એવ બને કા તિ વાટીમાં ચક્કર ખાઈને પડી જાય."

³³.ચેલાહાય તીયાણે કયકા,અતરે બદે માણાહાય ખાવાણો પુર પાળને ખાવાણો આમે એવા અરણયમાં કાઅથી નાવજે?

³⁴.તિયાં ઈસુએ તિણાહાય કય કા,તુમારે પાહી કતરી રોટની હા."તિણાંહાય કય કા, "હાત રોટની ને થોળી હી જ માછલી હા."

³⁵.તિયે માણાહાય જમીન પાર બેહવાણી આજા આપી.³⁶.તિયે તે હાંત રોટનીને માછને નેઈને સ્તુતિ કદીને ફાગી ને પોતાણા ચેલાહાય આપી,ચેલાહાય માણાહાય આપી.

³⁷.બદે ખાઈને થરાયે ને પૂઠી વદીના ટુકળા તિણાહાય હાંત ટોપની ભરી.

³⁸.જીણાહાય ખાદો તિ બેનો બાળકો ઉપરાંત ચાર હજાર પુરુષો હોતના.

³⁹.માણાહાય વિદાય કદે પૂઠી ઈસુ હોળીમાં બેહીને મગદાનાના પ્રદેશમાં આવો.

Chapter 16

¹.ફરોશીઓએ તથા સદુકીઓએ આવીને ઈસુણે પરીક્ષણ કરતા સ્વર્ગથી કોઈ ચમત્કારિક ચિન્હ કરી દેખાળવાણી માંગણી કરી.

².ફણ તિયે જવાબ આપતાં તિણાહાય કય કા,"હાજતો પડે ત્યાં તુમે કતાં હા.કા,'વાતાવરણ હારો હા,કેહે કા આકાશ લાલ હા !"³.હવારમાં તુને કતાં હા કા,'આજે વરહાત પળી,કેહકા આકાશ લાલ ને અંધરાયન હા ;તુમે આકાશણ રૂપ પારખી જાણતા હા ખરા,પણ સમયોણ ચિન્હ તુમે પારખી જાણતા નાથ.

⁴.ભુંડી ને વ્યભિચારી પેઢી ચમત્કારિક ચિન્હ માગતી હા,ફણ યુનાણે ચમત્કારિક ચિન્હ વગાર બીજ કોઈ ચમત્કારિક ચિન્હ તિણાહાય આપણે આવી કાયની ."⁵તિયાં પૂઠી ઈસુ તિણાહાય મૂકીને નીહરીગો.⁵.ચેલા હલે પાર ગયા ફણ તે રોટની નેવાણી વિહિરાય ગયા.

⁶. તીય ઈસુએ તિણાહાય કય કા,"ફરોશીઓણા ને ખમીરથી તુમે સાવધાન રયા ને ચેતીને રચજા ."

⁷.તિયાં તિણાહાય એકબીજા હારી વાત કરી કા,"આપળે રોટની કાઈની નાવા એટલે ઈસુએ એહે કય કા."

⁸.ઈસુએ એ જાણીને તિણાહાય કય કા,"ઓ અલ્પવિશ્વાસીયો તુમારે પાહે રોટની નાથ તિયાં હારુ તુમે એકબીજા હારી મનમાં હેવા વિચાર કરતા હા ?"⁹.આજુ હુદી તુમે નાથ હમીજતા, નેહલા હલે પાંચ હજાર માટળા હારુ પાંચ રોટની હોતની ને કતરી ટોપની ફરીની તી તુમાહાય યાદ કાયની હા ?

¹⁰.વલી હલા ચાર હજાર પુરુષ હારુ હાંત રોટની હોતની ને તુમાહાય કતરી ટોપની ફરીની તી ફણ તુમાહાય યાદ કાયની હા ?"¹¹.તુમે કેહ નાથ હમીજતા કા મયે તુમાહાય રોટની વિષે કચન કાઈની ફણ ફરોશીઓના ને સદુકીયોહાય ખમીર વિષે તુમે સાવધાન રયા એહે મયે કચન હોતન."

¹².તિયાં તે હમજી ગયા કા રોટનીણે ખમીર વિષે કાઈની,ફણ ફરોશીઓના ને સદુકીહાય ઉપદેશ વિષે સાવધાન રણે હારુ તિયે કચન.¹³.ઈસુએ કેસારિયા ફિલ્લીપીના વિસ્તારમાં આવીને પોતાણા ચેલાહાય પૂછય કા,"માણસનો દીકરો કીડો હા,તિયાં વિષે માણહે કાંજા કણે માગતે હા ?"

¹⁴.તિયાં તીણાહાય કય કા,"કતરેક કતે હા,યોહાન બાપ્તિસ્મા કરનાર,કતરેક એલિયા,કતરેક યર્મિયા,અથવા પ્રબોધકોમાનો એક."

¹⁵.ઈસુએ તીણાહાય પૂછય "ફણ હાય કીડો હાય તિયાં વિષે તુમે કા કણે માંગતા હા ?"

¹⁶.તિયાં સિમોન પિતરે જવાબ આપતાં કય કા,"તુ ખ્રિસ્ત જીવતા ઈશ્વરનો દીકરો હા."¹⁷.ઈસુએ જવાબ આપતાં સિમોન પીતરને કય કા,સિમોન યુના પુત્ર."તુ ધન્ય હા કેહે કા માંસ તથા લોહીએ કાઈની ફણ સ્વર્ગમાણા મારે બાપે તુને હી જણાવ્ય હા.

¹⁸.હાય ફણ તુને કચતો હામ કા તુ પિતર હા ને હાય ઈયા પથ્થર પાર મારે મંડળી બાદિહી,તિયાં વિરુદ્ધ હાદેશની સત્તાણ જોર ચાંને ની.¹⁹.આકાશણા રાજ્યણી ચાવીયો હાય તુને આપીહી,પૃથ્વી પાર જી કાંઈ તુ બાંદેહે,તી સ્વર્ગમાં બાદાય જાય ; ને પૃથ્વી પાર તુ જી કાંઈ છોડેહે તી સ્વર્ગમાં ફણ છોડવામાં આવી."

²⁰.તો ખ્રિસ્ત હા તેવ કોઈણે ફણ ની જાણવાણી ઈસુએ તિયાણા ચેલાહાય આગના આપી.²¹.ત્યારથી માંડીને ઈસુ પોતાણા ચેલાહાય જાણાવાણે લાગો કા,તીયાણે ચરુશાલેમમાં જાવા પડી વડીલો,મુખ્ય યાજ્ઞકોહાય ને શાસ્ત્રીઓહાય હાથે ઘણ દુઃખ સહન કરવા પળી,મારી નાખી ને તીજે દિહી પાછો મરીનામાંથી પાછો ઊઠુ તી જરૂર હા.

²².પિતર તીયાણે એક બાજુ પાહે નેઈ ગો ને ઠપકો આપણે લાગો ને કય કા,"અરે પ્રભુ,હેવ તોરેથી દૂર રય ;હેવ તુને કોઈ દિહી ની હોવે."

²³.ફણ તીયે પાછાલ ફીરીને પીતરને કય કા,"અરે શેતાન મારે પાછાલ જા તુ માને આળો ની આવ ;કેહ કા ઈશ્વરની વાતો પાર કાઈની,ફણ માણહાય વાતો પાર મન લાગીવતો હા."²⁴.પૂઠી ઈસુએ પોતાણા ચેલાહાય કય કા,"જો કોઈ મારે પાછળ આવણે રાખે,તો તે પોતાણો નકાર કરવો ને પોતાણો વધસ્તંભ ઉચકીને મારે પાછાલ ચાનવાણા,

²⁵.કેહે કા જો કોઈ પોતાણો જીવન બચાવણે માગે,તો તે ગુમાવી ;ફણ જે કોઈ.મારે નેદે પોતાણો જીવ ગુમાવી,તે તો બચાવાય.

²⁶.કેહે કા જી માણહે આખ જગત મેલવે ને પોતાણો જીવ ગુમાવે,તો તીયાણે કાજા ફાઇદો હોવે ? વલી માણહ પોતાણા જીવણે બદલે કાજા આપે.²⁷.કેહે કા માણહાણે દીકરો પોતાણા બાપણે મહિમામાં પોતાણા સ્વર્ગદૂતો હારી આવી,તિયાં તો દરેકણે તીયાણે કામ પ્રમાણે બદલો ભરી આપી.

²⁸.હાય તુમાહાય કતો હામ કા,ઈયે જે ઊભા હા તીમાણા કતરાક એવા હા કા તે માણહાણે દીકરાણે તિયાણે રાજ્યમાં આવતો દેખી ત્યાં હુદી મરણ પામીજ ની."

Chapter 17

¹છ દિહી પૂઠી ઈસુએ પિતર,યાકુબ ને તીયાણે ભાહાં ચોહાનને નેઈને એક ઉંચા ડોગરા પાર ચળી ગો.

²તીણાહાય આગાલ તીયાણે રૂપાંતર હોવ,એટલે તીયાણે મોળ સૂર્યણા જેવ તેજસ્વી હોવ ને તીયાણે નુગળે હુંજાલા જેવે ઉજલે હોવો .³હેદા,મુસા ને એલિયા તીયાણે હારી વાત કરતા તીણાહાય દેખાયા.

⁴પિતરે ઈસુણે કય કા,"પ્રભુ ,આપળે ઈંચે રવાણો તી હાર હા,જો તોરે ઈચ્છા હોય તે હાય ઈયા તીન માંડવા બાંધ ;એક તોરે ફાગણો,એક મુસા ફાગણોને,એક એલીયાણે ફાગણો.⁵તો બોનતોનો હતરામાં હેદા,એક ચળકતી વાદળ તીયાણે પાર આવીને ઊબો રાખો ; ને વાદળામાંથી એવો અવાજ આવો કા,"ઓ મારે વહાલો દીકરો હા,તિયાં પાર હાય પ્રસન્ન હામ,તીયાણે તુમે ઉનાયા."

⁶ચેલાહાય એવ ઉનાયને ખણા ખાબરાયા,ને ઉંઘે મોટે જમીન પાર પળી ગયા.

⁷ઈસુએ તીણાહાય પાહી આવીને તીણાહાય અળકીને કય કા,"ઉઠા ને ખાબરાતા નખા."

⁸તીણાહાય પોતાણી નજર ઉંચી કરી તે એખના ઈસુ વગર તીણાહાય બીજા કોઈણે દેખ્યા કાંઈ ની.⁹જ્યા તે ડોગરા પારથી ઉતીરતના,ત્યાં ઈસુએ તીણાહાય આગના આપી કા,"ઈ જી તુમાહાય દેખ્ય તી જ્યા હુદી માણાહાય દીકરો મરણમાંથી પાછો સજીવન હોવે ત્યાં હુદી કોઈણે કવાંણ ની."

¹⁰તિયા ચેલાહાય તીયાણે પૂછય કા,"શાસ્ત્રીઓ કેહે કચતા હા.કા એલીયાએ પેલો આવા જોજે ?"¹¹ઈસુએ તીણાહાય જવાબ આપ્યો કા,"એલિયા ખરેખર આવી ફણ ને બધ હારો કરી.

¹²ફણ હાય તુમાહાય કતો હામ કા,"એલિયા આવી ગો હા,તોય તીણાહાય તીયાણે ઓલીખ્યો કાઈની ફણ જેહે તીણાહાય ઈચ્છા રાખી તેહે તીણાહાય તીયાણે કદો ;તેહેજ માણસોણો દીકરો ફણ તીણેથી દુઃખ સહન કરી."

¹³ચેલાહાય એવી હમાજ પળી કા ચોહાન બાપ્તિસ્મા કરનાર વિષે તિયે તીણાહાય કય હોય.¹⁴જ્યા તે માણાહાય ટોલા પાહી આવા,તિયાં એક માણાહાય ઈસુણે પાહી આવીને તિયાં આગાલ ઘૂંટણે પળીને કય કા,

¹⁵"ઓ પ્રભુ મારે દીકરા પાર દયા કર ;કેહ કા તીયાણે ફેફરાણી બીમારી હા.એટલે તો ઘણી વાર આગળામાં ને પાણીમાં પળી જાતો હા.

¹⁶તીયાણે હાય તોરે ચેલાહા પાહી નાવનો તોચયે,ફણ,તોય તે તીયાણે હારો કરી શક્યા કાયની."¹⁷તિયાં ઈસુએ જવાબ આપ્યો કા,ઓ અવિશ્વાસી તથા આળી પેઢી કાં હુદી હાય તુમારે હારી રહી ?ક્યાં હુદી હાય તુમારે સહન કરીહી ? તિયાણે મારે પાહી નાવા ?

¹⁸પૂઠી ઈસુએ તિયાં ભુતણે ધમકાવ્યો,ને તો તીયામાંથી નીકલી ગો ;ને તો તીયેજ સમયે તો છોકરો હારો હોય ગો.¹⁹પૂઠી ચેલા એકાંતમાં ઈસુ પાહે આવીને કય કા,"આમે તીયાણે કેહે કાળી ની હખ્યા."

²⁰તિયાં ઈસુએ તીણાહાય કય કા."તુમારે અવિશ્વાસને નેદે ;કેહે કા હાય તુમાહાય જરૂર કચતો હામ કા,જો તુમાહાય રાઈણા દાણા જતરો વિશ્વાસ હોય તો તુમે ઈયા ડોગરાણે કચતાં કા,'તું ઈયથી તિયે જાતો રચ.ને તો જાતો રચતો;ને તુમારે હારુ કાંઈ અશક્ય નીજ હોય.

²¹ફણ પ્રાર્થના ને ઉપવાસ વગાર હે જાત નીકીલતી કાયની."²²જ્યા તેઓ ગાલીલમાં રતના તિયાં ઈસુએ પોતાણા ચેલાહાય કય કા,"માણસણો દીકરો માણાહાય હાથમાં હોપાઈ;

²³તે તીયાણે મારી નાખી,ફણ તીજે દિહી પૂઠી તો પાછો ઊઠી."તિયાં ચેલા બચજ દુઃખી હોઈ ગયાં.²⁴પૂઠી તે કપરનાહુમમાં આવા તિયાં કર નેનારાહાય પીતરને પાહી આવીને કય કા."શું તુમારે ઉપદેશક ભક્તિસ્થાનના કરણા પયહાં કાઈની આપતે."

²⁵પિતરે કય કા,"હા,"ને તો ઘરમાં આવો તિયાં તીયાણે કયાં પેલા ઈસુએ કય કા,"સિમોન તુને કાજા નાગત હા,દુનિયાણા રાજાઓ કીડા પાહીથી જકાત અથવા કર નેતા હા ? પોતાણા દીકરાહાય પાંહેથી કા પરદેશીઓ પાંહેથી ?"²⁶પિતરે ઈસુએ કય કા,"પરદેશીઓ પાંહેથી."તિયાં ઈસુએ તીયાણે કય કા,"તો પૂઠી દીકરાઓ તે કર મુક્ત હા.

²⁷તોયી ફણ આપળે તીયહાય અપમાન કરજે."તું સમુદ્ર કિનારે જાઈને જાલ નાખ ;ને જે માછની પેલી આવે તીયાણે થરી નેજે,જ્યા તું તીયાણે મુ ખોલેહે તિયાં તીઈ માંથી તુને પયાહાં મીલી,તે નેઈ નેજે ને મારે ને તોરે હારુ તીણાહાય આપી દેજે."

Chapter 18

¹તિયે સમયે ચેલાહાય ઇસુની પાહે આવીને કય કા, "સ્વર્ગણાં રાજ્યમાં બદલાથી મોટ કીડો હા ?"

²તિયાં ઇસુએ એક બાળકણે પોતાણે પાહી હાદીને તીયાણે તીણે વચ્ચે ઊભ રખાળીને,

³કય કા, "હાઈ તુમાહાય હાયુજ કતો હામ કા, જો તુમે તુમારે બદલાણ ની કરાહા, ને બાળકણાં જેવા ની બનાહા તો સ્વર્ગણાં રાજ્યમાં તુમે જાય શકતા નાથ.

⁴એટલે જો કોઈ પોતાણે ઈયા બાળકણાં જેવો નમ્ર કરી, તે સ્વર્ગણાં રાજ્યમાં બદાહા કરતા મોટો હા.

⁵ને જો કોઈ મારે નામે ઈયા એક બાળકણો સ્વીકાર કરે તો મારે ફણ સ્વીકાર કરતો હા.

⁶ફણ એ નાનાહાય જેવો મારે પાર વિશ્વાસ કરતો હા, તીણે માંઅણો એકણે જે વ્યક્તિ પાપ કરણે પ્રેરણા આપે, તિયાં કરતા તીયાણે ગલે છંટીનુ પટ બાંધીને સમુદ્રના ઉડાણમાં ડુબાળાય ઈ તિયાં હારુ હાર હા. ⁷ઠોકરોણે નેદે, ઠોકર આવવાણી અગત્ય હા જીયા માણાહાથી ઠોકર આવે તીયાણે અફસોસ !

⁸એટલે જો તોરે હાથ અથવા પાગ તુને પાપ કરણે દોરે, તો તીયાણે કાપી નાખીને તોરે પાંહેથી ફેંકી દે તોરે બે હાથ અથવા બે પાગ તોઈ ફણ છતાં તું અનંત અગ્નિમાં નંખાય, તિયાં કરતા હાથ અથવા પાગે ઠૂકો હોયને જીવનમાં પેસવાણ ઈ તોરે માટે હારો હા. ⁹જો તોરે ડોલા તુને પાપ કરાવે. તો તે કાઢી નાખીને તોરે પાંહેથી ફેંકી દે. બેય ડોલા છતાં તું નરકાગ્નિમાં નાંખાય, તિયાં કરતા એક ડોલે આંદલો બનીને જીવનમાં પેસવાણ ઈ તોરે માટે હારો હા. ¹⁰સાવધાન રચજા કા ઈયા નાનામાં નાના એકણો ફણ અનાદર તુમે નખે કરતા કેહે કા હાય તુમાહાય કતો હામ સ્વર્ગમાં તીયાણે સ્વર્ગદૂત મારે સ્વર્ગમાણા બાપણે મોળાણે સદા હેદતો હા.

¹¹કેહે કા જી ખોવાયન હા તીયાણે બચાવણે માણહાણે દીકરો ઈસુ આવો હા. ¹²તુમે કાજા ધારતા હા ? જો કોઈ માણસ પાંહે સો ઘેટે હોય ને તીયામાંથી એક ભૂનવાય જાય, તો તે નવ્વાણુંને ડોગરા પાર મૂકીને તી ભૂનવાય ગના ઘેટાણે હેદણે જાતો નાથ ?

¹³જો તી તુને મીલે તે હાય તુમાહાય હાયુજ કતો હામ કા, જી નવ્વાણું ભૂનવાય ગને નાથ હોતને, તીયાણે કરતાં તીયાણે નેદે તો વધારે ખુશ હોતો હા.

¹⁴એહે ઈયા નાનામાંથી એકણે નાશ હોય, હેવી તુમારે સ્વર્ગમાણા પિતાણે ઈચ્છા નાથ. ¹⁵ને જો તોરે ભાઈ તોરે વિરુદ્ધ અપરાધ કરે, તે જા ને તીયાણે એક જાગામાં નેઈ જાઈને તીયાણે દોષ તીયાણે ક. જો તો તોરે ઉનાય, તો તુયે તોરે ભાઈણે મેલવી નેધો હા.

¹⁶ફણ જો તો ની ઉનાય, તીયા બીજા એક બે માણાહાણે તોરે હારી ને, ઈયા માટે કા બધી વાત બે અથવા તીન સાક્ષીઓણે મોઠેથી સાબિત હોય. ¹⁷જો તી તીયાણે માન્ય ની રાખે, તીયા મંડળીને કચ ને જો તે વિશ્વાસી ટોલાણે ફણ માન્ય ની રાખે તીયા તીયાણે બિનચડૂદીઓ તથા દાણીઓણે જેવો ગણ. ¹⁸વહાય તુમાહાય હાયુજ કતો હામ કા, જી કાંઈ તુમે પૃથ્વી પાર બાધાય, તી સ્વર્ગમાં બાધાય, ને જી કાંઈ તુમે પૃથ્વી પાર છોડાહા, તી સ્વર્ગમાં છોડાય.

¹⁹ને હાય તુમાહાય હાયુજ કતો હામ કા, જો પૃથ્વી પાર તુમારામાણા બે જણા કાઈ ફણ વાત સબંધી એક ચિતણા હોયને માગી, તીયા મારે સ્વર્ગમાંણા પિતાથી તિણાહાય હારુ તીઈ કરી.

²⁰કેહ કા જીયે બે અથવા તીન મારે નામમાં એકઠે હોવીને હોય તીયા તીયાણે વચ્ચે હાય હામ. ²¹તીયા પિતરે ઈસુણે પાહાય આવીને કય કા, "ઓ પ્રભુ મારો ભાઈ મારે વિરુદ્ધ ઘણા વાર અપરાધ કરતો ને હાય તીયાણે માફ કર ? શું સાત વાર હુધી ?"

²²ઈસુએ તીયાણે કય કા, "સાતવાર હુદી હાય તુને કતો નાથ, ફણ સિતેરગાણી સાતવાર હુધી કચતો હામ. ²³ઈયા માટે સ્વર્ગણા રાજ્યણે એક રાજાણે ઉપમા આપાય હા કા જીયે પોતાણા ચાકરોણે પાહાય હિસાબ માગયો.

²⁴તો હિસાબ નેણે નાગો તીયા તિણાહાય દશ હજાર તાલંતના દેવાદારને તિયાણે પાહાય નાવે .

²⁵ફણ પાછ આપવાણ તીયાણે પાહાય કાઈ ની હોવાથી, તીયાણે માલિકે તીયાણે, તીયાણે પત્ની, તીયાણે બાળકોણે તથા તીયા પાહાય જી હોતન તી બધ વેચીને દેવ ચૂકવવાણી આજ્ઞા કદી. ²⁶ઈયા માટે તો ચાકર તીયાણે પગે પડીને વિનંતી કરતાં કચ કા, માલિક ધીરજ રાખ ને હાય તોરે બધ દેવ ચૂકવી આપીહી.'

²⁷તીયા તે ચાકરને માલિકણે દયા આવી તેથી તીયાણે તિયે જાવા દેદો ને તીયાણે દેવ માફ કદ. ²⁸ફણ તોજ ચાકર બાર જાઈને પોતાણા સાથી ચાકરોમાણા એકણે હેજજો જીયાણે, તીન મહિનાણો પગાર જતર દેવ હોતન, તીયા તીયે તીયાણે ગલ થરીને કય કા, તારે દેવ ચૂકવ !

²⁹તીયા તીયાણે સાથી ચાકરે પગે પડીને વિનંતી કચતાં કય કા, ધીરજ રાખને હાય તોરે દેવ ચૂકવી આપીહી. ³⁰તીયે તીયાણે માન્ય ની, ફણ જાઈને દેવ ચૂકવે ની તીયા હુધી તીયે તીયાણે જેલમાં પુરાવ્યો.

³¹તીયા જી હોવ તી હેદીને તીયાણે સાથી ચાકરો દુઃખી હોવા, તીણાહાય જાઈને તી બદ પોતાણે માલિકણે કય દેખાડય. ³²તીયા તીયાણે માલિકે તીયાણે હાદીને કય કા, અરે દુષ્ટ ચાકર તુયે માને વિનંતી કદી, માટે માયે તોરે તી બધ દેવ માફ કર્ય.

³³.માયે તોરે પાર જેવી દયા કદી તેવી દયા શું તોરે ફણ તોરે સાથી ચાકર પાર કરવાણી ઘટિત કાયની?"³⁴તીયાણો માલિકે ગુસ્સે હોઈને તીયાણો બધ દેવ ચૂકવે તીયા હુધી તીયાણો પીડા આપનારાહાય હોપયો.

³⁵ઈયા પ્રમાણે જો તુમે પોત પોતાણા ભાઈઓણે અપરાધ તુમારે હૃદયપૂર્વક માફ ની કરાહા,તો મારે સ્વર્ગય પિતા ફણ તુમાહાય એહેજ કરી."

Chapter 19

¹ઈસુએ એ વાત પૂરી કરી પૂઠી એક હોવ કા,તો ગાલીલથી નીકળીને યર્દન નદીનો હલી પાર ચઢીયાનો પ્રદેશમાં આવો.

²વદારેમાં વદારે માણે તીયાણે પાછાલ ગયે ને તીયા તીયે તીણાહાય હારે કયરે.³ફરોશીહીય તીયાણે મેરે આવીને તીયાણે પરીક્ષણ કરતા પૂછીય કા."કોય બી કારણને નેદે કેહે પુરુષે પત્નીનો છોડી દેવાનો ઉચિત હા ?"

⁴ઈસુએ જવાબ આપતાં કય કા."કેહે તુમા હાય એહે નાથ વાચ્ય કા,જીયે તીણાહાય ઉત્પન્ન કયરે,તીયે તીણાહાય શરૂવાતથી નરનારી ઉત્પન્ન કયરે ?"⁵ને કય કા 'તીયા કારણ ને નેદે પુરુષ પોતાનો આહાય-આથહાણે મૂકીને પોતાનો પત્નીનો વિલગી રય,ને તી બેવ એક દેહનો હોવી ?"

⁶ને તી હવેથી બે નાથ,ફણ એક દેહે હા.હીયા માટે ઈશ્વરે જીણાહાય જોયડે હા તીણાહાય માણહાય જુદે ની પાડવાનો.⁷તીણાહાય ઈસુનો કય કા,"તીયા મુસાયે હેવી આજ્ઞા કેહ આપી કા,ફારગતીનો પ્રમાણ-પત્ર આપીને તીનો મૂકી દેવાનો ?"

⁸ઈસુએ તીણાહાય કય કા,"મુસાયે તુમારે હૃદયનો કઠોરતાનો નેદે તુમાહાય તુમારે પત્નીનોહીય મૂકી દેવા દેદિ,ફણ શરૂઆતથી હેવ ની હોતન.

⁹હાય તુમાહાય કતો હામ કા,વ્યભિચારનો કારણ વગર જી કોઈ પોતાનો પત્નીનો છોડીને બીજી સ્ત્રી હારી વેવા કરે,તો તી વ્યભિચાર કરત હા ;ને જો કોઈ છોડી દેદની સ્ત્રી હારી વેવા કરે તો તી ફણ વ્યભિચાર કરત હા."¹⁰તીયાણે શિષ્યોહીય તીયાણે કય કા,"જો પુરુષનો તીયાણે પત્ની સબંધી એ સ્થિતિ હોય,તીયા વેવા કરવ હાર નાથ."

¹¹તીયા ઈસુએ તીણાહાય કય કા,"બદાથી એ વાત પાલાતી નાથ,ફણ જીણાહાય તી આપીન હા તીણેથી જ.

¹²કેહે કા કતરાક ખોજા હા કા જે પોતાનો આમારેથી જ હેવા જન્મેલા હા.કતરાક એવા હા કા જીણાહાય માણાહાય ખોજા બનાવ્યા હા;ને કતરાક એવા હા કા જીણાહાય સ્વર્ગના રાજ્યનો નેદે પોતાનો જ નપુંશક તરીકે કયરા હા.જી સ્વીકારી હકત હા તી ઈ વાત સ્વીકારે."¹³તીયા પૂઠી તી બાળકોહીય તીયાણે પાહાય નાવા,ઈયા માટે કા તી તીણે પાર હાય મૂકીને પ્રાર્થના કરે;ફણ શિષ્યોહીય તીણાહાય ધમકાવ્યે.

¹⁴ફણ ઈસુએ કય કા,"બાળકોહીય મારે મેરે આવવા દેયા,તીણાહાય રોકતે નખા,કેહ કા સ્વર્ગનો રાજ્ય એવાહાય હા."

¹⁵તીણે પાર હાય મુક્યા પૂઠી તી તીનથી ગયે.¹⁶તીયા પૂઠી, કોઈએ ઈસુનો પાહાય આવીને કય કા,"ઉપદેશક,અનંતજીવન પામણે માટે હાય કાજા હાર કર ?"

¹⁷તીયા તીયે તે વ્યક્તિનો કય,"તું મને હારા વિષે કેહે પૂછતો હા ? હારો તો એક જ હા,ફણ જો તુ જીવનનો માગમાં ઓરાનો માગતો હા,તીયા આજ્ઞાહાય પાલ."¹⁸તીયા વ્યક્તિએ ઈસુએ કય કા,'કાણી આજ્ઞાઓ ? તીયા ઈસુએ કય કા,"તુ હત્યા ની કર,તું વ્યભિચાર ની કર,તું ચોરી ની કર,તું જૂઠી સાક્ષી ની પુર.

¹⁹પોતાનો મા -બાપને માન આપ,પોતાનો મેરેણાહાય પાર પોતાનો જેવો પ્રેમ કર."²⁰તીયા જુવાને તીયાણે કય કા,"એ બધી આજ્ઞાહાય તે હાય પાલતો આવો હામ ; આજુ મારેમાં કાજા ખુટત હા ?"

²¹ઈસુએ તીયા જુવાનનો કય કા,"જો તુ સંપૂર્ણ હોણે માગતો હા,તીયા જાઈને તોરે જી હા તી વેચી નાખ ને ગરીબનો આપી દે,એટલે સ્વર્ગમાં તુને દ્રવ્ય મીલી ;ને આવીને મારે પાછાલ યાન."

²²ફણ તો જુવાન એ વાત ઉનાયને દિલગીર હોઈને નાહાય ગો, કેહે કા તીયાણે મિલકત ખણી હોતની.²³તીયા ઈસુએ પોતાનો શિષ્યોહીય કય કા,"હાય તુમાહાય સાચુ કતો હામ કા ધનવાનનો સ્વર્ગનો રાજ્યમાં ઓરાવચ મુશ્કેલ હા.

²⁴વલી હાય તુમાહાય પાછો કતો હામ કા ધનવાનનો ઈશ્વરને રાજ્યમાં ઓરાવા કરતાં ઉંટનો સોયનો કાણામાંથી નીકીલવ હેલ હા."²⁵તીયા તેયાણે શિષ્યોહીય તી ઉનાયને અચરત હોવા ને કણે લાગા કા,"તીયા કીડ ઉદ્ધાર પામી હકે ?"

²⁶ફણ ઈસુએ તીયાણે ફણી હેદીને કય કા,"માણાહાય તે હી અશક્ય હા,ફણ ઈશ્વરને બદલ્ય શક્ય હા."

²⁷તીયા પિતરે ઈસુનો જવાબ આપ્યો કા,"આમે બદલ્ય મૂકીને તોરે પાછાલ આવા હામ,તીયા આમાહાય કાજા મીલી ?"²⁸ઈસુએ તીણાહાય કય,"હાય તુમાહાય સાચુ કતો હામ કા,જીયા પુનઃ આગમનમાં માણસનો દીકરો પોતાનો મહિમાનો રાજ્યસન પાર બેહે,તીયા તુમે,મારે પાછાલ આવનારા,ઈઝરાયેલને બાર કુલને ન્યાયકરતા બાર રાજ્યાસીહીય પાર બિરાજી.²⁹જો કોઈ ઘરનો,ભાઈઓનો,બહેનોનો,માતાનો,બાળકોનો,કા ખેતરોનો મારે નામનો નેદે પાછાલ મૂકી દેદે હા,તી સોગણા પામીને અનંતજીવનનો વારસો પામી.

³⁰ફણ ઘણાં જે પેલ્લા તે છેલ્લા હોવી ;ને જે છેલ્લા તે પેલ્લા હોવી."

Chapter 20

¹કેહેકા સ્વર્ગણે રાજ્ય એક ખેડૂતમાલિકણે જેવે હા, જીયે પોતાણી દ્રાક્ષાવાળી હારુ મજૂરો નક્કી કરને વહેલો હવારે બાર ગો.

²તીયે મજૂરાહાય હારી રોજણે એક દીનાર નક્કી કયરાને પોતાણે દ્રાક્ષાવાળીમાં તીણાહાય મોકીના.³તીયા દિહીણે આશરે હવારના તીન વાગેત બાર જાઈને તીયે ચોકમાં બીજાહાય કામણે હોદામાં ઊભા રચના દેખશા.

⁴તીયા માલિકે તીણાહાય કય કા,તુમે ફણ દ્રાક્ષાવાડીમાં જાયા. ને જી કાંઈ ઉચિત હોઈ , તી હાય તુમાહાય આપીહી તીયા તે ગયા.⁵ને તે જ દિહી આ શરે બપોરે ને તીન વાગે પાછો બાર જાઈને તીણાહાય તીયાજ પ્રમાણે કયર.

⁶તીયાર પૂઠી આશરે અગિયારયામાં કલાકે ફણ તીયે બાર જાઈને બીજાહાય કામ નવરા ઊભા ઉવીનો દેખશો,તે માલિક તીણાહાય કય કા,આખો દિહી તુમે કેહે ઈયે કામ વગારના ઊભા રયાહા ?

⁷તીણાહાય તીયાણે કય કા,"કેહે કા કોઈએ આમહાય મજૂરીએ રાખ્યા નાથ તીયે તીણાહાય કય કા,'તુમે ફણ દ્રાક્ષાવાળીમાં જાયા.""⁸સાંજ પડી તીયા દ્રાક્ષાવાળીણો માલિક પોતાણે કારબારીણે કય કા,"મજૂરાહાય હાદીને છેલ્લી વ્યક્તિથી માંડીને તે પેલ્લી વ્યક્તિ હુદીણાહાય તીણાહાય વેતન આપ.

⁹જીયણાહાય આશરે અગિયારમાં કલાકે કામ પાર રાખીયા હોતના.તે જીયા આવા તીયા તીણાહાય એક એક દીનાર આપવામાં આવો.

¹⁰પૂઠી જે પેલા આવા હોતના તે વિચારતા ના કા આમાહાય વદારે મીલી."પરંતુ તીણાહાય એક દીનાર આપયો."¹¹તીયા તે નેઈને તીણાહાય ખેડૂત માલિકણે વિરુદ્ધ કચકચ કદી.

¹²ને કય કા,"એ મોડેથી આવનારાહાય ફક્ત એકુંજ કલાક કામ કર્ય હા ને આમે આખા દિહીણો બોજો તથા લુ સહન કદો.તેહે છતાં તે તીણાહાય આમારે બરાબર ગયણા હા.""¹³ફણ તીયે તીયાણે માણા એકણે જવાબ આપયો કા,મિત્ર,હાય તુમાહાય કાઈ અન્યાય નાથ કરતો;શું તુમે મારી હારી એક દીનાર નક્કી કર્યો ની હોતનો ?

¹⁴તોરે જી હા તી નેઈને ચાન્યો જા ;જતર તુને તતરજ ઈયા છેન્નાહાય ફણ આપવાને મારી મરજી હા.¹⁵જી મારે હા તી મારે મરજી પ્રમાણે વાપીરવાણો શું માને હક નાથ ? અથવા હાય હારો હામ માટે મારી આંખ દુષ્ટ હા શું ?

¹⁶એહે જેઓ છેન્ના તે પેલાં ને જેઓ પેલા તેઓ છેન્ના થાય !"¹⁷ઈસુએ યરુશાલેમ જાતા,રસ્તા પાર બાર શિષ્યોણે એકાંતમાં નેઈ જાઈને તીણાહાય કય કા,

¹⁸હેદા,"આપડે યરુશાલેમ જાતે હામ,માણાહાયે દીકરાણે મુખ્ય યાજકોણે તથા શાસ્ત્રીઓણે હાથ પરાધીન કરાય ને તે તીયા પાર મૃત્યુ દંડ ઠરાવી.

¹⁹ને ઠઠા-મશ્કરી કરાવણે,કોરડા મારાવણે,વધસ્તંભે જડાવાણે તે તીણાહાય વિદેશીઓણે સોંપી ;ને તીજે દિહી તો પાછો જીવતો હોવી."²⁰તીયા ઝબદીણા દીકરાઓણે માચે પોતાણા દીકરાઓણે હારી ઈસુણે પાહાય આવીને તથા પગે પડીને તીયાણે પાહાય કાયક માંગણી કદી.

²¹ને ઈસુએ તીણાહાય કય કા,"તોરે કેવી ઈચ્છા હા ?" તીણાહાય તીયે કય કા,"તોરે રાજ્યમાં એ મારે બે દીકરામાંણા એકણે તોરે જમણે હાથે ને બીજાણે તોરે ડાબા હાથે બેહે હેવી આજ્ઞા તું કર."²²ફણ ઈસુએ તીણાહાય જવાબ આપયો કા,"તુમે જી માંગાહા તી તુમે હમજીતા નાથ ;જો પ્યાલો હાય પીવાણો હામ તો તુમે પીઈ હકાહા ?"તીણાહાય તીયાણે કય કા,આમે પીઈ હકતે હામ."

²³તીયે તીણાહાય કય કા,"તુમે મારે પ્યાલો પીહા ખરા,ફણ જીયાણે માટે મારે પિતાએ તીયાર કયર હા તીયાણે વગાર બીજાહાય મારે જમણે હાથ ને ડાબે હાથે બેહેવા દેવા હો મારે અધિકારમાં નાથ."

²⁴જીયા બીજા દહ શિષ્યોએ તી ઉનાય તીયા તો બે ભાઈઓ પાર ગુસ્સે હોવો.²⁵ફણ ઈસુએ તીણાહાય પાહાય હાદીને કય કા,"તુમે જાણતા હા કા વિદેશીઓણે કરતાન તીયા પાર સત્તા ચાનીવતો હા ને જે મોટા હા તે તીયાણે પાર અધિકાર ચાનીવતા હા.

²⁶ફણ તુમારેમાં એવ ની હોય.તુમારેમાં જી કોઈ મોટો હોણે માગે,તો તુમારે ચાકાર હોય ;

²⁷ને જે કોઈ તુમારેમાં મુખ્ય હોણે માગે,તો તુમારે દાસ હોય;

²⁸જેહે માણાહાયે દીકરો સેવા કરાવણે ની,ફણ સેવા કરને,તથા ઘણાં માણાહાય ખંડણી હારુ પોતાણો જીવ આપણે આવો હા તેહે."²⁹જીયાર તો યરીખોમાંથી નીકીલતો હોતનો,તીયા માણાહાય મોટો સમુદાય તીયાણે પાછાલ ચાનતો હોતનો.

³⁰હેદા,બે આંધળાઓ વાટીણે બાજુમાં બેઠા હોતના,ઈસુ તીયાણે પાંહાય રચને જાતો હા.તી ઉનાયને તીણાહાય ઉંચા અવાજે કય કા,"ઓ દાઉદણા દીકરા,આમારે પાર દયા કર."

³¹ફણ લોકોએ તીયાણો ધમકાવીને ચૂપ રણે કય,ફણ તીણાહાય વધારે મોટેથી બૂમ પાડતા કય કા,ઓ પ્રભુ,દાઉદણા દીકરા,આમારે ઉપાર દયા કર. "³²તીયા ઈસુએ ઊભા રયને તીણાહાય હાદીને કય કા,"હાય તુમારે માટે કાજા કર.ઈયા વિષે તુમારે કાજા ઈચ્છા હા ?"

³³તીણાહાય તીયે કય કા,"પ્રભુ આમારે ડોલા ઉગાડ."

³⁴તીયા ઈસુણે દયા આવી,ને તો તીયાણો ડોલાહાય અટકીયો ને તરાત તે દેખતા હોવા ને તે ઈસુણે પાછાલ ચાનીયા.

Chapter 21

¹જીયા તો યરુસાલેમણે નજીક આવા ને ત જૈતુન નામણા ડોગરા પાહાય બેથફગે હુધી ગયા તીયા ઈસુએ બે શિષ્યોહોય મોકનીને.

²કય કા, "તુમે હામેણા ગામમાં જાયા,તીયે ઓરાતાજી તુમાહાય બાંધીન એક ગધેડી તથા તીયાણે પાહાય બચ્ચું હેદવાણ મીલી,તીયાણે છોડીને મારે પાહાય નાવા.

³જો કોઈ તુમાહાય કાઈ કય તે તુમારે કચવાણ કા, પ્રભુણે હીયાણે જરૂર હા ; એટલે તી તીણાહાય તરાતુજી મોકની દેઈ."⁴હવે ઈ એટલા હારું હોવે કા, પ્રબોધકે જી કયન તી પુર હોવે કા,

⁵"સિયોનણે દીકરીણે એહે કય કા,હેદ,તોરે રાજા તોરે પાહાય આવતો હા,નમ્ર હા,તથા ગધેડા પાર,હા,ખોલા પાર,એટલે ગધેડીના વછેરા પાર,સવાર હોયને આવતો હા."⁶તીયા શિષ્યોહોય જાઈને ઈસુણે તીણાહાય જી કય ન હોતને તેહે કર્ય.

⁷તે ગધેડીના બચ્ચાં સહીત નાવા ને પોતાણા વસ્ત્ર તીયા પાર નાખ્યા,ને ઈસુ તીયા પાર સવાર હોવો.

⁸માણાહા માણાહાય ઘણાં બદહાય પોતાણે વસ્ત્ર વાટીમાં પાથીરીયે,બીજાહાય ઝાડવા પારની ડાળી વાડીને વાટીમાં પાથીરીયે.⁹હવે આગાલ યાત્રારે તથા પાછાલ આવનારે માણાહાય બૂમ પાડી કા,દાઉદણા દીકરાણે હોસાન્ના,પ્રભુણે નામે જો આવતો હા તો આશીર્વાદિત હા,પરમ ઉંચામાં હોસાન્ના !"

¹⁰.તો જીયા યરુસાલેમ માં આવો તીયા આખા નગરમાં ખળભળી ઊઠીને કય કા,હો કીડો હા ?"

¹¹તીયા માણાહાય કય કા, "ઈસુ પ્રબોધક,જો ગાલીલણો નાસરેથણો,તો ઓ હા."¹²પૂઠી ઈસુ ઈશ્વરણે ભક્તિસ્થાનમાં ગો.તીયે જે વેચતે તથા ખરીદતે હોતને,તીયા બદહાય તીયે કાડી મૂક્યે,ને નાણાવટીઓણે બાજઠ,તથા કબૂતર વેચનારાહાય આસનો ઉંઘા વાલ્લે.

¹³ઈસુએ તીણાહાય કય કા, "મારે ઘર પ્રાર્થનાણે ઘર કવાઈ,એહે નખીન હા,ફણ તુમે હિયાણે લુટારાઓણે,કોતર બનાવ્યા હા."

¹⁴તીયા પૂઠી આંધળાઓ તથા લંગડાઓ તીયાણે પાહાય ભક્તિસ્થાનમાં આવા ને તીયે તીણાહાય હારા કદા.¹⁵ફણ જ ચમત્કારો તીયે કદા,તથા જી બાળકો ભક્તિસ્થાનમાં ઉંચા અવાજે દાઉદણા દીકરાણે હોસાન્ના પોકારતા હોતના,તીણાહાય જીયા મુખ્ય યાજકોણે તથા શાસ્ત્રીઓણે હેજજા,તીયા તે બંજ ગુસ્સે હોવા.

¹⁶તીણાહાય ઈસુએ કય કા,તે કાજા કતા હા,તે કાજા તું ઉનાતો હા ?" તીયા ઈસુ તીયણાહાય કતો હા કા,'હા'બાળકોણે તથા નવજાત શિશુઓણે મુંઉથી તે સ્તુતિ સંપૂર્ણ કરાવી હા,હી,કાજા તુમાહાય કદી નાથ વાચ્ય ?"

¹⁷પૂઠી તીયાહાય મૂકીને નગર બાર બેથાનિયામાં જાઈને ઈસુએ રાત વાસો કર્યો¹⁸હવે હવારે નગરમાં પાછા આવતાં ઈસુણે ભૂખ નાગી.

¹⁹વાટીણે બાજુમાં એક અંજીરી હેદીને ઈસુ તીયાણે પાહાય ગો.ફણ તીયા પાર એખના પાના વગાર બીજ કાઈની મીલવાથી તીયે તીયાણે કય કા, "હવેથી તોરે પાર કદી ફળ ની લાગે;"

ને એકાએક તે અંજીરી હુકાઈ ગોઈ.

²⁰તી હેદીને શિષ્યો આશ્ચર્ય પામીને બોના કા. "અંજીરી કેવી રીતે એકાએક સુકાઈ ગોઈ.

²¹તીયા ઈસુએ જવાબ આપતા તીણાહાય કય કા, "હાય તુમાહાય હાયુજ કતો હામ કા,જો તુમાહાય વિશ્વાસ હોઈ ને સંદેહ ની નાવા,તો ઈયા અંજીરીણે જેહે હોવ તેહે તુમે કરહા,અતર ની ફણ જો તુમે ઈયા ડોગરાણે કહા કા, 'તું ઉંચકાઈને સમુદ્રમાં પડ ;તો તેહે જ હોવી.

²²જી કાઈ તુમે વિશ્વાસ રાખીને પ્રાર્થનામાં માગહા, તી બધ તુમે પામહા."²³પૂઠી ભક્તિસ્થાનમાં આવીને ઈસુ બોધ હાતોનો,હતરામાં મુખ્ય યાજકોએ તથા માણાહાય વડીલોએ તીયાણે પાહાય આવીને કય કા, "તું કાણા અધિકારથી એ કામો કરતો હા ? ને હો અધિકાર તુને કીડે આપયો ?"

²⁴તીયા ઈસુએ જવાબ આપતાં તીણાહાય કય કા, "હાય ફણ તુમાહાય એક વાત પૂછીહી તીયાણે જવાબ જો તુમે આપહા તે હાય કાણા અધિકારથી એ કામો કરતો હામ,તી હાય ફણ તુમાહાય કહી.²⁵જો બાપ્તિસ્મા યોહાન આપતો નો.તો કાથી હોતનો સ્વર્ગથી કા માણાહાય ?" તીયા તીણાહાય પરસ્પર વિચાર કરીને કય."જો આપડે કહું કા સ્વર્ગથી,તો ઈસુ આપડાહાય કય કા તીયા તુમાહાય તીયા પાર કેહ વિશ્વાસ કર્યો ની ?

²⁶અથવા જો આપળે કહું કા માણાહાય તી માણાહાય;આપળાહાય બીક હા."કેહ કા બદે યોહાનને પ્રાબોધક માનતે હા."

²⁷પૂઠી તીણાહાય ઈસુણે જવાબ આપતાં કય કા,આમે નાથ જાણતા;તીયે ફણ તીણાહાય કય કા, "હાઈ કાણા અધિકારથી એ કામો કરતો હામ તી હાઈ ફણ તુમાહાય કતો નાથ.²⁸ફણ તુમે શું ધારતા હા ? એક વ્યક્તિણે બે દીકરા હોતના;તીયે પેલ્લીણા પાહાય આવીને કય કા,દીકરા,તું આજે દ્રાક્ષાવાડીમાં જાઈને કામ કર ;

²⁹તીયા તીયે જવાબ આપયો કા,'હાય નાથ જાવાણો;તોયે ફણ પાછાલથી તો પસ્તાયને ગો.

³⁰ને બીજા પાહાય આવીને તીયે તેહેજ કય તીયા તીયે જવાબ આપયો કા હાય જાતો હામ,સાહેબ ? તોય ફણ તો ગો નાથ.³¹તે બે માંથી કીડે પોતાણે બાપણે ઈચ્છા પ્રમાણે કર્ય ? તીણાહાય ઈસુણે કય કા,પેલાએ;ઈસુ તીણાહાય કતો હા કા,"દાણીઓ તથા કસબણો તુમારે આગાલ ઈશ્વરણા રાજ્યમાં પ્રવેશ કરી.

³²કેહે કા યોહાન ન્યાયીપણાણે માર્ગે તુમારે પાહાય આવો તોયે ફણ તુમે તીયા પાર વિશ્વાસ ની કર્યો ફણ દાણીઓએ તથા કસબણો તીયા પાર વિશ્વાસ કયો ;એ જોયા પૂઠી ફણ તુમે પસ્તાવો કઈ ની.કેહે તુમે તીયા પાર વિશ્વાસ કરા.³³એક બીજ દ્રષ્ટાંત ઉનાયા.એક ખેડૂત માલિક હોતનો,તીયે દ્રાક્ષાવાડી રોપી,તીયાણે આજુબાજુ વાડ કદી તીયામાં દ્રાક્ષાકુંડ ખોદ્યો ને બુરજ બનાવ્યો,પૂઠી ખેડૂતણે તે ઈજારે આપી,તો પરદેશ ગયો.

³⁴ફળણે ઋતુ પાહાય આવો.તીયા તીયે ફળ નેણે હારુ પોતાણા ચાકરોણે તે ખેડૂતે પાહાય મોકીન્ના.³⁵તીયા ખેડૂતોએ તીયાણે ચાકરોણે ઘરીને એકણે માર્યો,બીજાણે મારી નાંખ્યો ને તીજાણે પથ્થરે માર્યો.

³⁶પૂઠી તીયે આગાલ કતાં બીજા વદારે ચાકરોને મોકીન્ના,ફણ તીણાહાય નૂહું એહેજ કર્ય.

³⁷પૂઠી તીયે પોતાણા દીકરાણે તીયાણે પાહાય મોકીન્ના કય કા,તે મારે દીકરાણે માન રાખી."³⁸ફણ ખેડૂતોએ દીકરાણે હેદીને પરસ્પર કય કા,ઓ તે વારસ હા,આપડે હિયાણે મારી નાંખતે ને તીયાણે વારસો નેઈ નેતે !

³⁹તીયા તીણાહાય તીયાણે થયો ને દ્રાક્ષાવાડીમાથી બાર કાડીને તીયાણે મારી નાખ્યો.⁴⁰ઈયા માટે જીયા દ્રાક્ષાવાડીણો માલિક આવી તીયા તે ખેડૂતોણે કાજા કરી ?"

⁴¹તીણાહાય ઈસુણે કય કા,"તો દુષ્ટોહોય પૂરો નાશ કરી ! ને બીજા ખેડૂતો કા જે મોસમે તીયાણે ફળ પોંચાડે,તીયણાહાય દ્રાક્ષાવાડી ઈજારે આપી."⁴²પ્રભુથી બન્ય ને આપળે નજરમાં આશ્ચર્યકારક હા ; હી કાજા તુમાહાય શાસ્ત્રવચનમાં કદી નાથ વાચ્ય ?⁴³ઈયા માટે હાય તુમાહાય કતો હામ કા,ઈશ્વરણે રાજ્ય તુમારે પાંહેથી નેઈ નેવાય ને જે પ્રજા તીયાણે ફળ આપી,તીણાહાય તી આપાય.

⁴⁴ઈયા પથ્થર પાર જી પડી તીયાણે ટુકડે ટુકડા હોઈ જાય.ફણ જીયા પાર તી પડી,તીયાણે તો કચરી નાખી."⁴⁵મુખ્ય યાજકો તથા ફરોશીઓ તીયાણે દ્રષ્ટાંતો ઉનાઈને હમીજીયા કા તો આમારે સબંધી બોનતો હા.

⁴⁶એવો ઈસુણે ધરાવાણો રસ્તો હેત્તાં ફણ તે માણાહાય ડરી ગયા.કેહે કા માણાહાય ઈસુણે પ્રબોધક માનતાના .

Chapter 22

¹ઈસુએ પૂઠી તીણાહાય દ્રષ્ટાંતોમાં કય કા,

²સ્વર્ગાણે રાજ્ય એક રાજાણે જેવ હા.જીયે પોતાણા દીકરાણે લગ્નમાં ખાવાણો સમારંભ યોજાયો.

³ખાવાણે માટે મહેમાનોણે હાથણે તીયે પોતાણા ચાકરોણે મોકીના,ફણ તીણાહાય આવવાણ હોવા કાયની.⁴પૂઠી તીયે બીજા ચાકરોણે મોકનીને કય કા,મહેમાનોણે કયા,હેયા ,માળે મારે ખાવાણ તૈયાર કદ હા,મારે બળદો તથા પુષ્ટ પ્રાણીઓ કાપયાં હા ને બધી વસ્તુ તીયાર હા.વેવામાં આવા."⁵ફણ તીણાહાય તી ગણકાર્ય ની ;તે પોતે પોતાણે વાટે ચાનિયા ગયા,કોઈ તીયાણે પોતાણે ખેતામાં ને કોઈ પોતાણે ઘંધા પાર

⁶બાકીણાહાય તીયાણે ચાકરોણે ઘયરા ને તીયાણે અપમાન કરીને તીણાહાય મારી નાખયા.

⁷એટલે રાજા ગુસ્સે હોવો,તીયે પોતાણા લસ્કર મોકનીને તે હત્યારાહાય નાશ કદા ને તીયાણે નગર બાલી નાખય.⁸પૂઠી તો પોતાણા ચાકરોને કય કા,'વેવામાં ખાવાણ તીયાર હા ખર,ફણ મહેમાનો યોગ્ય નાથ.

⁹ઈયા માટે તુમે રસ્તાણે નાકા પાર જાઆ ને જતરા તુમાહાય મીલે તતરાહાય વેવામાં હાદા ;

¹⁰તિયાં ચાકરોએ બાર રસ્તાઓમાં જાઈને સારા નઠારા જતરા તીણાહાય મિલ્યાં તિયાં બધાહાય એકઠા કદા,એટલે મહેમાનોથી વેવામાં હાજર હોવે .

¹¹મહેમાનોણે હેદણે હારું રાજા અંદર આવો,તિયાં તિણાહાય તિયે લગ્નોણો વસ્ત્રો પહેર્યા વાગારનો એક માણાહાણે હેજજો.

¹²તીયા તે તીયાણે કતો હા કા,ઓ ભાઈ,તું વેવાણે વસ્ત્રો પહેર્યા વગાર ઈયે કેહે આવો ? તો ચૂપ રયો.¹³તીયા રાજાએ ચાકરોણે કય કા,તીયાણે હાથ પાગ બાદીને તીયાણે બાયરે અંધકાર ફેંકી દીયા ;તીયે રડવ ને દાંત પીસવ હોય ;

¹⁴કેહે કા હાદીને ઘણે હા,ફણ પસંદ કરીને થોડે હા."¹⁵તીયા પૂઠી ફરોશીઓએ જાઈને ઈસુણે કેવ રીતે વાતમાં ફસાવણે હીયા સબંધી મનસુબો કદો.

¹⁶પૂઠી તીણાહાય પોતાણા શિષ્યોણે હીરોદિઓ સહીત તીયાણે પાહાય મોકનીને કહડાવ્ય કા,"ઉપદેશક,આમે જાણતા હામ કા,તું હાયો હા,સત્યથી ઈશ્વરણો મર્મ હિખીવતો હા ને તુમે કોઈણે પરવા કરતો નાથ,કેહે કા તુમે માણાહા વચ્ચે પક્ષપાત કરતા નાથ.

¹⁷એટલે તુમે કાજા ધારતા હા ? કૈસરને કર આપવાણો ઉચિત હા કાઈની તી આમાહાય કચ ?"¹⁸ફણ ઈસુએ તીયાણે ભુડાઈ ઈરાદો જાણીને કય કા,"ઓ ઢોગીઓ,તુમે મારે પરીક્ષા કેહે કરતાં હા ?

¹⁹કરણે નાણું માને દેખાળા . "તીયા તે એક દીનાર તીયાણે પાહાય નાવા.²⁰ઈસુએ તીણાહાય કય કા."ઈ સૂરત તથા લેખ કીડાણે હા ?"

²¹તીણાહાય તીયે કય કા."કૈસર 'તીયા ઈસુએ તીણાહાય કય કા જી કૈસર હા તી કૈસરને ,ને જી કૈસરને ઈશ્વરનાં તી ઈશ્વરને ભરી આપા.

²²ઈ ઉનાયને તે નવાય પામયા,ને તીયાણે મૂકીને ભતા રચધા .²³તીયેજ દિહી સદ્ગુકીયો,જીયા કચતા હા કા મરણ પૂઠી પુનરુત્થાન નાથ,તીણાહાય તીયાણે પાહાય આવીને પૂછય.

²⁴ઓ ઉપદેશક,મુસાએ કય હા કા,જે કોઈ પુરુષ મરી જાય,તે તીયાણે ભાઈ તીયાણે સ્ત્રીણે હારી વેવા કરીને પોતાણો ભાઈણે હારું વંશ ઉપજાવે."²⁵તે આમારેમાં હાંત ભાઈ હોતના,ને પેલાં વેવા કરીને મરણ ગો.તો ની સંતાન હોવાથી પોતાણા ભાઈણે હારું પોતાણે પત્ની મૂકી ગો.

²⁶તીયા પરમાણે બીજો તથા તીજો એહે સાતેય મરણ પામાં.

²⁷બધાહાથી છેત્રે તે સ્ત્રી ફણ મરણ પામી.

²⁸ઈયા માટે પુનરુત્થાન પામીના પેલાં સાતમાંથી તે કીડાણે પત્ની હોવી ?

કેહ કા તે બધાજ ભાઈયોણે પત્ની હોવી હોતની."

²⁹તીયા ઈસુએ જવાબ આપયો કા,"પવિત્રશાસ્ત્ર તથા ઈશ્વરને પરાક્રમ ની જાયણાણે નીદે તુમ ભૂલ ખાતા હા.

³⁰કેહે કા પુનરુત્થાન પૂઠી તે વેવા કરતાં કા કરાવતાં કાયની,ફણ તે સ્વર્ગમાંણા સ્વર્ગદૂતો જેવા હોતા હા.³¹ફણ મરણ પામીનાહાય પુનરુત્થાન સબંધી,ઈશ્વરે જી તુમાહાય કય તી શું તુમાહાય કાયની વાંચ્ય ?

³²હાય ઈબ્રાહીમણો,ઈસહાકણો,તથા યાકુબણો ઈશ્વર હામ.'તો મરણ પામીનાહાય કાયની ફણ જીવતાઓણે ઈશ્વર હા."

³³માણે છે તી ઉનાયને તીયાણે બોધથી નવાઈ પામ્યા.³⁴જીયા ફરોશીઓએ ઉનાય કા તીયે સદ્ગુનીઓણે મુઉ બંદ કદે તીયા તે ભેગા હોવા.

³⁵તીયાણેમાંથી એક શાસ્ત્રીએ તીયાણે પરીક્ષા કરને હારું તીયાણે પૂછય કા,

³⁶ઓ ઉપદેશક,નિયમશાસ્ત્રમાં બધાહાથી મોટી આજ્ઞા કાણી હા."³⁷તીયા ઈસુએ તીયાણે કય કા,"પ્રભુ તોરે ઈશ્વર પાર તું તારે પુરા હૃદયથી,તોરે પુરા જીવથી તથા તોરે પુરા મનથી પ્રેમ કર.'

³⁸પેલી ને મોટી આજ્ઞા એ હા,³⁹બીજી આજ્ઞા હીયા જેવીજ હા,એટલે જેવો પોતા પાર તેવો પોતાણા પડોશી પાર તું પ્રેમ કર !

⁴⁰એ બે અજ્ઞાઓ સંપૂર્ણ નિયમશાસ્ત્ર તથા પ્રબોધકોણો પાપો હા."⁴¹હવે ફરોશીઓ ભેગા મિલીના હોતના,તીયા ઈસુએ તીયાણાચ એવે કય કા,

⁴²"ખ્રિસ્ત સબંધી તુમે કાજા ધારતા હા ? તે કીડાણે દીકરો હા ?"

તીયાણાચ તીયાણે કય કા,"દાઉદણો."

⁴³ઈસુએ તીયાણાચ કય કા,તે પવિત્રઆત્મા વડે દાઉદ તીયાણે પ્રભુ કેહે કતો હા ?'

⁴⁴જેહે કા પ્રભુ ઈશ્વરે મારે પ્રભુણે કય કા,તોરે શત્રુઓણે હાય તોરે પાગા તળિયે કર તીયે હુદી તું મારે જમણે હાયે બેહે."⁴⁵હવે જે દાઉદ તીયાણે પ્રભુ કતો હા,તો તી કેવી રીતે તીયાણે દીકરો કવાય ?"

⁴⁶એક ફણ વાતણે જવાબ કોઈ તીયાણે આપી શકીય કાયની,વલી તીયા દિવસથી કોઈએ તીયાણે કાંઈ પૂછવાણી હિંમત કરી ની.

Chapter 23

¹તીયા ઈસુએ લોકાહાય ને પોતાણા ચેલાહાય કય કા,

²"શાસ્ત્રીઓ ને ફરોશીઓ મુસાણે આસન પાર બેહેતા હા;

³હીયા હારું જી કાંઈ તે તુમાહાઈ કય,તી કરા ને પાલા ;ફણ તીયા હો કામથી દૂર રયા,કેહે કા તે જી બોનતા હા તીયા પ્રમાણે કરતાં નાથ.'કેહે કા ભારી ને પાલવાણ મુશ્કેલી પળે એવો બોજા તે માણાહાય બાંધાહ પાર ચઢાવતા હા,ફણ તો પોતે પોતાણી આગલીથી ફણ તીયાણે ખહીળને માંગતા નાથ;

⁵માણેહે તીણાહાય હેદતતે હેતુથી તે પોતાણે બદે કામ કરતાં હા;તે પોતાણા સ્મરણપત્રોની પલે બનાવતા હા ને પોતાણા નુગળાહાય કોરને વધારતા હા.⁶વલી ખાવાણી મુખ્ય જાગા,ને સભાસ્થાનોમાં મુખ્ય આસન,

⁷ને ચૌટાંઓમાં સલામને તીણાહાય 'ગુરુ ' કઈ એવ તીણા હાય ગમત હા,⁸ફણ તુમે પોતાણે 'ગુરુ' નખે કવળાવતા ;કેહે કા તુમારે એક જ ગુરુ હા ને તુમે બદા ભાહાં હા,

⁹પૃથ્વી પાર તુમે કોઈ માણાહાણે તુમારે બાપની કવાણો,કેહે કા એકજો સ્વર્ગમાં હા,તોજ તુમારે બાપ હા.

¹⁰તુમે પોતાણે 'સ્વામી ' ફણ નખે કવળાવતા,કેહે કા એકજી,જો ખ્રિસ્ત,તો તુમારે સ્વામી હા.¹¹ફણ તુમારામાં જે મોટો હા તો તુમારે સેવક બની.

¹²જો કોઈ પોતાણે ઉંચો કરી,તીયાણે નીચો કરવામાં આવી ; ને ભે પોતાણે નીચો કરી .તીયાણે ઉંચો કરવામાં આવી.¹³ઓ શાસ્ત્રીઓ તથા ફરોશીઓ,ઢોગીઓ,તુમાહાય અફસોસ હા ! કેહે કા માણાહાય આગાલ તુમે સ્વર્ગણારાજ્ય બંદ કરતાં હા ;કેહે કા તીયામાં તુમે પોતે પેસતા કાઈની,ને જી જાણે માંગતા તીયાણે તુમે જાવા દેતા કાઈની.

¹⁴ઓ શાસ્ત્રીઓ ને ફરોશીઓ,ઢોગીઓ,તુમાહાય અફસોસ હા ! કેહે કા તુમે વિધવાઓહોય ઘર ખાઈ જાતા હા.દેખાવો કરને લાંબી પ્રાર્થના કરતાં હા,તીયા હારુ તુમાહાય મોટી સજા ભોગીવવા પળી.

¹⁵ઓ શાસ્ત્રીઓ તથા ફરોશીઓ,ઢોગીઓ તુમાહાય અફસોસ હા ! કેહે કા એક ચેલો બનાવણે હારુ તુમે સમુદ્રને પૃથ્વીમાં ફિચરા કરતાં હા;ફણ તેવ હોવે ત્યાં તુમે તીયાણે તુમારે કરતાં વદારે નરકણો ફગીદાર બનાવતાં હા.¹⁶ઓ આદળાહાય દોરનારાઓ તુમાહાય અફસોસ હા ; કતાં હા કા,"જો કોઈ ભક્તિસ્થાનના સમ ખાય તે તીયામાં કાંઈ વાદોની ;ફણ જો કોઈ ભક્તિસ્થાનમાંણા સોનાણો સમ ખાય તો તીયાથી તો બાદાયનો હા ;

¹⁷ઓ મૂખને આદળાઓ,વધારે મોટ કાણ હા ? સોનો કા સોનાણે પવિત્ર કરનાર ભક્તિસ્થાન ?¹⁸ને તુમે કતાં હા કા,"યજ્ઞવેદીના સમ ખાય તો તીયામાં કાંઈ વદો કાઈની ; ફણ જો કોઈ તીયા ઉપરના અર્પણના સમ ખાય તે તો તીયાથી બાદાયનો હા ;

¹⁹ઓ આદળાઓ,વિષેશ મોટો કાણ હા ? અર્પણને પવિત્ર કરનારી યજ્ઞવેદી ?²⁰હીયા હારુ જે કોઈ યજ્ઞવેદીની સમ ખાય તો તે તીયાણે ને જી બધચ તીયા પાર હા,તીયાણો ફણ સમ ખાતો હા.

²¹જો કોઈ ભક્તિસ્થાનનો સમ ખાતો હા,તે તીયાણો ને તીયામાં જી મૂકીન હા તીયાણે ફણ સમ ખાતો હા,

²²જે સ્વર્ગના સમ ખાતો હા,તો ઈશ્વરનો આસનણા ને તીયા પાર બેસનારના ફણ સમ ખાતો હા,²³ઓ શાસ્ત્રીઓ,ફરોશીઓ,ઢોગીઓ તુમાહાય અફસોસ હા ! કેહે કા ફુદીનાણો,હુવાણો ને જીરાણો દસમા ભાગ તુમે આપતાં હા ; ફણ નિયમશાસ્ત્રની અગત્યણી વાતો,એટલે ન્યાય,દયા,ને વિશ્વાસ,તે તુમાહાય પળતા મુક્તા હા ; તુમારે ઈ કરવાણ,ને ઈયા હારી તે ફણ પળતા મુકવાણી જરૂર કાઈની હોતની.

²⁴ઓ આદલાંહાય દોરનારાઓ,તુમે મરછરણે ગાળી કાડતા હા ,ફણ ઉંટળાણે આખો ગીલી જાતા હા. !²⁵ઓ શાસ્ત્રીઓ ને ફરોશીઓ,ઢોગીઓ તુમાહાય અફસોસ હા ! કેહે કા તુમે થાલી ને વાટકો બાયરેથી સાફ કરતાં હા.ફણ તીયાણે અંદર જુલમ ને અન્યાય ભરીના હા.

²⁶ઓ આદલા ફરોશી તું પેલાં થાલી ને વાળકો અંદરથી સાફ કર કા.જેથી તો બાએરેથી ફણ સાફ હોઈ જાય.²⁷ઓ શાસ્ત્રીઓ ને ફરોશીઓ,ઢોગીઓ,તુમાહાય અફસોસ હા ! કેહે કા તુમે ઘોળેલી કબરના જેવા હા.જે બાએરેથી શોભાયમાન દેખતો હા ખરો,ફણ અંદરથી મારીનાહાય હાળકાને દરેક અશુદ્ધથી ભરીની હા.

²⁸તેહેજ તુમે ફણ માણાહાય આગાલ બાએરેથી ન્યાયી દેખાળતાં હા ખરા,ફણ અંદરથી ઢોગથી ને ભુડાઈધી ભરીના હા.²⁹ઓ શાસ્ત્રીઓ,ને ફરોશીઓ,ઢોગીઓ,તુમાહાય અફસોસ હા ! કેહે કા તુમે પ્રબોધકો હાય કબર બાદતાંહા ને ન્યાયીઓની કબર શણગારો છો.

³⁰ને કતાં હા કા,"જો આમે આમારે બાપદાદા હોય સમયમાં હોત,તો તીયાણે હારી પ્રબોધકોહોય હત્યાંણા ફગીદાર ની હોવતા ;

³¹તીયા હારુ પોતા વિષે સાક્ષી આપતાં હા કા પ્રબોધકોહાય મારી નાખનારાહાય દીકરા તુમેજ હા.³²તે તુમારે બાપદાદાહોય માય ફરી દિયા .

³³ઓ સર્પો,સપોણા વંશ નર્કની શિક્ષાથી તુમે કેવી રીતે બચાહા? ³⁴તુમે હેદહા,પ્રબોધકોને જ્ઞાનીઓને તથા શાસ્ત્રીઓને હાય તુમારે પાહી મોકીનતો હામ;તુમે તીયાણે માણા કતરાક જણાહાય મારી નાખવાહા,વધસ્તંભ જોળાવહા,તીયાણામાણા કતરાક તુમારે સભાસ્થાનમાં કોરડા મારાવી ને નગરે નગર તીણાહાય પાછાલ પળી.

³⁵કા ન્યાયી હાબેલના લોહીથી તે બારાખ્યાના દીકરા ઝખાર્યા,જીયાણે મંદિરની તથા યજ્ઞવેદીની વચ્ચે તુમાહાય મારી નાંખ્યો,તિયાણા લોહી હુદી જે બધા ન્યાયીઓહાય લોહી પૃથ્વી પાર વવળાવવામાં આવન તી તુમારે પાર આવી.

³⁶હાય તુમાહાય હારાજ કતો હામ કા,ઈ બધ ઇયા પેઢીણે માથે આવી. ³⁷ઓ યરુશાલેમ,યરુશાલેમ,પ્રબોધકોને મારી નાખનાર,તોરે પાહી મોકનીનાહાય પથ્થરે મારનારા જેહે મરઘી પોતાણે બચાહાય પાંખળા તલે ફેગે કરતી હા,તેહે તોરે છોકરાહાય એકઠે કરવાણ મયે કતરી વાર ચાહ્ય ;ફણ તુમાહાય ચાહ્ય કાઈની !

³⁸હેદા,તુમારે હારુ તુમારે ઘર ઉજજળ બની ગહા.

³⁹કેહે કા હાય તુમાહાય કતો હામ કા ;જ્યા હુદી તુમે એહે ની કહા કા,'પ્રભુણે નામ જો આવતો હા તો આશીર્વાદિત હા,ત્યાં હુદી હવેથી તુમે મને ની દેખાહા."

Chapter 24

¹ઈસુ ભક્તિસ્થાનમાંથી નીકલીને માર્ગે ચાલતો નો,તિયાં તિયાણા ચેલા તીયાણે ભક્તિસ્થાનમાંણા બાંધકામ દેખાળને હારુ પાહી આવા.

²તીયા તીયાણાય જવાબ આપયો કા, કામ તુમે ઈ બદઅ કાયળી દેખતા? હાઈ તુમાહાય હાય જ કતો હામ કા, વાડી ની નાખાય, એવ અકે ણ પથરો બીજા પાર ની રઅવા દેવાય ની .³પૂઠી જૈતુનનાં ડોગરા પાર ઈસુ બેઠો ને,તીયે ચેલા એકાંતમાં તિયાં પાહી આવીને કય કા,"ઈ બદ ક્યા હોવી ? ને તોરે આવવાણી ને જગતણો અંતણી કાજા નિશાની હોવી ? તી અમાહાય કઅ ."

⁴ત્યાં ઈસુએ જવાબ આપતાં તીયાણાય કય કા,"તુમાહાય કોઈ ની છેતરે માટે સાવધાન રઅમકા, તુંકોઈ ભુ લાવે ની .

⁵કેહે કા મારે નામથી ઘણાં એહે કતાં આવી કા,'હાય તે ખ્રિસ્ત હામ ;ને ઘણાંહાય છેતરી.⁶યુદ્ધો ને યુદ્ધોની અફવાઓ તુમે ઉનાહાં,તીયે તુમે,ખાબરાતા નખા ;કેહ કા હી બદ હોવાણી અગત્ય હા,ફણ હતરેથી જ અંત ની આવે.

⁷કેહે કા પ્રજા પ્રજાણે વિરુદ્ધ ને રાજ્ય રાજ્યણે વિરુદ્ધ ઊઠી,દુકાળો ને જગ્યા જગ્યાએ ધરતીકંપ હોવી.

⁸ફણ ઈ બદ તે માત્ર મોટા દુઃખણો સમય હા.⁹ત્યાં તે તુમાહાય શિક્ષા હારું હોપી ને તુમાહાય મારી નાખી. મારે નામણે નેદે બદી પ્રજાઓ તુમારે તિરષ્કાર કરી.

¹⁰ને તિયાં સમયમાં ઘણાં લોકો વિશ્વાસ ગુમાવી દેઈ,ને એકબીજાણે પરાધીન કરાવી ને એકબીજા પાર વૈર રાખી.

¹¹હમટા જુઠા પ્રબોધકો ઊઠી,ને હમટાહાય ભૂનીવામાં આવી.¹²દુષ્ટતાં વધી જવાણા કારણથી ઘણાંખરહાય પ્રેમ ઠંડો હોઈ જાય.

¹³ફણ જી છેન્ને હુદી ટકી તી તારણ પામી.

¹⁴બધી પ્રજાઓણે સાક્ષીરૂપ હોણે હારું ઈશ્વરણા રાજ્યણી એ સુવાર્તા આખી દુનિયામાં પ્રગટ કરાય ;તિયાં અંત આવી.¹⁵ઈયા હારુ ઉજ્જડની અમંગલપણાની નિશાની જીયા સબંધી દાનિયેલ પ્રબોધકે કયન હા,તીયાણે જીયા તુમે પવિત્રજીયાણો ઉભી રાખની હેદહા (જી વાંચી તે સમજી) ,

¹⁶તિયાં જે યહૂદીયામાં હોય તે ડોગરા પાર નાહી જાય,

¹⁷ધાબા પાર જી હોય તી પોતાણે ખરણો સામાન નેણે ની ઉતરી.

¹⁸ને જી ખેતાહામાં હોય તી પોતાણે વસ્ત્ર નેણે પાછો ની આવે.¹⁹તિયાં દિહમાં જો ગર્ભવતી હોય ને જે ને ધપડાવતી હોય તીઈણે અફસોસ હા ;

²⁰ફણ તુમારે નાસવુ હિયાલામાં કા વિશ્રામવારે ની હોય,તિયાં માટે તુમે પ્રાર્થના કરા.

²¹કેહે કા તિયાં સમયે એવી મોટી આફત આવી પડી કા તિયાં જેવી સૃષ્ટિણા આરંભથી તે આજે હુધી આવી કાયની,ને કોઈદિહી આવી ફણ ની.

²²ને જો તે દિહી ઓછા કરવામાં ની આવતાં તે કોઈ ફણ માણહું બચી ની હકતાં ફણ પસંદ કરીનાહાય ખાતર તે દિહી ઓછા કરાયા.²³તિયાં જો કોઈ તુમાહાય કય કા,'હેદા,ખ્રિસ્ત ઈયા હા 'અથવા ખ્રિસ્ત તીયે હા.'તો તુમે માનતે નખા .

²⁴કેહ કા જુઠા મસિહ તથા જુઠા પ્રબોધકો ઊઠી,ને મોટા ચમત્કાર ચિન્હો તથા આશ્ચર્ય કામો કરી દેખાડી કા જો બની હકે તે પસંદ કરીનાહાય ફણ તે ભૂનવી હકી.

²⁵હેદા,માયે આગાલથી તુમાહાય કય કા.²⁶ઈયા માટે જો તે તુમાહાય કય કા,હેદા,તો રાનમાં હા ;તે બાર જાતા નખા;હેદા,તો ઓરડીમાં હા ;તીયા માનતા નખા.

²⁷કેહકા જેહે વીજળી પૂર્વથી નીકલીને પશ્ચિમ હુધી ચમકીતી હા,તેહેજ માણાહાણા દીકરાણે આવવાણા હોવી.

²⁸જીયા મરીને હોય,તીયે ગીધો ભેગા હોય.²⁹તિયે દિહીહાણે વિપત્તી પૂઠી,તરત સૂર્ય અંધકારરૂપ હોઈ જાય ;ચંદ્ર પોતાણે હુજાલ ની આપે ને આકાશણે તારાં ખરી,ને આકાશણા પરાક્રમો હોનવાય .³⁰પૂઠી માણહાય દીકરાણે નિશાની આકાશમાં દેખાઈ તિયાં ધરતી પાહાણા બધા કુળો શોક કરી ;ને માણહાય દીકરાણે પરાક્રમ તથા મહિમા સહીત ને આકાશણા વાદલા પાર આવતો હેદી.

³¹રણશિંગડાણા મોટા અવાજ સહીત તે પોતાણે સ્વર્ગદૂતોહોય મોકની,તે મારે દિશાંમાંથી,આકાશણા એક છેડાથી તે બીજા છેડા હુદી,તીયાણે પસંદ કરીનાહાય ભેગા કરી.³²હેવે અંજીર પારથી તીયાણે દ્રષ્ટાંત હીખા.જીયા તીયાણે ડાલી કમલી હોય ને પાંદડા ફૂટી નીકીલતા હા,તિયાં તુમે જાણતા હા કા ઉનાલો પાહાય હા.

³³એહેજ તુમે ફણ જીયા તી બધ હોતા હેદહા,તિયાં તુમારે જાણવાણ કા.'તી પાહાય એટલે બારા આગાલુજ હા.³⁴હાય તુમાહાય હામજ કતો હામ કા,તી બદ પુર ની હોવી તીયે હુધી એ પેઢી મરણ પામી ની.

³⁵આકાશ તથા પૃથ્વી નાશ પામી,ફણ મારે વાત પૂરી હોયા વગાર રય ની.³⁶ફણ તે દિહી તથા તે ઘડી સબંધી પિતા વગાર કોઈ ફણ જાણત કાયની.આકાશમાંણા સ્વર્ગદૂતોહોય ની તેહેજ દીકરાણે ફણ ની.³⁷જેહે નુહણા સમયમાં હોવ,તેહે જ માણસણા દીકરાણે આગમન ફણ હોવી.

³⁸કેહે કા જેહે જળપ્રલયને આગાલ નુહ વહાણમાં બેઠો તિયાં હુદી તે ખાતા,પીતા,પરણતા,પરણાવતા હોત;

³⁹ને જળપ્રલય આવીને બધાહાય તાણી નેઈ ગો.તિયાં હુદી તે ની હમજીયા,તેહે જ માણસણા દીકરાણે આવવાણ ફણ હોવી.⁴⁰તિયાં સમયે બે માણુંહું ખેતામાં હોય તીયામાણો એક નેવાઈ તથા બીજો પડતો મુકાય.

⁴¹બે સ્ત્રીઓ ઘંટીએ દલતી હોય તીયામાણી એક નેવાઈ ને બીજી પડતી મુકાય.

⁴²માટે જાગતા રયા,કેહકા તુમે જાણતા કાયની કા કાણે દિહી તુમારે પ્રભુ આવી રયો હા.⁴³ફણ જાણા કા ચોર પહોરે આવી,એજ ખરણો માલિક જાણતો હોય,તો તે જાગતો રય ને પોતાણે ઘરમાં ચોરી કરવા ની દેઈ.

⁴⁴ઈયા માટે તુમે ફણ તીયાર રયા ;કેહે કા જીયા સમયે તુમે ધારતા કાયની તિયાં જ સમયે માણાહાણે દીકરો આવી.⁴⁵તો જે ચાકરને તેયાણે માલિક પોતાણે ઘરનાહાય સમયસર ખાવાણ આપણે હારું પોતાણે ખરણો કરભારી કરાવ્યો હા.હેવો વિશ્વાસુ તથા બુદ્ધિમાન ચાકર કીડો હા ?

⁴⁶જીયા ચાકરને તીયાણે માલિક આવીને એહે કરતો હેદી,તો ચાકાર આશીર્વાદિત હા.

⁴⁷હાય તુમાહાય હાય જ કતો હામ કા,તો તુને પોતાણી બધી સંપત્તીણો કારભારી ઠરાવી.⁴⁸ફણ જો કોઈ દુષ્ટ ચાકર પોતાણ મનમાં કય કા,'મારે માલિકણે આવવાની વાર હા.'

⁴⁹ને તો બીજા ચાકોહોય મારને તથા છાકટાહાય હારી ખાણે પીણે લાગો ;

⁵⁰તો તે જ દિહી તો તીયાણે વાટ હેતો નાથ ને જો સમય તો જાણતો નાથ.તેજ સમયે તીયાણે માલિક આવી.

⁵¹તો તુને કાપી નાખી ને તીયાણે ભાગ ઢોગીઓણે હારી ઠરાવી,તીયે રડવાણ તથા દાંત પીહીવાણ હોવી.

Chapter 25

¹તીયા સ્વર્ગણે રાજ્ય દહ કુંવારીહીય જેવ હા,તે પોતાણે મશાલો નેઈને વરરાજાણે મિલ્લે હારું બાયરે ગોઈ.

²તીણેમાણી પાંચ મુખી હોતની ને પાંચ બુદ્ધિવાલી હોતની.

³મુખી કુંવારીહીય પોતાણે મશાલ નેદી ખરી,ફણ તીણીહીય હારી તેન નેદ કાઈની ;

⁴ફણ બુદ્ધિવાલીહીય પોતાણે મશાલો હારી કૂપીમાં તેન નેદ.⁵વરરાજાણે આવતાં વાર નાગી હતરામાં તે બદીજ ઝોકા ખાયને હુવી ગોઈ.

⁶અરદીરાતે બૂમ પડી હેદા કા,'જુઓ,વરરાજા આવો હા ! તીયાણે મિલને નીકલા."⁷તીયા તે બદી કુંવારીહીય ઊઠીને પોતાણે મશાલો તીયાર કદી.

⁸મુખીહીય બુદ્ધિવાલીહીય કય કા,'તુમારે તેનમાંથી આમાહાય આપા,કેહ કા આમારે મશાલો ઉનવાઈ જાતી હા.'

⁹ફણ બુદ્ધિવંતીહીય જવાબ આપતાં કય કા,'કદાય આમાહાય ને તુમાહાય પુર ની પડે,માટે તુમે વેચનારાહાય પાહાય જાઈને પોત પોતાણે ફાગ તેન વેચાત નેયા."¹⁰તે તેન નેણે ગોઈ અતરામાં વરરાજા આવી રયો,જી તીયાર હોતની તે તીયાણે હારી લગ્નજમણમાં ગોઈ ને બાર બંધ કરવામાં આવ.

¹¹પૂઠી મૂર્ખ કુંવારીહીય આવીને કય કા,'ઓ સ્વામી,સ્વામી,આમારે હારુ ઉઘાડ."

¹²ફણ તીયે જવાબ આપતાં કય કા,'હાય તુમાહાય નિશ્ચે કતો હામ કા હાય તુમાહાય ઓલખીતો કાયની.

¹³માટે તુમે જાગતા રયા,કેહ કા તો દિહી અથવા તી ઘડી તુને જાણતે નાથ."¹⁴કેહે કા તીયાણે આવાણ એક માણહાણે જેવ હા,જીયે પરદેશ જાતી વખાતે પોતાણે ચાકરોહીય હાદીને પોતાણે સંપત્તિ તેણાહાય હોપી.

¹⁵એકણે તીયે પાંચ તાલંત,બીજાણે બે નેત્રીબણે એક તીયાણે શક્તિ પ્રમાણે આપય ;ને તો પરદેશ ગો.

¹⁶પૂઠી જીયાણે પાંચ તાલંત મીલયા હોતના,તો તરત જાઈને વેપાર કરીને તીયા વડે બીજા પાંચ તાલંત કમાયો.¹⁷તેહે જ જીયાણે બે,તો ફણ બીજા બે તાલંત કમાયો.

¹⁸ફણ જીયાણે એક તાલંત મીલીનો હોતનો તીયે જાઈને જમીનમાં ખોદીને પોતાણે માલિકણે નાણાં દાટી રાખય.¹⁹હવે લાંબા સમય પૂઠી તીયા ચાકરોણે માલિક આવો,તીયા તીયે તીણે પાહાયથી હિસાબ માગયો.

²⁰તીયા જીયાણે પાંચ તાલંત મીલીના હોતના તો બીજા પાંચ તાલંત ફણ નેતો આવો,તીયે કય કા 'માલિક,તુયે મને પાંચ તાલંત આપીના હેદા ;જુઓ હાય તીયા ઉપરાંત બીજા પાંચ તાલંત કમાયો હામ.

²¹તીયા તીયાણે માલિક તીયાણે કતો હા કા,'શાબાશ,સારા ને વિશ્વાસુ ચાકર ! તું થોડામાં વિશ્વાસુ માલુમ પયડો હા;હાય તુને ઘણાં પાર ઠરાવીહી,તોરે પ્રભુના આનંદમાં પ્રવેશ કર."²²જીયાણે બે તાલંત મીલીના,તીયે ફણ મેરે આવીને કય કા,'માલિક,તુયે મને બે તાલંત આપીના હોતના,જો,હાય તીયા ઉપરાંત બીજા બે તાલંત કમાયો હામ.'

²³તીયાણે માલિકે તીયાણે કય કા,'શાબાશ,હાર વિશ્વાસુ ચાકર ! તું થુનામાં વિશ્વાસુ માલુમ પયળો હા ;હાય તુને ઘણાં પાર ઠરાવીહી,તોરે પ્રભુના આનંદમાં પ્રવેશ કર."²⁴પૂઠી જીયાણે એક તાલંત મીલીને હા,તીયે ફણ પાહાય આવીને કય કા,'પ્રભુ મયે હેદજ કા તું એવો કઠોર માણહ હા કા,જીય તુયે નાથ વાવ્ય તીનથી તું કાપનારો ને જીયે તુયે નાથ વેયર તીનથી તું એકઠ કરનાર હા.

²⁵માટે મને બીક નાગી ને જાઈને તોરે તાલંતણે મયે જમીનમાં દાટી રાખય,જો તુને તોરે તાલંત પહોચાડીયા.²⁶ને તીયાણે માલિક જવાબ આપતાં તીયાણે કય કા,અરે દુષ્ટ ને આળસુ ચાકાર જીય મયે નાથ વાવ્ય.તીનથી હાય કાંપતો હામ ને જીનથી મે નથી વેર્યું તીનથી હાય એકઠ કરતો હામ,એહ તું જાણતો હોતનો;

²⁷તીયા તોરે મારે નાણાં શાહુકારોણે આપવા જોજતાના કા હાય આવ તીયા મને વ્યાજ હારી પાછ મીલતા.²⁸ઈયા માટે તીયાણી પાહાયથી તાલંત નેઈને જીયા પાહાય દસ તાલંત હા તી તીયાણે આપા.

²⁹કેહે કા જેયાણે પાહાય હા તી બદાહાય આપાય ને તીયા પાહાય પુષ્કળ હોવી;ફણ જિયા પાહાય નાથ તીયા પાહાય જી હા તી ફણ નેઈ નેવાય.

³⁰તે નકામાં ચાકરને બાયરેણાં અંધકારમાં નાખી દેયા,તીયા તીયાણે રડવાણ ને દાંત પીસવાણ હોવી."³¹જીયા માણહાણે દીકરા પોતાણે મહિમામાં બદા પવિત્ર સ્વર્ગદૂતો હારી આવી,ત્યારે તી પોતાણે મહિમાણે રાજયાસન પાર બેહેય.

³²બધી દેશજાતિઓ તીયાણે આગાલ એકઠી કરાય;ને જેહ ઘેટાંપાલક ઘેટાણે બોકડાથી જુદ પાડતો હા,તેહ તી તીણાહાય એકબીજાથી જુદો પાડી.

³³. ને ઘેટાણે તો પોતાણે જમણે હાથે,ફણ બોકડાણે ડાબે હાથે રાખી.³⁴ તીયા રાજા પોતાણે જમણી પાહાયણાહાય કઈ કા,'મારે પિતાણે આશીર્વાદિતો તુમે આવા,જી રાજ્ય સૃષ્ટિણે પાયો નાખ્યા પેલાં તુમારે ફાગ તીયાર કરીન હા,તીયાણે વારસો નેયા.

³⁵કેહે કા હાય ભૂખો હોતનો,તીયા તુમાહાય મને ખવડાવ્ય;હાય તીરહો હોતનો તીયા તુમાહાય મને પાણી પાય હા ;હાય પારકો હોતનો ;તીયા તુમાહાય મને પાવણો રાખયો ;

³⁶હાય નાગો હોતનો,તીય તુમે મને નુગડે પેરાવ્યે ;હાય માંદો હોતનો તીયા તુમે મને ચાકરી કરી;હાય જેલમાં હોતનો,તીયા તુમે મને મીલને આવો ."³⁷તીયારે ન્યાયીઓણે તુમાહાય જવાબ આપી કય કા,'પ્રભુ,કીયા આમાહાય તુને ભૂખો હેદીને ખાવડાવ્ય,તીરહો હેદીને કાંઈ પાણી પીવડાવ્ય ?

³⁸કીયા આમાહાય તુને પારકો હેદીને પાવણો રાખયો,નાગા હેદીને નુગડે આપયે ?

³⁹કીયા આમાહાય તુને માંદો ને જેલમાં હેદીને તુને મિલને આવો ?

⁴⁰તીયા રાજા તીણાહાય જવાબ આપી,'હાય તુમાહાય સાચ કતો હામ કા,'ઓ મારો ભાઈયોમાણો બચજ નાનાહામાંથી એકણે તુમાહાય કદ એટલે તી મને કદ.

⁴¹'પૂઠી ડાબી ફણનાહાય ફણ તીયે કય કા ,'ઓ શાપિતો,'જી અનંતઅગ્નિ શેતાન ને તીયાણે દૂતોણે ફાગ તીયાર કદન હા,તીયામાં તુમે મારે આગાલથી જાયા,

⁴²કેહે કા હાય ભૂખો હોતનો,ફણ તુમાહાય મને ખાવડાવ્યા કાઈની,હાય તીરહો હોતનો,ફણ તુમાહાય મને કાંઈ પીણે ફાગ આપાય કાઈની ;

⁴³હાય પારકો હોતનો,ફણ તુમાહાય મને પાવણો રાખયો કાઈની ;નાગો હોતનો,ફણ તુમાહાય મને નુગડે પેરાવયે કાઈની ;માંદો હોતનો ને જેલમાં હોતનો,ફણ તુમાહાય મારે ચાકરી કાઈની કરી."⁴⁴તીયા તી ફણ તીયાણે જવાબ આપતાં કઈ કા,'પ્રભુ,કીયા આમાહાય તુને ભોખો તરીહો,પારકા,નાગો,માંદો કે જેલમાં હેદીને તોરે સેવા નાથ કરી ?"

⁴⁵તીયા ઈસુ તીણાહાય જવાબ આપતાં કય કા,'હાય તુમાહાય ચોખીજ કતો હામ કા,'હી બચજ નાનાહામાંથી એકણે તુમાહાય તી કદ કાઈની,એટલે તી મને કચર કાઈની.

⁴⁶તી અનંતકાળીક સજા ફણ જાઈ,ફણ ન્યાયીહીય અનંતજીવનમાં જાઈ.

Chapter 26

¹ઇસુએ બધી વાત પૂર પૂરી કરી તિયે એહે હોવં કા તિયે પોતાણાં ચેલાહાય કય કા,

²" તુમે જાણતાં હા કા બે દિહા પુઠી પાસ્ખાપર્વ હા, ને માણસણો દિકરો વધસ્તંભે જોળી દેણે હારુ પરાધીન કરવામાં આવી"³પૂઠી મુખ્ય યાજકો ને લોકાહાય વડીલો કાયાફા નામે પ્રમુખ યાજકની કચેરીમાં એકઠાં હોવા.

⁴ઇસુણે કપટથી થરીને મારી નાખણે હારુ તિયણાહાય મનસબો કદો.

⁵ફણ તિયણાહાય કય કા, ' પર્વમાં કાયની, નેતે પુઠી માણાહામા હુલ્લડ હોવી જાઇ. "⁶ઇસુ બેથાનિયામાં સિમોન કોઢિયાના ખરમાં હોતનો,

⁷તે ખાણે બેઠનાં હોતનાં તિયાં એક સ્ત્રી મુલ્યવાન અંતરની સંગેમરમરણી ડબ્બી નેઇને તિયા પાહિ આવી. ને તિયાણે માથા ઉપાર અત્તર રેડીય.

⁸જ્યાં તિયાણે ચેલાહાય તી દેખ્યં તીયા તિણાહાય ગુસ્સે હોવીને કય કા, " હી બગાળ કાજા ખરને કદો?

⁹કેહેકા હી અત્તર ખણં મગં વેચાત ને તે પચાહા ગરીબાહાય આપતાં. "¹⁰તિયા ઇસુએ તી જાણીને તિણાહાય કય કા, " ઈથી સ્ત્રીણે તુમે કેહે સતાવતાં હા? કેહે કા તિયે તે મારે હારુ હાર કામ કદ હા.

¹¹કેહે કા ગરીબો કાયમ તુમારે હારી હા, ફણ હાય કાયમ તુમારે હારી કાઈની.¹²તિયે અત્તર મારે શરીર પાર રેળીયં તી કામ તે મારે દફનની તૈયારીણે હારુ કદ હા.

¹³હાય તુમાહાય હાયું કતો હામ હા, ' એ સુવાર્તા આખી દુનિયામાં કોઈ બી જાગે પ્રગટ કરવામાં આવી તીયા તીયે જી કાઈ બી કદ હા તી બી તિયણે યાદગીરીણે હારું કવામાં આવી.¹⁴તિયાં યહૂદા ઇશ્કારિયોત નામે બાર ચેલાહામાણો એક મુખ્ય યાજકોહોય પાહી જાઇને કય કા,

¹⁵" તિયણાહાય તુમારે સ્વાધીન કરં તે તુમે માને કાજા આપણે રાજી હા? "તિયણાહાય તિયાણે યાંદીણા તીહિં સિક્કા તોલી આપ્યા.

¹⁶તિયા પુઠી તો ઇસુણે પરસ્વાધીન કરવાણી તક હેદણે લાગો.¹⁷બે ખમીર રોટની પર્વણે પેલા દિહે ચેલાહાય ઇસુ પાહી આવીને કય કા, " આમે તોરે હારુ પાસ્ખાખાવાણી તીયારી કાં કરજે ? તોરે કાજા ઇચ્છા હા? "

¹⁸તિયા ઇસુએ કય કા, " નગરમાં ફલાણા જે પાહી જાઈને તિયાણે કયા, ' ઉપદેશક કતો હા કા " મારે સમય પાહી આવો હા, હાય મારે ચેલાહા હારી તોરે ખર પાસ્ખા પાળવાણો હામ.

¹⁹ઇસુએ ચેલાહાય જેહે આજ્ઞા આપીની, તેહે તિણાહાય કરીય ને પાસ્ખા તીયાર કરીય.²⁰હાંજ પળી તીયા બાર ચેલાહા હારી ઇસુ ખાણે બેઠો નો.

²¹તે ખાતના તિયા તિણાહાય કય કા, " હાઇ તુમાહાય હાયું કતો હામ કા, તુમારે માંથી એક મને પરસ્વાધીન કરાવી."

²²તિયા તે બદા ખણાં દુઃખી હોવા ને તિણાહોયમાંથી બદાજ તિયાણે કણે લાગા કા, "પ્રભુ, શું તો હાઇ હામ કા કેહે?"²³ઇસુએ જવાબ આપતાં કય કા, " જીયે મારે હારી થાલામાં હાથ મૂક્યો હા તોજ માને પરાધીન કરાવી.

²⁴માણસણાં દિકરા સંબંધી જેવ નખીન હા તેહે તો જાતો હા ખરો; ફણ જીયાં માણાહાથી માણાહાણો દિકરો પરાધીન કરાતો હા. તિયાણે અફસોસ હા! જો તો માણસ જન્મ્યો ની હોત, તે તિયા માટે વધારે હાર હોતન. "

²⁵તિયા તિયે પરસ્વાધીન કરાવનાર યહૂદાએ પૂછ્ય કા, " ગુરુજી, શું તો હાય હામ કા? " ઇસુએ તિયાણે કય કા, " તુ પોતે જ કતો હા. "²⁶તે ખાયા કરતા હોતના તીયા ઇસુએ રોટની નેઇને, આશીર્વાદ માગીને ફાંગ્ય ને શિષ્યોણે આપીને કય કા, નેયા, ખાયા, ઇ મારે શરીર હા. "²⁷પુઠી ઇસુએ ખ્યાલો નેઇને આભાર માનીયો ને તિણાહાય આપતાં કય કા, તુમે બધા ઇયામાંથી પીયા, "

²⁸કેહેકા હી નવા કરારને મારે લોય હા, જી પાપોણે માફીણે ફાગ ખણાંહાય ફાગ વવાડવામાં આવ હા.

²⁹હાય તુમાહાય કતો હામ કા, હાય મારે પિતાણે રાજ્યમાં તુમારે હારી નવો દ્રાક્ષારસ ની પીમ, તી દિહી હુદી હવે પૂઠી તી પીવાણો જ કાયની.³⁰તીયા ગીત ગાયા પૂઠી જૈતુનણે ડોગરાં પાર ગયા.

³¹તીયા ઇસુએ તિણાહાય કય કા, "તુમે બધા આજે રાતીણા મારા સંબંધી ઠોકર ખાશો, કેહે કા એહે નખીન હા કા ' હાય ઘેટાંપાળકણે મારીહી ને ટોલાણે ઘેટે વિખેરાઇ જાય."

³²ફણ મારે ઉઠ્યા પૂઠી હાય તુમારે આગાલ ગાલીલમાં જાહાઇ."³³તીયા પિતરે જવાબ આપતાં ઇસુણે કય કા, " જો બધે તુને છોડી દેઇ, તો બી હાય તોરેથી આગો ની હોમ. "

³⁴ઇસુએ તીયાણે કય, " હાય તુને હાયુ જ કતો હામ કા, આજે રાતીણો મરઘો બોનીયા પેલા, તીન વાર તું મારે નકાર કરે હે.

³⁵પિતરેતીયાણે કય કા, " જો મારે તોરે હારી મરવા પડે તીયે બી હાય તોરે નકારનીજ કર. " બધાં શિષ્યોએ બી તેહે જ કય. ³⁶તીયા ઇસુતીયાણે હારી ગેથસેમાની નામણે જાગાએ આવો. ને શિષ્યોણે કય કા, હાય તીયે જાઈને પ્રાર્થના કર તીયા હુદી તુમે ઇયે બેહા. "

³⁷પિતરને ને ઝબદીણા બે ડીખરાહાય હારીનેઈને ઇસુ પોતે દુંખી ને નીરાશ હોણે લાગો.

³⁸પૂઠી ઇસુએ તીણાહાય કય કા, મારે જીવ મરણે જેવો ખણો દુંખી હા. તુમે ઈયે રયને મારે હારી જાગતા રયા. ³⁹પૂઠીતીયે થોડે આગે જાઈને મુઠિ નમાવીને પ્રાર્થના કરતા કય કા, ઓ મારે પિતા, જો બની હકે તે ઓ પ્યાલો મારેથી આગે કર; તો બી મારે ઇચ્છા પ્રમાણે ની ફણ તોરે ઇચ્છા પ્રમાણે હોવે. "

⁴⁰પૂઠી ઇસુ શિષ્યોણે પાહાય આવો ને તીણાહાય હુવતાહેઈને પિતરને કય કા, " તુમે એક કલાક બી મારે હારી જાગતા રય હકતા કાયની કા?

⁴¹તુમે જાગતા રયા ને પ્રાર્થના કરા કા પરીક્ષણમાં ની પડાત; આત્મા તત્પર હા ખરો, ફણ શરીર નિર્બળ હા. ⁴²બીજી વાર ઇસુએ જાઈને પ્રાર્થના કરતા કય કા, " ઓ મારે બાપ, જો ઓ પ્યાલો મારે પીધા વગાર મારે પાહીથી આગે હોઈ ની હકે તે તોરે ઇચ્છા પ્રમાણે હોવે. "

⁴³ઇસુએ બીજી વાર આવીને તીણાહાય હુવતા હેજજા; કેહેકા તીણાહાય ડોલા ઊંઘથી ફરાઈની હોત ના .

⁴⁴ઇસુ પાસો શિષ્યોણે મૂકીને પ્રાર્થના કરીને ગો, ને ત્રીજી વાર એજ વાત કતા તીયે પ્રાર્થના કરી. ⁴⁵તીયા તે પોતાણા શિષ્યોણે પાહી આવીને તીણાહાય કય કા, આજુ બી તુમે હુવતાં હા ને આરામ કરતા હા? હેદા, સમય પાહી આવો હા, માણસણો દીકરાણે પાપીહાય હાથમાં પરાધીન કરાય.

⁴⁶ઊઠા આપળે જાતા; હેદા, માને થરાવનારો આવી રયો હા. ⁴⁷તો આજુ બોનતો નો, હતરામાં હેદા, બાર શિષ્યોમાંણો એક, એટલે ચહૂદા, આવો; તીયાણે હારી મુખ્ય યાજકોણે ને નોકાહાય વડીલોણે પાહીથી ખણે નોકે તલવારો ને નાકડીઓ નેઈને આવ્યો.

⁴⁸હવે તીયાણે પરસ્વાધીન તીયાણે નિશાની આપી હોતની કા, " હાય જીયાણે ચુંબન કર તે જ તે હા; તીયાણે થરી નેજા. ⁴⁹તરાત તીયે ઇસુ પાહાય આવીને કય, ' ગુરુજી સલામ' ને તો તીયાણે ચૂમ્યો.

⁵⁰ઇસુએ તીયાણે કય કા, " મિત્ર, જી કરાવણે તું આવો હા તી કર." તીયા તીયાએ પાહી આવીને, ઇસુ પાર હાથ નાખીને, તીયાણે થરપકડ કરાવી. ⁵¹પૂઠી હેદા, ઇસુણે સાથીઓમાણા એકે હાથ લાંબો કદો ને પોતાણી તલવાર ખેંચી કાઢી ને પ્રમુખ યાજકણે ચાકાર પાર હુમલો કદો ને તીયાણે કાન કાપી નાખ્યો.

⁵²તીયા ઇસુએ તીયાણે કય કા, " તોરે તલવાર મ્યાનમાં પાછી મૂક; કેહે કા જો તલવારથરતો હા તો તલવારથી નાશ પામી.

⁵³કા તું થારતો હા કા હાય બાપણે પાહાય એવ કાયની માંગી હકતો કા તો અમીજ સૈન્યણે બાર જૂથો કરતાં વધારે સ્વર્ગદૂતોણે મારે પાહી મોકની દે?

⁵⁴તો શાસ્ત્રવચનોમાં જી નાખીન હા કા, એવ હોવા જોજે, તી કેહે પૂર હોવી? ⁵⁵તીયા જ સમયે ઇસુએ માણાહાય કય કા, " તુમે તલવારો ને નાકડીઓ નેઈને જેહે ચોરને થરતે હા તેહેમને થરણે નીકલી આવા હા કા? હાય રોજેજ ભક્તિસ્થાનમાં બેહીને બોધ કરતો નો; તીયા તુમાહાય મને થરાવ્યો કાયની .

⁵⁶ફણ પ્રબોધકોણે લેખો પુર હોવે એટલે ઇ બધ હોવ હા. "તીયા બધા શિષ્યો ઇસુણે મૂકીને જાતા રયા. ⁵⁷પૂઠી જીયાએ ઇસુણે થરાવ્યો, તે જીયે શાસ્ત્રીઓ ને વડીલો ફેગાં હોવા ના તીયે કાયાફા પ્રમુખ યાજકણે પાહાય તીયાણે નેઈ ગયા.

⁵⁸પિતર આગેથી તીયાણે પાછાલ પ્રમુખ યાજકણે આગણે હુધી ચાન્યો ને અંદાર જાઈને ઇસુણે કાજા કરી તી હેદણે ચોકીદારોણે હારી બેઠો. ⁵⁹મુખ્ય યાજકોએ ને આખા ન્યાયસભાએ, ઇસુણે મારી નાખણે, તીયાણે વિરુદ્ધ જૂઠી શાહેદી હેદી.

⁶⁰જોકે ખણાં જૂઠાં સાક્ષીઓ આવા, ફણ તીયાણે સાક્ષીઓથી તે સહમત હોવા કાયની, ફણ પાછાલથી બે માણાહા આવીને બોન્યા કા,

⁶¹" ઈયા માણસે કય હોતન કા, 'હાય ઈશ્વરણે સભાસ્થાનને પાડી નાખણે ને તીન દિહીમાં તીયાણે પાછ બાધણે સમર્થ હામ." ⁶²તીયા પ્રમુખ યાજકે ઉભો રયને તીયાણે કય, " શું તું કાંઈ જવાબ કાયની આપતો કા? તે તોરે વિરુદ્ધ સાક્ષી આપતા હા. "

⁶³ફણ ઇસુ મૌન રયો. તીયા પ્રમુખ યાજકે ઇસુણે કય. " હાય તુને જીવતા ઈશ્વરણે સમ આપતો હામ કા, ઈશ્વરણો દિકરો જો ખ્રિસ્ત હા તે તું જ હા કા કાયની, તી આમાહાય ક. "

⁶⁴ઇસુએ તીયાણે કય કા, "તુયે પોતેજ કય હા, ફણ હાય તુમાહાય કતો હામ કા હવે પૂઠી તુમે માણાહાણે દીકરાણે પરાક્રમણા જમણા હાથ પાર બેઠનો ને આકાશણા વાડલા પાર આવતો હેદાહા. ⁶⁵તીયા પ્રમુખ યાજકે પોતાણે નુગડે ફાડીને કય કા, " તીયે દૂર્ભાષણ કરીય હા. આપળાહાય બીજા સાક્ષીઓણે કાજા જરૂર હા? હેદા, હવે તુમાહાય ઈ દુર્ભાષણ ઉનાય હા.

⁶⁶તુમે કાજા વિચારતા હા? " તીણાહાય જવાબ આપતા કય કા, " તો મૃત્યુદંડણે પાત્ર હા. ⁶⁷તીયા તીણાહાય તીયાણે મુઠિ પાર થૂકીને તીયાણે મુક્કીઓ મારી ને તીયાણે થાપાડ મારતા કય કા,

⁶⁸ઓ ખ્રિસ્ત, તુને કીડે ઠોકીયો તી આમાહાય કય દેખાડ. "⁶⁹પિતર બાર આગણામાં બેઠો હોતનો, તીયા એક સેવિકા તીયાણે પાહાય આવીને કય કા, " તું ફણ ગાલીલણા ઇસુણે હારી હોતનો. "

⁷⁰ફણ તીયે બધાહાય આગાલ નકાર કરીને કય કા, " તું જી કતી હા તી હાય જાણતો કાયની. "⁷¹તો બાયરે પરસાળમાં ગોતીયા બીજી દાસીએ તીયાણે હેદીને જે તીયે હોતના તીણાંહાય કય કા, એ ફણ નાસરેથણા ઇસુણે હારી હોતનો. "

⁷²ફણતીયે સમ ખાતાં પાછો નકાર કદો કા, " હાય તીયા માણસણે ઓલીખતો કાયની. "⁷³થોડીવાર પૂઠી પાહાય ઉભીરનારાહાય આવીને પિતરને કય કા, " હાયું જ તું બી તીણાહાય માણો એક હા, કેહે કા તોરે બોનથી તું ઓલખાતો હા. "

⁷⁴તીયા તો શાપ દેણે ને સમખાણે લાગો કા, " હાય તીયા માણસણે ઓલીખતો કાયની. " તરાતુજ મરઘો બોન્યો.

⁷⁵જે વાત ઇસુએ પિતરને કઈ હોતની કા, " મરઘો બોન્યા પેલા તીન વાર તું મારે નકાર કરેહે, " તીતીયાણે યાદ આવ; તીયા બાર જાઈને તો બોજ રડ્યો.

Chapter 27

¹હવે ઉજાલ હોવ, તીયા બદા મુખ્ય યાજ્ઞકોહીય ને લોકોણે વડીલીહીય ઈસુણે મારી નાખણે ફાડ તીયાણે વિરુદ્ધ કાવતર કયર.

²ફૂટી તીણાહાય ઈસુણે બાંદજો ને તીયાણે નેઈ જાઈને પીલાત રાજ્યપાલણે હોપયો.³જીયા યહૂદાયે, જીયે તીયાણે પરસ્વાધીન કયરો હોતનો તીયે હેદજ કા ઈસુણે અપરાધી ગણાવતે હા, તીયા તીયાણે દુઃખ હોવ, ને તીયે ચાંદીણે તીહી સિક્કા મુખ્ય યાજ્ઞકોણી ને વડીલોણે પાહાય પાછા નાવા ને કય કા,

⁴નિરપરાધી લોઈ પરસ્વાધીન કયરાથી મયે પાપ કયર હા, "તીયા તીણાહાય કય કા, "તીયામાં આમારે કાજ ? તી તોરે ચિંતા હા. "

⁵ફૂટી સિક્કાહીય મંદિરમાં ઉડાડી નાખીને તો ગો, 'ને જાઈને ગલામાં ફાસો ખાદો,⁶મુખ્ય યાજ્ઞકોહીય તે રૂપિયા નેઈને કય કા, "ઈ નુયણે મૂલ્ય હા એટલે ભંડારમાં મુકવાણ હાર નાથ. "

⁷તીણાહાય ચર્ચા કરીને પરદેશીહીય દાટણે હારુ એ રૂપિયાથી કુંભારણે ખેત વેચાત નેદ.

⁸હિયા માટે આજ હુદી હી ખેત 'નૂઈણે ખેત 'કવાત હા.⁹તીયા યર્મીયા પ્રબોધકે જી કય ન તી પૂર હોવ હા કા, "જીયાણે મૂલ્ય ઠરાવવામાં આવ, અતરે જયણે મૂલ્ય ઇઝરાયેલપુત્રો હોય ઠાવ્યા તિયાણે કિંમત ત્રીસ રૂપિયા તિણાહાય નેદા .

તીયાણે જીવન ફાગ ઠરાવ્યા હોતના તે ચાંદીણા તીહી સિક્કા તીણાહાય નેદા,

¹⁰ને જેહ પ્રભુએ મને હુકમ કયરો, તેહે કુંભારણે ખેતણે હારુ આપય. "¹¹ને ઈસુ રાજ્યપાલણે આગાલ ઉભો રયોને રાજ્યપાલે તીયાણે પૂછય કા, 'કેહ તું યહૂદીહીય રાજા હા ? " ઈસુએ તીયાણે કય કા, "તું પોતે કતો હા. "

¹²મુખ્ય યાજ્ઞકોહીયને વડીલોહીય તીયા પાર આરોપ મુક્યો તોય તીયે કોઈ જવાબ આપ્યો કાયની.

¹³તીયા પીલાતે તીયાણે કય કા, "તોરે વિરુદ્ધ તે કતરા આરોપ મૂકતા હા હી કેહે તું નાથ ઉનાતો ? "

¹⁴ઈસુએ તીયાણે એક બી શબ્દણે જવાબ આપ્યો કાઈની તીયાથી રાજ્યપાલણે બજ નવાઈ નાગી.¹⁵હવે પર્વમાં રાજ્યપાલણે એક રિવાજ હોતનો કા જો એક બંદીવાનણે નોકાહાય માંગ્યો, તીયાણે તીણે હારુ દેઈ છોડી દેતનો.

¹⁶તીયા વખાત બરાબાસ નામણો એક પ્રખ્યાત બંદીવાન હોતનો.¹⁷એટલે તે ફેગા હોવા ફૂટી પીલાતે તીણાહાય કય કા, "હાય તુમારે ફાગ કીડાણે છોડી દેમ, તીયા વિષે તુમારે કાજા ઇચ્છા હા ? બરાબાસણે, કા ઈસુ જો ખ્રિસ્ત કવાતો હા તીયાણે ? "

¹⁸કેહે કા તો જાણતો હોતનો કા તીણાહાય અદેખાયણે નેદે ઈસુણે હોપ્યો હોતનો.

¹⁹જીયા તો ન્યાયાસન પાર બેઠનો હોતનો, તીયા તીયાણે પત્નીએ તીયાણે કવડાવ્ય કા, "તો નિર્દોષ માણાહાયે તું કાંઈ નખે કરતો, કેહે કા આજે મને સપનામાં તીયાણે નેદે બજ દુઃખ હોવ હા. "²⁰હવે મુખ્ય યાજ્ઞકોહીય ને વડીલોહીય લોકોણે હમજાવ્યે, કા તે બરાબાસણે માંગે ને ઈસુણે મારી નાખાવે.

²¹ફણ રાજ્યપાલે તીણાહાય કય કા, "તીયા બેમાંથી હાય કીડાણે તુમારે ફાગ છોડી દેમ, તુમારે કાજા મરજી હા ? "તીણાહાય કય કા "બરાબાસણે".

²²પીલાતે તીણાહાય કય કા, "તો ઈસુ જો ખ્રિસ્ત કવાતો હા તીયાણે કાજા કર ? "²³તીયા તીયે કય કા, "કાજા કારણે ? તીયે કાજા અપરાધ કયરો હા ? "ફણ તીણાહાય વદારે ઊંચા અવાજમાં કય કા, 'તીયાણે વધસ્તંભે જડાવા.

²⁴જીયા પીલાતે હેદજ કા તીયાથી કાંઈ કરી હકે તેહ નાથ, ફણ તીયાણે બદલે વદારે ગડબડ હોત હા, તીયા તીયે પાણી નેઈને લોકોણે આગાલ પોતાણે હાથ ધોયને કય કા, "ઇયા ન્યાયીણે નૂઈ સબંધી હાય નિર્દોષ હામ ; હવે એ તુમારે ચિંતા હા. "²⁵તીયા બદા લોકોહીય જવાબ આપતા કય કા, "હિયાણે નૂઈ આમારે માથે ને આમારે બાળકો હાય માથે આવે. "

²⁶તીયા તીયે બરાબાસણે તીણે ફાગો છોડી દેદો, ને ઈસુણે કોરડા મારાવીને વધસ્તંભે જોડણે ફાગ હોપયો.²⁷તીયા રાજ્યપાલણે સિપાઈયો ઈસુણે મહેલમાં નેઈ ગયા ને આખી પલટણ તીયાણે મેરે-મેરે ફેગી કદી,

²⁸ફૂટી તીણાહાય તીયાણે નુગડે કાડીને લાલ ઝબ્બો પેરાવ્યો.

²⁹તીયાણે માથા પાર કાંટાણે મુગટ ગુંથીને મુક્યો, તીયાણે જમણા હાથમાં હોટી આપી ને તીયાણે આગાલ ઘૂંટણે ટેકીને તીયાણે ઠઠ્ઠામશ્કરી કરતા કય કા, "હે યહૂદીયાણે રાજા, સલામ !"³⁰ફૂટી તે તીયાણે પાર થુંપયા ને હોટી નેઈને તીયાણે માથા પાર ઠોકી.

- ³¹તીયાણે ઠઠામશ્કરી કરી પાયળી ફૂટી તીણાહાય તીયાણે ઝબ્બો ઉતારીને તીયાણે પોતાણે જ નુગડે તીયાણે પેરાવ્યે ને વધસ્તંભે જોડાવાણે તે તીયાણે નેઈ ગયા.
- ³²તે બાયરે ગયા તીયા કુરેનીણો સિમોન નામે એક માણહ તીયાણે મિલ્યો, જીયા પાહાય તીણાહાય તીયાણે વધસ્તંભ બળજબરીપૂર્વક ઊંચકાવ્યો.
- ³³તે ગલગથા એટલે કા, 'ખોપરીણે જાગ્યા 'કવાતો હા, તીયે પોચીના.
- ³⁴તીણાહાય પિત્ત ભેલવીને સરકો તીયાણે પીણે આપ્યો, ફણ ચાખીને ફૂટી તીયે પીવાણી ના પાડી. ³⁵ઈસુણે વધસ્તંભે જોયડા ફૂટી તીણાહાય ચિઠ્ઠી નાખીને તીયાણે નુગડે અંદરઅંદર વેચી નેદે ;
- ³⁶૩૬.ને તીણાહાય તીયે બેહેયને તીયાણે દેખરેખ રાખી.
- ³⁷ઈસુ જો યહૂદીઓણે રાજા, તો ઓ જ હા, એવ તીયાણે વિરુદ્ધણે આરોપનામ તીયાણે માથાણે ઉપાર મુકાવ્ય. ³⁸તીણાહાય તીયાણે હારી બે ચોરણે વધસ્તંભે જોયડો, એકણે જમણી પાહાય ને બીજાણે ડાબી પાહાય.
- ³⁹પાહાયથી જાનારાહાય પોતાણે માથ હાનીવતા ને તીયાણે અપમાન કરતા કય કા,
- ⁴⁰એરે મંદિરણે પાડી નાખનારો ને તીન દીહીમાં બાંધનારો, તું પોતાણે બચાવ ; જો તું ઈશ્વરણે દીકરો હા તીયા વધસ્તંભ પારથી ઉતરી આવ. ⁴¹તે જ રીતે મુખ્ય યાજ્ઞકોહીય ફણ શાસ્ત્રીહીય ને વડીલો હારી ઠઠામશ્કરી કરતા કય કા,
- ⁴²તીયે બીજાહાય બચાવ્યે, ફણ તો પોતાણે બચાવી નાથ હકતો ; ઓ તે ઈઝરાયેલણો રાજા હા, તો અમુજ વધસ્તંભ પારથી ઉતરી આવે, એટલે આમે તીયા પાહાય વિશ્વાસ કરહુ. ⁴³તે ઈશ્વર પાર ભરોહો રાખતો હા, જો તો તીયાણે ચાહતો હોય તીયા અમુજ તીયાણે છોડાવે ; કેહ કા તીયે કયન હોતન કા, 'હાય ઈશ્વરણે દીકરો હામ. "
- ⁴⁴જીયા ચોરોહીય તીયાણે હારી વધસ્તંભે જોયડા હોતના, તીણાહાય ફણ તીયાણે નિંદા કદી. ⁴⁵છઠ્ઠી હોરથી લગભગ નવમી હોરા હુદી આખા દેશમાં આંદાર હોય રય.
- ⁴⁶આહરે નવમી હોરા ઈસુએ ઊંચા અવાજમાં બમીનતા કય કા, "એલી, એલી, લમા શબકથની ? "ઓ મારે ઈશ્વર, મારે ઈશ્વર, તુયે મને કાજા ખરને છોડી દેદો ? "
- ⁴⁷જી તીયે ઉબે હોતને તીણેમાંથી કતરાકહીય તી ઉનાયને કય કા, 'હો એલીયાણે હાદતો હા. " ⁴⁸તરાતુજ તીણેમાંથી એક દળીને વાદળી નેઈને સરકાથી ભીગવી ને નાકડીણે ચોટકે બાંધીને તીયાણે ચુહણે આપી.
- ⁴⁹ફણ બીજાહાય કય કા, "રવા દે, આપળે હેદતે કા એલીયા તીયાણે બચાવણે આવતો હા કા કાઈની. "
- ⁵⁰પૂઠી ઈસુયે બીજી વાર ઊંચા અવાજમાં બમનીને જીવ છોયડો. ⁵¹તીયા હેદા, મંદિરણે પડદો ઉપારથી નીચે હુદી ચીરાયને તીયાણે બે ભાગ હોય ગયા, પૃથ્વી કાંપી, ને ખડકો ચીરાયા.
- ⁵²કબરો ઉગડી ગોય ને ઘણે મરી ગઅના સંતોહીય શરીરે ઉઠે.
- ⁵³ને ઈસુણે પુનરુત્થાન પૂઠી તો કબરમાંથી નીકલીને પવિત્ર નગરમાં ગયા, ને ખણાહાય દેખાયો. ⁵⁴તીયા જમાદારે ને તીયા હારી જતરા ઈસુણે ચોકી કરતાના, તીણાહાય ઘરતીકંપ ને જી જી હોવ, તી હેદીને બજ ખાબરાતા કય કા, "હાયુ જ ઓ ઈશ્વરણે દીકરો હોતનો. "
- ⁵⁵ને તીયા ઘણી સ્ત્રીઓ, હોતની, જિણાહાય ઈશુણે સેવા કરતી ગાલીલથી તીયાણે પાછાલ આવી હોતની, તે આગેથી હેદજા કરતી હોતની.
- ⁵⁶તીણેમાં મગદલાણે મરિયમ, યાકુબણે ને ચોસેણે માં મરિયમ ને ઝબદીણે દીકરાઓણે માં હોતની. ⁵⁷હાંજ પડી તીયા યુસુફ નામે અરીમયાઈણો એક શ્રીમંત માણહું આવો, જો પોતે ફણ ઈસુણે શિષ્ય હોતનો.
- ⁵⁸તીયે પીલાત પાહાય જાઈને ઈસુણે શબ માગજ, તીયા પીલાતે તી હોપવાણી આજ્ઞા આપી. ⁵⁹પૂઠી યુસુફે શબ નેઈને શાણે ચોખા નુગડામાં તી વીટાલ્ય.
- ⁶⁰ને ખડકમાં ખોદાવીની નવી કબારમાં તીયાણે મૂકી દેદો ; ને એક મોટો પથરો કબરને બારા પાહાય ગબડાવીને તો નાહાય ગો.
- ⁶¹મગદલાણી મરિયમ ને બીજી મરિયમ તીયે કબરણે આગાલ બેઠની હોતની. ⁶²સિદ્ધિકરણે બીજે દીહી મુખ્ય યાજ્ઞકો ને ફરોશીઓહીય પીલાત પાહાય એકઠા હોવા.
- ⁶³તીણાહાય કય કા, "સાયેબ, આમાહાય યાદ હા કા, તો ઠગ જીવતો હોતનો તીયા કતનો કા, 'તીજે દિહી પૂઠી હાય પાછો ઉઠીહી. '

⁶⁴એટલે ત્રીન દીહી હુદી કબરને દેખરેખ રાખવાણી આજ્ઞા કર, રખેને ત્રીયાણે શિષ્યો આવીને ત્રીયાણે ચોરી જાય ને લોકોહીય કય કા, મરીનામાંથી તો જીવતો ઉઠ્યો હા ને છેત્રી ભૂલ પેલાણે કરતા મોટી હોવી. "⁶⁵ત્રીયા પીલાતે ત્રીણાહાય કય કા, "ઇયા ચોકીદારીહીય નેઈને જાયા ને તુમારેથી બની હકે તેવી ત્રીયાણે દેખરેખ રાખા. "

⁶⁶એટલે તે ગયા ને પથરાણે મહોર મારીને ને ચોકીદારો બેહાડીને કબરને દેખરેખ રાખી

Chapter 28

¹વિશ્રામવારને છેન્ને આઠવાળયે ને પેલ્લે દીહિ રવિવારે વેલા હુજાલે મગદલાની મરિયમ ને બીજા મરિયમ કબરને હેદને આવી.

²તિયાં હેદાં, મોટો ધરતીકંપ હોવો, કેહે કા પ્રભુણે સ્વર્ગદુત આકાશમાંથી ઉતીરો, ને પાહે આવીને કબર પાર પથરાને ગબળાવીને તિયાં પાર બેઠો.³તિયાંણે રૂપ વિજલી જેવો ને તિયાંણે નુગળે બરફ જેવે ઉજલે હોતને.

⁴તિયાંણે ઘાકથી ચોકીદારો ધૂજી ગયા. ને મરી ગયા હોય તેવા હોય ગયા.⁵તિયાં સ્વર્ગદુતે જવાબ આપતા તે સ્ત્રીઓને કહ્યું, કય કા, તુમે બિયા માં કેહ કા વધસ્તંભને જોડાયનો ઈસુણે તુમે હેદતી એ હા, તી હાય જાણતો હામ.

⁶. હેદા, ઈસુ ઈયા કાયની હા, કેહે કા તિયે જેહે કયન હોતને તેહે તે સજીવન હોવો હા, તુમે આવીને જિયા તો હુતનો હોતનો તો જાગા હેદા.

⁷. વેલા જાયને તિયાંણે શિષ્યોને કય , કા મરણમાંથી જીવતો હોવો હા, હેદા, તો તુમારે આગાલ ગાલીલમાં જાતો હા. તિયા તુમે

તિયાંણે હેદહા, માયે તુમહાય કય હા."

⁸તિયાં તે બીયને પૂઠી હમટી ખુશ હોવીને કબરની પાહેથી વેલી નિકલીને તિયાંણે શિષ્યો હે ખબાર આપણે દળી.

⁹તિયા હેદા, ઈસુયે કય, કુરાળતા તિણાહાય પાહે આવીને તિયાંણે પાગ ઘયરા, ને તિયાંણે ફજન કયર.

¹⁰તીયા ઈસુયે તિણાહાય કય કા, બીતે નખા, જાયા, મારે ફાવાહાય કયા કા, તે ગાલીલમાં જાય ને તિયા તે મને દેખી.¹¹ને તે જાતની, અતરમાં હેદા, ચોકીદારો માંથી ઘણાં જણાહાય નગરમાં જાયને જી જી હોવ તી બદ મુખ્ય યાજકો હે કય.

¹²તીયા તિણાહાય ને વડીલો હે એકઠા હોયને મનસુબો કરીને તે સિપાઈઓહે ખણા પયહા આપીને હમજાવ્યા કા,

¹³તુમે એહે કયા કા , આમે ઉગમાં હોતના તિયાં , તિયાંણે , શિષ્યો રાતીણા આવીને તિયાંણે ચોરી ગયા.¹⁴જો તે વાત રાજ્યપાલને કાને પોચે, તિયાં આમે તિણાહાય હમજાવનીને તુમાહાય બચાવી નેહું.

¹⁵પૂઠી તિણાહાય પયહા નેદા, ને હમજાવ્યા પ્રમાણે તિણાહાય કયર. તે વાત યહુદીઓમાં આજે બી ચાનતી આવી હા.¹⁶ફણ અગિયાર શિષ્યો ગાલીલમાં એક ડોગરા પાર જીએ ઈસુયે તિણાહાય જાણે કયન તિયાં તે ગયા.

¹⁷મે તિણાહાય તિયાંણે હેદીને તિયાંણે ફજન કદ. ફણ ' ખણા જણાહાય શંકા આવી.¹⁸ઈસુએ તીયે આવીને તિણાહાય કય કા, સ્વર્ગ ને પૃથ્વી પારનો બધો અધિકાર મને આપ્યો હા.

¹⁹તિયાં માટે તુમે જાયા, ને બદા દેશનાઓને શિષ્ય બનાવાં. પિતા, ને પુત્ર, ને પવિત્ર આત્માને નામે તિણાહાય બાપ્તિસ્મા આપતા જાયા.²⁰મયે તુમાહાય જે જે આજ્ઞા આપી હા, તે બધી પાલવાણી તિણાહાય હમજાવ. ને હેદા, જગતણે અંત હૂદી હાય સદાને માટે તુમારે હારી હામ.